

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR TENTH SITTING ON TUESDAY, THE 29th MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPER

2. **Pu K. SANGTHUAMA**, to lay on the Table of the House Statement of Action Taken on the further recommendations of Public Accounts Committee contained in the Twelfth Report relating to Animal Husbandry & Veterinary Department.

PRESENTATION OF REPORT

3. **Pu K. SANGTHUAMA** to present to the House the following Reports of Public Accounts Committee :
 - i) Fifteenth Report on the Report of C&AG of India for the year 2011-2012 relating to Environment & Forests Department.
 - ii) Sixteenth Report on the Report of C&AG of India for the year 2010-2011 relating to Public Health Engineering Department.
4. **Pu LALRINLIANA SAILO**, to present to the House the Fifth Report of Committee on Estimates relating to Bamboo Development Agency under Industries Department, Government of Mizoram.
5. **Pu NIHAR KANTI CHAKMA** to present to the House the following Reports of Committee on Public Undertakings :

- i) Second Report on the Report of C&AG of India for the year 2007-2008 relating to Zoram Industrial Development Corporation Limited (ZIDCO) under Industries Department.
- ii) Third Report on the Report of C&AG of India for the year 2010-2011 relating to Zoram Industrial Development Corporation Limited (ZIDCO) under Industries Department.

FINANCIAL BUSINESS
DISCUSSION AND VOTING ON DEMANDS

6. **Pu R. LALZIRLIANA**, Minister to submit to the Vote of the House various Demands under his charge.
7. **Pu H. ROHLUNA**, Minister to submit to the Vote of the House various Demands under his charge.

NGURTHANZUALA
Secretary

.....

S P E A K E R : A hming ropui tak avang hian Lalpa chuan a mite chu a hawisan dawn si lo va; a mite tana siam che u chu Lalpa lawm zawng tak a ni si a. I Samuela 12:22

Awle, zawhna 139-naah kan kal anga, zawhna neitu MLA zahawm tak Er.Lalrinawma i lo sawm ang.

Er.LALRINAWMA : Pu Speaker, ka lawm e. Kan Minister hmena ka Starred Question No. 139 na-

- a) Kum 2014-2015 chhungin RBI-ah vawi engzatnge pawisa puk a nih ? Interest engzatnge chawi a nih ?
- b) Tun kum kal mek 2015-2016 chhung hian RBI-ah vawi engzatnge pawisa puk a nih tawh a, interest engzatnge chawi a nih tawh ?

SPEAKER : Awle, a Department neitu Minister zahawmtak Pu Lalsawta, i lo sawm ang.

Pu LALSAWTA, MINISTER : Pu Speaker, ka lawm e. Member zahawm tak Er.Lalrinawma zawhna chhanna chu hetiang hi a ni –

- a) Kum 2014-2015 chhung hian RBI-a pawisa puk dan chu Normal WMA vawi 32, Special Drawing Facility (Special WMA) vawi 32 leh Overdraft vawi 2 puk a ni.

Tin, hemi kuma Normal WMA, Special Drawing Facility leh Overdraft te avanga interest chawi zat chu ₹ 112.39 lakh a ni.

- b) Kum 2015-2016 chhung hian RBI-a pawisa puk dan chu Normal WMA vawi 5, Special Drawing Facility (Special WMA) vawi 5 leh overdraft

vawi 1 puk a ni. Normal WMA, Special Drawing Facility leh Overdraft-te avanga 2015-2016 chhunga interest chawi tawh zat chu ₹57.21 lakh a ni.

Er.LALRINAWMA : Pu Speaker, ka lawm e. Kum 2014-2015 chhung leh 2015-2016 kal meka kan pawisa puk zat kha min hrilh thei em tih leh, tuna annual financial statement kan han pharh tak ah khan budget estimate 2016-2017-ah khan kan puk tura kan estimate ah nuai thum kan dah a. Hei hi nikum 2015-2016 khan nuai sangthum kan dah a, kum atan hei hi a tlem hle mai a, kan puk mang lo turah kan inbeisei nge, helai hi min hrilh fiah thei em tih ka rawn zawhbelh e.

SPEAKER : Zawhbelhna dang a awm loh chuan Finance Minister zahawm tak Pu Lalsawta i lo sawm ang.

Pu LALSAWTA, MINISTER : Pu Speaker, kumin lo awmmek ah hian kan chawi tawh thin chu nichina kan chhanna ang kha a ni a, kumin 2016-2017 chhungah hian chawi miah lohva kal tlang kan tum a, mahse thla veng awm miah loh chu thain kan hre lova, cheng nuai thum hi kan han dah ve a.

Tin, a zawhbelhna hmasa zawk engzatnge kan puk tawh tih kha a thui khawp mai a, ka'n chhiar chhuak ang e, Pu Speaker, " Special waste and means - nikum hmasa 2014-2015:-

April	-	7- 47 lakhs
April 8	-	3342 lakhs
April vek	-	3500 lakhs
April 17	-	3850 lakhs
April 19	-	9000 lakhs
April 21	-	1600 lakhs

April 26	-	530 lakhs
April 28	-	1043 lakhs
April 29	-	1162 lakhs
April 30	-	352 lakhs.

Hei hi waste and means a ni a, ka'n chhiar leh ang a.

10 May	-	754 lakhs
May 12	-	855 lakhs
May 13	-	34 lakhs
May 16	-	613 lakhs
May 17	-	1880 lakh
May 19	-	68 lakh
May 20	-	376 lakh
May 21	-	5930 lakh
May 23	-	653 lakhs
May 24	-	4950 lakh
May 26	-	4 lakh
May 30	-	107 lakhs
May 31	-	6994 lakhs.
June 28	-	494 lakhs
August 30	-	1506 lakhs

Normal waste and means ah:

October 25	-	6450 lakhs
October 27	-	6500 lakhs
October 28	-	6600 lakhs
October 29	-	1780 lakhs
November 1	-	6242 lakhs
November 29	-	8250 lakhs

December 12	-	1380 lakhs
December 13	-	5184 lakhs
December 15	-	128 lakhs
December 17	-	2314 lakhs
December 18	-	184 lakhs
December 20	-	622 lakhs
December 25	-	1802 lakhs

Special facility kan tih kha kan puk nual a ka'n chhiar leh ang a –

April 7	-	478 lakhs
April 8	-	3342 lakhs
April 16	-	512 lakhs
April 25	-	2368 lakhs
April 21	-	1865 lakhs
May 7	-	1174 lakhs
May 8	-	1504 lakhs
May 9	-	994 lakhs
May 10	-	642 lakhs
May 20	-	10 lakhs
June 28	-	4365 lakhs
June 30	-	335 lakhs
August 30	-	4988 lakhs
October 16	-	335 lakhs
October 17	-	1114 lakhs
October 18	-	662 lakhs
October 20	-	182 lakhs
October 22	-	2819 lakhs
October 25	-	836 lakhs
Nov 1	-	2966 lakh

Nov 27	-	259 lakh
Nov 28	-	1946 lakh
Nov 29	-	2704 lakh
Dec 10	-	161 lakh
Dec 11	-	1077 lakh
Dec 12	-	3694 lakh
Dec 25	-	4976 lakh
Jan 26	-	168 lakh
Jan 28	-	328 lakh
Jan 29	-	149 lakh
Jan 31	-	1029 lakh
Mar 27, 2015	-	4856 lakh

Overdraft hi tlemte kan nei a, kum 2014 May 31-ah a ni a, chu chu ₹4112,97,278.58 (Nuai sangli za sawm pahnih leh sing kua sangsarih zahnih sawmsarih pariat leh pawisa sawmnga pariat) a ni. Tichuan November ni 29 khan overdraft kan nei leh hlauh a, chu chu ₹ 121,53,554.83(Nuai sangkhat zahnih sawmpanga leh sing thum zanga sawmnga pali leh pawisa sawmriat pathum) a ni.

Hengah hian nichina kan sawi tak ang khan hemi kum hian interest a kan chawi zat chu ₹ 112,39,000/- (nuai za sawm pahnih leh singthum sangkua) a ni. Chu chu tun kum kaltaa kan chawi dan tlangpui a ni a. A interest hi chu min zawt chiah lo bawk a Pu Speaker, khami chin kha kan pawisa puk dan, kan indaihloh vanga kan puk dan a ni e.

SPEAKER : Aw, Pu Rinawma, a chiang viau tawh emaw tih nak lain.

ER. LALRINAWMA : A chiang a, kha kha ziakin khawngaihin member te hi min pe thei ang em le kan ti deuh a. A thui tham deuhhlekk a, kan lo copy seng si lova,

helaiah a buah a lang awm si lova. Ziakin nakinah a copy kha min pek theih chuan a lawmawm ngawt ang.

SPEAKER : Office lamah i dil mai dawn nia aw. Tunah zawhna 140-naah kan kal anga, MLA zahawm tak Pu Lalruatkima'n zawt sela.

Pu LALRUATKIMA : Pu Speaker, ka lawm e. Ka starred question No.140-na Sericulture Minister zahawm tak chhan atan-

- a) Kum 2011-2016 chhungin RKVY leh NLUP sum Pangang khawi hmalakna atan engzatnge hmuh a nih? A year wise-in?
- b) NLUP Pangang khawi beneficiaries engzatnge awm? NLUP Pangang khawi hna bansan an awm em? An awm chuan chhungkua engzatnge?
- c) Kum 2011-2016 chhungin engzatnge thar anih a, khawiah nge hralh thin a nih? Engzat rate-in nge hralh thin a nih?

SPEAKER : Awle, department changtu Minister zahawm tak Pu B.D Chakma chhang turin i sawm ang.

Pu B.D. CHAKMA, MINISTER : Pu Speaker, MLA zahawm tak Pu Lalruatkima Starred Question No.140-na chhanna chu-

a)

Sl. No	Year	RKVY (in lakhs)	NLUP (in lakhs)	Remarks
1.	2010-2011		500.00	
2.	2011-2012	20.00	120.00	
3.	2012-2013	650.00	856.00	
4.	2013-2014	220.00	405.00	
5.	2014-2015	1192.00	250.00	K-Deposit
6.	2015-2016	224.60		
	TOTAL	2306.60	2131.00	

RKVY hnuaiah kum 2015 chhungin K. Deposit-ah ₹224.6 lakhs a awm a. NLUP hnuaiah chuan a awm lo a ni.

Kum 2011-2016 chhunga pangang khawina atana sum hmuh chu a vaia belhkhawmin RKVY hnuaiah ₹2306.60 lakhs a ni a. NLUP hnuaiah ₹2131.00 lakhs a ni.

(b) NLUP hnuaiah pangang khawi beneficiaries engzatnge awm? NLUP hnuaiah pangang khawi hna bansan an awm em? An awm chuan chhungkaw engzat nge? tih chhanna chu NLUP hnuaiah pangang khawi beneficiaries 2195 nos. an awm a. NLUP hnuaiah pangang khawi hna bansan chhungkaw 21 an awm.

(c) Kum 2011-2016 chhungin engzat nge thar a nih a? Khawiah nge hralh thin a nih? Engzat rate in nge hralh thin a nih tih chhanna chu 2011-2016 chhunga cocoon thar dan chu hetiang hi a ni:-

1. Kum 2011-2012 : 19254.388 kgs.
2. Kum 2012-2013 : 34818.42 kgs.
3. Kum 2013-2014 : 33014.575 kgs.

4	Kum 2014-2015	:	31625.189 kgs.
5.	Kum 2015-2016	:	33145.28 kgs.
	TOTAL	:	151858 kgs.

Cocoon thar chhuah te hi Department in a leisak zel a. Kut hnathawktute tan a awlsam zawk nan District tinah Cocoon Purchasing Centre (Cocoon leina hmun) siam a ni.

A hralh dan rate hi hetiang a ni.

1.	Mulbery Reeling Cocoon Grade 'A'	-	₹250/- per kg.
2.	Mulbery Reeling Cocoon Grade 'B'	-	₹ 200/- per kg.
3.	Mulbery Reeling Cocoon Grade 'C'	-	₹ 150/- per kg.
4.	Cocoon tha lo silk la a hlum tlak loh	-	₹ 120/- per kg.

Ka lawm e.

SPEAKER : Zawhbelhna Pu Lalruatkima.

Pu LALRUATKIMA : Pu Speaker, ka lawm e. 2014 – 2015 chhunga NLUP atanga sum hmuh K – Deposit-ah khati zo zai kha engvanga la awm reng nge ? tih kha ka zawhna ni ta se la . NLUP hnuaiyah Pangang khawi khua engzat nge covered a nih ? tih leh NLUP Pangang khawi hi kalpui zel tum a ni em ? Tum a nih chuan engtin nge ruahmanna siam a nih ? tih a ni a.

Tin, a dang leh ah chuan tanpuina dawng lo taima tak a Pangang khawia eizawna nei an awm laiin tanpuina dawng si thawk chhonzawm si lo chhungkaw 21 lai an awm kha a vanduai thlak khawp mai a, khang taima tak a thawktute, Pangang khawitute, tanpuina dawng si lo te kha dawm kan an nih theihna turin ruahmanna siam theih a ni ang em? tih leh ZOHANCO thiah a nih tak hnu ah hian Cocoon thar chhuah hralhna tur engtin nge ruahmanna siam a nih? tih ka zawt e.

SPEAKER : Zawhna kha a tam viau va, Minister zahawmtakin chhang se, i lo sawm ang.

Pu B.D.CHAKMA, MINISTER : Pu Speaker, MLA zahawmtak zawh belhna pakhatna (1) NLUP K – Deposit, ₹250 lakh kha chu tunah ruahmanna kan siam mek a, kumin chhungin kan lak theih ka ring a ni. Pahnihna (2) chhanna chu Pu Speaker, nakinah kan pe dawn nia. NLUP Benefit dawng tawh si, mahse chhonzawm tha lo kha chu hmanni ah pawh chanchinbu ah kan chhiar a, Chanchinbu chhiar zawh veleh khan Department hotute chu Enquiry nei turin kan in hrilh nghal a, March ni 15 ah khan officer pahnih (2) ka tir tawh a, tunah field – ah kal in an en mek a ni. Report kimchang kan lak theih veleh NLUP kutah kan dah ang. An chhonzawm tak tak lo a nih chuan an chhonzawm loh chhan chu an dinhmun zirin action la tur chu NLUP a nih vangin keini chu report pe tur kan nih angin report kan pe dawn a ni.

Amaherawhchu, NLUP flagship programme hi pawisa dawng tawh si, mahse lawmthu sawi nan tha taka thawk peihlo leh chhonzawm silo, chanchinbuah te an rawn lan khan engang mi nge an nih ang aw tiin ka ngaihtuah a. Lawmthu sawi ahnekin a chhe lam ringawt sawi tum leh dawng si chhonzawm tha peih bawk silo an awm hi a mak ka ti a ni.

Chuvangin, hei chu uluk deuhin field ah kalin kan en mek a ni, a dik tak tak a nih chuan khawi mi nge, engang mi nge tih te, taksa lampang chu a tha rilru lam hi a tha lo em ni aw tih hi rilruah te hian kan ngaihtuah thin a ni. Chuvangin, report hi a lak theih veleh NLUP hnenah kan theh lut dawn a ni.

Tin, ZOHANCO leh Sericulture hian business lamah link kan nei lo a ni. Cocoon hi heatah STI Zemabawk ah engkim processing a tihtheih a, Zemabawk a Sericulture Technical Institute-ah sawn kan process thin a ni. Chuvangin, ZOHANCO nen chuan Direct link chu kan nei lo a ni.

Pu LALRUATKIMA : Pu Speaker, khawngaihin, Session hmasa khan ZOHANDCO in min leisak thin a, tih kha kan Minister zahawmtak khan a sawi khan ka hria a, chulai ah chuanin ZOHANDCO thiah a ni si a, khami hralhna tur kha ngaihtuah ran a nih loh chuan in Beneficiaries leh Department te pawh kha an buai thei dawn ni in a lang a, kha lai a kha engtin nge ruahmanna an lo nei tawh reng em ? an la nei lo a nih chuan ruahmanna neih ran kha a tul awm ve tih kha ka'n zawt a ni.

Pu R.VANLALVENA : Pu Speaker, khawngaihin, ka hriatsual loh chuan ZOHANDCO hian an lei ngai lo, a chhanna kha kan hresual palh nge aw ka ti a.

Pu B.D.CHAKMA, MINISTER : Pu Speaker, a hmasa in question zawttu ka chhang hmasa ang e, Pu Lalruatkima. ZOHANCO hian Sericulture Department atangin cocoon an lei ngailo a ni. Mahse reeling value ti mai ang, silk an mamawh angin an la ve thin a ni. Mahse keini hi chuan cocoon hi farmer hnen atangin direct-in Purchasing Centre-ah kan lo lei thin a ni. Heta tang hian Zemabawk ATI-ah kan process leh thin a, silk an siam chhuak ta thin a ni.

Silk siamna hi ZOHANDCO in an mamawh a zirin an lo la thin a ni. Chuvangin direct marketing link hi kan nei lem lo a ni. Pu Speaker, ka lawm e.

Dr. K. BEICHHUA : Pu Speaker, kan Minister zahawm tak khan direct-in Department kan purchase a ti ta a. Department khan khami period chhung khan engzatnge an hralh chhuah? Sum tam tak NLUP leh RKVY atang khan kan seng a. Engzatnge department khan a hralh chhuah tawh tih ka zawt e.

SPEAKER : Kha kha Member zahawm tak chhanna a ni a. Member khami zawhah minister.

DR. B.D.CHAKMA, MINISTER : Pu Speaker, tunah tak chuan ka chhang thei mai lova. Engpawhnise, hei chu department-ah zawtin kan lo chhang dawn nia. Ka lawm e.

Pu LALRUATKIMA : Pu Speaker, khawngaih takin, hemi Economic Survey Report-ah hian NLUP Beneficiaries hi 2206 a inti si a. Kan minister zahawm tak khan 2195 ti khan min chhang sia, engnge ni khalai data inmil lo kha a awmzia ni ang le ? He kan Economic Survey Report hi rintlak loh a ni nge, kan minister chhanna kha a dik tawk lo tih kha khawngaihin thudik min hrilh thei em aw.

Pu. B.D. CHAKMA, MINISTER : Pu Speaker, figure hi 2206, kha chu nikum hmasa daih ami kha a niang. Tuna ka chhanna hi chu latest report a ni e. Hna bansan, thlak loh theih loh kha chu kumtin an awm thin ania. Chuvangin 2195 hi chu latest data a ni e.

SPEAKER : Zawhna No. 141-naah kal ila, zawhna neitu member zahawm tak Pu Lalruatkima'n zawt se.

Pu LALRUATKIMA : Pu Speaker, ka lawm e. Ka Starred Question No. 141-na, Labour, Employment & Industrial Department changtu minister zahawm tak chhan atan:-

- (a) ITI Aizawlah hian Trade engzatnge zirna awm ? Trade hrang hrangah te hian zirlai engzatnge awm ?
- (b) Zirlai pass chhuak te hi Certificate pek zel an ni em ? An nih loh chuan engvanga Certificate hi pek loh nge an nih ?

Pu LALRINMAWIA RALTE, MINISTER : Pu Speaker, CVP, CPS training kan tih chiah ni si lo, Mizorama Building and other construction workers welfare fund atangin a guidelines in a theih a tih mai pawh ni lo min phut deuh hlek zawk hi a awm a.

Chutah chuan construction leh related skill-ah training na tur sum hi pechhuak ve tura tih kan ni a. Chumi hnuaiah chuan kan ITI Aizawl, Lunglei leh Saihaah hian construction leh related forces kan ti ve a. Hei hi State Council for Vocational Training Modular Employable Skill kan tih siam a awm ve a. State sawrkarin technical zirna tawite a siam ve ti pawhin kan sawi thei ang chu. Chumi hnuaiah chuan heng ITI pathumah te hian mi 62 an training mek bawk a ni. A zawhna hi ITI bik course a nih avangin khatah khan kan han telh lova. Chungte nena kan tih vek chuan zirlai zawng zawng hi 400 an chuang ta daih a nih chu, Pu Speaker.

Pu LALRUATKIMA : Pu Speaker, ka'n sawi belh duh chu, Certificate hi an pechhuak lawk si lova. Training-te khu an buai khawp mai a. 2013-14 te kha an pe a, khami hnu lam chu Certificate hi an nei lova. Marksheet chu an dawng tawh a ni. Chuvang chuan hna zawn kawngah harsatna an tawk nasa a, zirlaite hian. Helai hi chinfel ran sak ni thei se. Tin, ka zawhnaah chuan Mechanical Engineer ti mai teh ang, mechanic (diesel) lam tan eng motor nge ITI ah hian awm ? tih kha ka zawhna ni sela. Tin, a dang lehah chuan ITI Aizawl tan hian bus lei a ni ta em ? A nih loh chuan eng harsatna nge wawiinah la awm zel tih kha ka zawhbelhna a ni e.

Dr. K. BEICHHUA : Pu Speaker, Saiha ITI Boys Hostel khi 2014 a sak tan a ni a. Lunglei leh Aizawl chu luah theihin a awm tawh a. Saiha erawh chu tunah hian a chanve vel chauh an sa in ka hria a. Hei hi tunge a contractor ? Pawisa engzatnge pek a nih tawh ? Sanction amount engzatnge ? Engvanga sak chhun zawm thei lo nge a nih tih ka zawhna a ni a. Tin, khilalaia zirtirtu indaih lohna khi dah belh tumna a awm em tih ka zawh belhna a ni e.

SPEAKER : Aw, an pahnih zawhna kha minister-in chhang kawp mai se.

Pu LALRINMAWIA RALTE, MINISTER : Pu Speaker, Mechanic Diesel Engine bikah eng motor nge awm tih kha, member zahawm tak khan min lo

ngaithiam sela, ka zuk kal vek tawh a, ka zuk tlawh vek tawh a, a in hung hi chu a awm a, eng motor nge tih lam kher kher khan ka lo chhinchhiah hauhlo mai a. Tin, khung khu up grade a ngai a ni. An engine hrim hrim hmante pawh khu a tunlai tawhlo tih a ni a.

Kan ITI hrim hrim hi a pumpui hian an course neih lai a pawh khu khumi kan craftment training scheme hnuai a an course zirlai nichina kan chhan tak ang a 23 a te pawh hi a tlangpui thuin up grade a ngai deuh vek a ni. Chu chu TATA Company hianin Motor Vehicle lam section a hi chu min rawn tih phuisui tura tih kha ani a. Petrol engine te pawh ani vek a, kan chhang thei mai lova, a hma pawh khanin kan hriat theih mai loh kha ziakin kan chhang ang kan tih kha, ziakin chhangin kan pe tawh a. Chu chu min lo hre thiam sela, ziakin chhanna kan lo pe leh ang e.

A zawhna pahnihna kha harsatna a la awm em tih lai a kha (Pu LALRUATKIMA : Bus kha an lei tawh em? engnge a chanchin?) Bus pahnihna pakhat kha a tak kan hmu tawh a, Bus pahnihna chungchang kha session hmasa lam pang nikum lamah te khan kan chhang tawh a. A hrehawm khawp mai a, helai a Pu Speaker, han sawi chian lutuk hi chuan, mi chhungkua chungchang harsatna ril deuh hi kan va sawisak ngai a awm tlat mai a. Chu chu kan dawr a te TATA lam pangah hian, chuvangin a motor kha kan la la thei tlat lova ni. Tin, a pawisa lakir tura kan han intih pawhin chu harsatna chuan min la din deuh a. Engpawh nise, hlauh der turah chuan kan inngai chuanglo fan a ni.

Motor man kha kan hriat ang khan pek tawh a ni a, amaherawhchu, Motor tak kan la hmu theilo kha a ni a. Member zahawm tak khan min lo hre thiam turin ka'n ngen nghal a ni. ITI Saiha tih hi Pu Speaker, a contractor tih lam a kha han inmualpho ta ila, ka lo hre derlo mai a, member zahawm tak kha nakinah kan lo hriattir ang.

Zirtirtu indaih lohna tih hi kan ITI ah hian kan harsatna vek a ni a, helai Aizawlah pawh hian Instructor neih lohna te pawh kan nei a, a hrehawm khawp mai a.

Engpawhnise, model ITI turin in State chhungah pakhat rawn thlang rawh u an ti a. Aizawl ITI hi loh theih lohin phuisui sa ber ani bawk a, chu chu kan thlang a, chumi chu kan tum ang leh kan beisei angin Central lam Labour & Employment Ministry khuan min rawn tihphuisuisak zung zung lo deuh a, min rawn tihphuisuisak ni sela chu kan inawi nung tlang thei turah kan inngai a. Kan indaihlo a, zirtirtu hi sorkarin lak belh minphalsak a, kan lak nite a thleng a nih loh chuan kan pek belh ang chumi hunah han tih kha ka chhang thei mai lo a ni e.

SPEAKER : 2013 atanga certificate pek theih tawh loh tih kha

Pu LALRINMAWIA RALTE, MINISTER : Pu Speaker, 2013 ami ho kha tih a ni a, 2014 atangin system thar an rawn introduce avangin MIS lam a MIS portal kan neihah khan rawn generate vek a ngai a. Engkim mai hi a muang ta em em a ni. Kan sawi kan sawi ve thin a hei hi, amaherawhchu kei mahni lam atang hi chuan fello a awm lova, a system kan hriat angin internet kaltlanga engkim tih a nih avangin a technical problem avang kha a ni a. Kan thu neihna piah lam a ni a, kan bawhzui ve reng tho nain a kalchak phah vak chuanglo a ni. Amaherawhchu, hmuh theih thuai erawh chu kan in beisei tawh. An marksheet te pawh a lo thleng vek tawh a, download vek a ni tawh a, a certificate te hi nghah chu a ni.

SPEAKER : Awle, zawhna no. 142 naah kal ila a zawhna neitu MLA zahawm tak Pu Lalrinawma i lo sawm ang.

Er. LALRINAWMA : Pu Speaker, ka lawm e Horticulture Department changtu Minister zahawm tak hnena ka Starred Question No.142 na –

- a) Kum 2014 – 2015 chhungin pipe engzatnge lei a nih? Eng size te nge?
- b) A size a zirin coil engzat theuh nge lei a nih?
- c) Farmer engzat hnenah nge pek chhuah a nih? Ka lawm e

SPEAKER : Awle, a department neitu Minister zahawm tak Pu P.C. Lalthanliana lo sawm ila.

Pu P.C. LALTHANLIANA, MINISTER : Member zahawm tak Er. Lalrinawma zawhna chhanna chu hetiang a ni.

- a) Kum 2014-2015 chhungin Pipe 2992 rolls lei a ni a, 16mm size a ni.
- b) Pipe 16mm size hi 2992 rolls chauh lei a ni
- c) Farmer 765 hnena pek chhuah a ni tih kha Pu Speaker ka chhanna a ni.

SPEAKER : Awle, zawhbelhna a awm em? Pu Rinawma

Er. LALRINAWMA : Pu Speaker, zawhbelhna. Heng pipe te hi farmers card neilo te hnenah hian pek chhuah a ni em tih a ni e.

SPEAKER : Aw, Minister zahawm takin chhang se. Zawhbelhna dang a awmlo maw?

Pu P.C. LALTHANLIANA, MINISTER : Pu Speaker Farmers card hi kan han siam ve bawk tak na a, amaherawhchu siamlo te pawh a mamawh hi chu kan pe thoin ka hria. A neilo pawh hi chuti taka strict taka farmers card leh card lo chu a awmlo a. Amaherawhchu a takin a mamawhtu, a diltu ten huan an nei em tih lam erawh hi chu kan theih chen chen chu kan strict a kan verify ve thin a ni.

SPEAKER : Pu Rinawma, zawhbelhna dang leh

Er. LALRINAWMA : Pu Speaker, kha lai kha ka'n sawi duh a. A hminga bialtu nei ta chu, min han zawt ve a, kan biak vel hian farmer card a ngai an lo ti zel mai a, kha an lo pe tho ni te pawhin a lang a. Khalai kha chu kan lo sawi leh hunah te pawh farmers card ngailo te pawhin min lo pe thei tawh ang chu maw.

SPEAKER : Zawhbelhna teh chiam a ni lo, Zawhna dang 143-naah kal ila, a zawhna neitu a ngai bawk Er. Lalrinawma zawt turin sawm leh ila.

Er. LALRINAWMA : Pu Speaker, Sport & Youth Services Department changtu Minister zahawm tak hnena ka Starred Question No.143 na – Kum 2014 – 2015 chhungin Infiammite tan cash incentive ah eng engzatnge senral a nih?

SPEAKER : Awle, Minister zahawm tak Pu Zodintluanga chhang turin sawm ila

Pu ZODINTLUANGA, MINISTER : Pu Speaker, kan member zahawm tak Er.Lalrinawma zawhna chhanna chu Kum 2014-2015 chhungin Infiammite tan Cash Incentive pek a la ni lo. A chhan chu hmanni lawk thlengte khan Medal an rawn la a. Financial Year hi tunah a tawp dawn a, chumi rual chuan pek kan tum a ni.

Tin, Pu Speaker, February ni 8 2016 khan National Games a kan mizo nula tlangval 25 ngawt mai gold medal te, medal chi hrang hrang la te kha NEC atangin cheng nuai 67 kan dawng bawk tih kha ka'n report tel nghal ani e.

SPEAKER : Zawhbelhna Pu T.T. Zothansanga i lo sawm ang.

Pu T.T. ZOTHANSANGA : Pu Speaker, ka lawm e. Kha Pipe chungchangah khan Pu Rinawma kha a vui deuhin ka hria a, “right person in the wrong party” tih te ka rilruah a lut a. Hmanni Inrinni khan AFC khan Mohan Bagan kha kan hneh a, kan Minister kal tlangin AFC ka'n lawmpui phawt teh ang. Pu Speaker, ka zawhna chu hei hi a ni – Mizo footballer professional- in India ramah engzatnge tunah hian awm mek tih kan hre duh a. A pahnihna ah chuan Mizo naupang pahnih Liverpool lamah training an awm mek nia sawi hi tutenge ni tih kha kan zawt teh ang.

SPEAKER : Minister zahawm tak Pu Zodintluanga chhang turin i lo sawm ang.

Pu ZODINTLUANGA, MINISTER : Pu Speaker, kan member zahawm tak Pu T.T. Zothansanga zawhbelhna kha, kan Mizo thalai footballers professional hmun hrang hranga awm hi keep track an har tawh angreng khawp mai a. A then Club lianah te an awm a, an lo insawn leh a, tin, a thar hi an la ve zel mai baw k a. Chuvang chuan, a za tel teh meuh hi State pawn-ah an awm a. A zat chiah chiah hi a sawi hleihtheih loh a ni. Tin, tuna Liverpool a Mizo naupang training te hi pahnih kha an ni a. Tin, Germany-ah pawh engemawzat an kal leh dawn mek a ni tih kha ka chhanna ni mai teh se.

SPEAKER : Pu Ngurdingliana.

Dr. NGURDINGLIANA : Pu Speaker, ka lawm e. Kan Sports Minister zahawm tak hnenah AFC dintu zing ami ka nihna avang leh player ka nihna angin he House kaltlangin lawmthu ka sawi e.

Pu VANLALZAWMA : Pu Speaker, zawhbelhna ni chiah lo. Champhai 'N' bialtu zahawm tak sawi hmang khan pipe kha farmer card neilo pawhin awmna party a dik chuan a dawn theih tihna em ni ?

Pu ZODINTLUANGA, MINISTER : Pu Speaker, Sports & Youth Services Department hian pipe kan sem ve tlat lo mai a, ka chhang thei lo a ni.

Pu VANLALZAWMA : Pu Speaker, Horticulture Minister khan min chhang thei em aw ?

Pu LALRINMAWIA RALTE, MINISTER : Pu Speaker, Pu T.T Zothansangaa thusawi kha keia hrilhfiah theih a ni lova. Keini chuan Party kan thliar lova. He thil semna-ah hian a mamawhtu farmer te kha kan pe mai a ni.

SPEAKER : Zawhna No.144-naah kal ila, zawhna neitu MLA zahawmtak Pu Lalruatkima'n han zawt sela.

Pu LALRUATKIMA : Pu Speaker, ka lawm e. Ka Starred Question No.144-na Labour, Employment & Industrial Training Department changtu Minister zahawmtak chhan atan -

- (a) India ram pawnah thalai hnathawk turin mi engzatnge tirthchhuah an nih tawh ?
- (b) Khawi ramah te nge hnathawk tur hian an kal a, an hlawhtlin leh hlawhtlin loh enzui an ni em ?
- (c) Rampawna thalaite tirthchhuah an nih hma hian Training pek an ni em ? An nih chuan engchena rei nge Training pek an nih ?

SPEAKER : Minister zahawmtak Pu Lalrinmawia Ralte, a Department changtu chhang turin i lo sawm ang.

Pu LALRINMAWIA RALTE, MINISTER : Pu Speaker, Aizawl West

II bialtu MLA zahawmtak Pu Lalruatkima Starred Question No.144-na chhanna chu –

- (a) Labour, Employment & Industrial Training Department hian India ram pawnah thalai hnathawk turin tirth chhuah a nei lo.
- (b) Labour, Employment & Industrial Training Department chuan thalaite India ram pawnah hna thawk tura tirth chhuah a neih loh avangin an hlawhtlin leh hlawhtlin loh enzui an awm lo a ni.
- (c) Labour, Employment & Industrial Training Department hian India ram pawna thalai kal tur training pek a nei lo.

SPEAKER : Pu Lalruatkima.

Pu LALRUATKIMA : Pu Speaker, Mizoram Youth Commission kaltlangin skill development chungchangah training wawi tam tak Department hian a pe niin ka hria a. Chutah chuan kan thalai tam tak hi India ram pawnah leh ram chhungah te hnathawkin an awm a. Chung mi-te chu Department in a tira a bul tum leh thiamna a pekte an ni a. Ama'rawhchu, Department lam pawhin hemi chungchangah hianin ram pawna an kal theihna tur pawhin ngaihtuahna hman a tha viau-in ka ring a, a lo la hmang lo a nih chuan.

Ram pawnah kan thalai tam tak an va chhuak a. Harsatna an va tawh leh a ni. Visa chungchangah te, eng engemaw passport chungchangah te a lo tam mai a. Chung mi-te chuanin Department a zir thiamna petu-te kha an mawhpuh leh chin kha a lo awm lo thei lo a. Kan han sawi taka chu khang ang harsatna kha a ni a. Chuvang chuan, Department in an tir lo a nih pawhin, anmahniin an inngahchhan ber Mizoram Youth Commission kha a nih loh theih loh avang khanin Department pawh hian hemi kawngah hian tan lak a tul lawm ni ? Ram pawnah leh India ram chhungah pawh a ni tho mai a. Khalai harsatna tawkte enzui zel a, ngaihtuahna kan pek loh kha chuanin uluk lehzuala hnamdang karah pawh an survive na tur khanin a pawimawh a ni.

Dr. K.BEICHHUA : Pu Speaker, zawhbelhna. Youth Commission leh Labour, Employment & Industrial Training Department an in relate dan hi chiang takin kan Minister hian min hrilh thei em ?

S P E A K E R : Tu Minister chhan turin nge i tih ?

Dr. K. BEICHHUA : Pu Speaker, Labour, Employment & Industrial Training Department changtu Minister zahawmtak chhan atan ka zawt a ni.

Pu K.LALRINTHANGA : Pu Speaker, Education Department hnuaiiah hian zirlai tam tak an awm a. IAS te IFS te an passed a, chu chu Sorkar hian a enzui zel em tih ka rawn zawt e.

SPEAKER : Education lam kha a hawi daih mai a. Engpawhnise, Minister zahawmtak Pu Lalrinmawia Ralte i lo sawm ang.

Pu LALRINMAWIA RALTE, MINISTER : Pu Speaker, Member zahawmtak tak pali ten zawhbelhna an han siam a. Skill development chungchang hi he House zahawmtakah hian hun hmasa lamah pawh khan kan lo sawi nual tawh a. Member zahawmtak zawhna rawn siam danah pawh hian public, mipui vantlang, a mimir-ina kan hriat dan atang chuan he zawhna hi zawhna awm tak a ni tlat a ni. Skill Development Initiative Skill an ti a. Ministry of Labour & Employment khuan an enkawl thin a ni. Chumi hnuaiiah chuan training theih course hrang hrang modular employable skill an tih kha, thiam thil zir tur chi hrang hrang, educational qualification hrang hrang mamawh, lekhathiam lo pawhin a train theih tih thlengin a awm a ni.

Chumi SDIS Scheme hnuaiiah chuan North East State te hian kan duh phawt chuan candidate kan thlang chhuak a, keimahni North East area pawnlam India ram State lian zawkah leh khawpui lian zawkah te Vocational Training Provider an tih VTP, Ministry of Labour & Employment a empanel thlap, chungho hnenah chuan training turin kan tir ta a. Anni khan training te an lo pe a, exam te an nei a, khami zawhah khan a va endiktu tiin sawi mai ang, an kal ta a. Endiktu ten certificate pek tlak a ni e an tih khan an training senso tur reimbursement kha Central Ministry ah keini hian kan dilpui ta a. Chutiang chuan, an hnenah a reimbursement sumte lo lutin keinin VTP ho Mizoram pawn ami-te leh Mizoram chhung ami-te hnenah kan lo sem ve leh chhawng thin a. Kan budget sawihona-a ka rawn sawi ang khan Rs. 323 lakh chuang hetiang hian kan semchhuak tawh atunah hian pending bill hi nuai 857 chuang a la awm baw k a, chung chu a lo luh hunah kan nau te lo trained tir tawh tu VDP te hnena pek tur a ni.

Department kutah cheng khatmah lut tur a awm lova. Khatiang hnuaiah khan Mizoram chhunga Vocational Training Provider leh he ram pawna mi engemaw zat te hnuaiah thlalai 3022 lai training kan lo pe tawh a. Amaherawhchu, hmanna ka windup a ka rawn sawi ang khan kan target hi kumin kum liam tur Financial Year chhungah hian 3000 min rawn set sak lain 800 chuang kan tir hman tihah 53 ah an rawn titla hniama, heng buaipuitu NCVT kan han tih ang chi zawng zawng pawhhi Labour & Employment Ministry atangin Ministry of Skill Development & Entrepreneurship lamah an pem ta vek a. Chuvang chuan Skill Development hi a kal buai deuh nuai a. Govt. of India level ah keini pawhin kan tirh lak lawh bak hi chu kan tir ngam ta lo a ni.

Pu Speaker windup pahin ka rawn sawi tawh a. Kan tir tawhte training an pekna man pawh hi engtingge ni ang? tih kan buaipui mek a ni ka tih a kha a ni. Hetia kan tirchhuahte hianin NCVT certificate an dawng ta a. National Council for Vocational Training Certificate. Chu chu khawvel ram tinah pawm vek a ni. Tin, kan agreement-ah hian training an pek a an zirlai trained chhuah za a sawmsarih hi placement an hmuh sak ngei ngei tur a ni tih a ni. Amaherawhchu, vanneihthlak takin kan tirchhuahtawh za a za hi placement an hmuh sak a, an hmuh sakna erawh hi chu India ram chhungah vek a ni. Five Star Hotel ah te, Airlines ah te, kan nula te engemaw zat Airlines ah hian an lut hman a, hetih chhung reilote ah hian member zahawm takin a rawn sawi ah khan Foreign akal pawh an awm a ni. Mahse, Foreign a kal te hi chu, an hna hmuh vawi hnihna a ni tlangpui ta a ni. A check zui kha a har em em mai ta a, chung tak mai a chu. Chennaia Five Star Hotel a zuk thawk a khan engemaw chen a thawh hnuah NCVT Certificate a hum vang tawh avang khan Singapore ah pawh han kal se an lo pawm dawn tih a hriatchian avang khan a ma thuin a kal daih thei ta a. Khatiang chi kha direct in keimahni tirh a ni tawh si lova, anmahnia kal an ni a. Check zui dan kawng i ngaihtuah ang u pawh kan ti thin a, hei hi a vei miten an vei em em a. Kan thalai a hmei a pain ramdangah an tangkhang palh ang tih hlauhna avangin Red Ligh District atanga chhanchhuah ngai te, an awm palh ang tih an

hlahu luat avangin nu leh pa tam tak pawhin an tirh hreh phah a. Chuvangin kan chhanna kha bul deuh chhumbung deuh khan a lang a. Khatia chhan loh theih loh kha a ni ve a.ENZUI hram hram hi chu kan tum ve a, a tirh te pawh kan han intir a. Amaherawh chu, India rama placement an hmuh bak piah lam tawh hi chu, anmahni zalenna a ni tawh si a, a har em em a ni tih kha min lo hriat pui ka'n duh a ni.

Tin, member zahawm tak Pu K.Lalrinthanga zawhna kha chu, (SPEAKER : Hun kha atawp a, chhang zo mai rawh se.)ENZUI zel lem love, IAS te an cadre siam a, India sorkarin a buaipui tih mai baka te hi chu, khawiah nge khata pahnihna kha, pakhatna kha a kal zel tih lam kha chu khawi atang mah khan enzui na a awm em empawh ka hre lem lova.

Tin, Dr. K.Beichhua, member zahawm tak zawh belhnakha, Youth Commission leh Labour & Employment Department inlaichinna tih member zahawm tak Pu K. Sangthuama zawhna pawh kha ani a. Ni e, a hmingin Labour, Employment & Industrial Training Department hi a Nodal Department a ni ve a, Youth Commission-ah hian Youth Commission Chairman, viak tha tak leh nachang hre tak a awm a, hei kan training tirhchhuah tih pawh hi Youth Commission tirhchhuah kan han tih hian keini chuan LE & IT leh Welfare Board leh Youth Commission hi a department lam atang chuan kan thliar hrang tak tak lova, a tul apiangin kan inko khawm a, ka rel tlang a, lam kal te kan intir a. Vawiin ngei pawh hian kan Officer 3 Youth Commission a Under Secretary leh kan Labour Officer Directorate a mi leh Welfare Board a kan Asst. Welfare Officer Kolkatta ah an thlawk thla a ni. A chhan chu NIIS a kan zirlai ten harsatna an neih avangin a vawikhatna a tan zuk thawng phawt rawh u, kan ti a. Welfare board nen, Directorate nen, Youth Commission nen hian a tul hun hunah hian kan inko khawm rup rup mai a. Hei kan Youth Commission Chairman zahawm tak hi a thu hlei thei lova, a mah hrim hrim hi. Ti hianin thil tul leh engemaw nawr tur thar hi a hre reng a. Hei IAS training tih te, Staff Selection Commission Training, Coaching Centre tih te pawh hi a kalna apiangah hian a sawi zel a, ring tak takin kan

hotute hnenah pawh hian, lo kal ve rawh a tih pawh hian ka kal ve zel a, tikhan kan nawr tlang del del thin a ni.

A hmingin LE&IT hi Nodal Department anih ve avangin intihrang miah lovin heng kan mi tirh zawng zawngah pawh hi kan inhriatpui vek a. Youth Commission hian a screening lam te an lo final a, sum tul chu Directorate lamin reimbursement a lo claim pui a, a nih loh leh Welfare Board in phal chinah sum a lo tum a, khati khan annin a mihring an lo interview a, selection an lo ti a. Khatiang khan tun thleng hi chuan thawh hona tha tak neiin kan la kal a ni tih kha Pu Speaker, kan sawifiah nghal ta duah a nih chu.

SPEAKER : Question hun a tawp a, tunah chuan Laying of Paper-ah kan kal anga. Pu K.Sangthuama, Member zahawm tak kan sawm anga, “Action Taken and the Further Recommendation of Public Accounts Committee’ tih kha he House-ah rawn Lay sela, amah ilo sawm ang.

Pu K. SANGTHUAMA : Pu Speaker, ka lawm e. Tunah hian Paper Lay tur leh Presentation of Report pek tur a awm bawk a, hei hi a rualin kan ti mai turah ngai ila.

Pu Speaker, Public Accounts Committee (PAC)-in statement an lay tur hi Animal Husbandry & Veterinary Department chungchanga Session hmasa lama main report leh Action Taken report kan pek tawh kal zel a, Recommendation kan siam te Department-in a bawhzui dan a ni a. Sorkar Department sum lak luh Government Account a chung lut lova, anmahni thu a Department tana lo hman leh chungchang a ni. Hetiang thilah hian Department officer then khat chuan Financial Rules an lo hriat loh thu an sawi fo thin a, hei hi a tha lova, officer chin hi chuan Dan hi an hre tur a ni tih kha statement lay pahin ka sawi tel duh bawk a ni.

Pu Speaker, i phalna leh House zahawm tak remtihain Statement a 'Action taken on the further recommendations and in the twelfth report relating to Public Accounts Committee Animal Husbandry and Veterinary Department' hi he House zahawm tak ah hian ka rawn lay e.

SPEAKER : A copy kha sem ni sela.

Awle, tunah hian report 3 he House-a present tur a awm a, a pathum chuan Pu K.Sangthuama, MLA zahawm takin present sela, i sawm ang.

Pu K. SANGTHUAMA : report pekna hun min siam sak avangin ka lawme.

Pu K.SANGTHUAMA : Pu Speaker, report pekna hun min siam sak avangin ka lawm e. Vawiin hian PAC-in report pek tur pahnih kan nei a. Chungte chu : 1. - Fifteenth PAC Report – hei hi C&AG Report 2011-2012-a Environment & Forest Department chungchang a ni a. Khawzawl Wildlife Division office leh quarter sak chungchang a ni. He thil hi sum lak chhuah leh kawl chungchanga sorkar dan dinglai financial rules zawm loh chungchang leh chumi sawi mam na tura dawt phuah chawp ngai leh thil dang dang a lo lang a. Kum dangah hetiang hi a thlen tawh loh nan department tin te hian kan financial rules te hi dik takin zawm thin sela a tha in kan ring.

2. Sixteenth PAC Report – hei pawh hi C&AG Report 2010-2011- a PHE Department in sum a hman dan leh enkawl dana an fimkhur tawh loh na chungchang a ni a. Department officer ten an power bak sum hman an duh avanga sanction order an split vak vak thin te leh emergency thila sum an lo hmanral tawh na expo-facto tal a sorkar approval lak an mangnghilh leh thin hi a tha lo va. Heti lamah hian department tin te fimkhur rawh se, tih hi kan duh a ni.

Awle, Pu Speaker, i phalna leh he House zahawm tak remtihna in (i) Fifteenth Report on the Report of C&AG of India for the year 2011-2012 relating to Environment & Forests Department leh (ii) Sixteenth Report on the Report of C&AG of India for the year 2010-2011 relating to Public Health Engineering Department te hi he House zahawm takah hian ka rawn present e, ka lawm e.

SPEAKER : A present a, report kha sem ni sela. Chair atang khan pathum ka lo ti palh a, kan lo ziah sual palh vang a ni a. Report pathum ni lovin pahnih a ni zawk e. A copy kha sem rawh ule.

Awle, report dang present turin MLA zahawm tak Pu Lalrinliana Sailo sawm leh ang u.

Pu LALRINLIANA SAILO : Pu Speaker, ka lawm e. Report tur hi Industry Department hnuaia BDA kan tih, Bamboo Development Agency hmalakna chungchang a ni a. Tin, kan hriat angin Estimates Committee hi Public Accounts Committee nen inan lohna a awm a, kan hre vek a. Plan a awm a, pawisa a awm a, estimates a awm a. Chumi ang chuan sorkar infrastructure Assets pawimawh hi thawh a ni em tih hi an hna a ni a. Tin, fault finding ni lovin remedial measures hi committee rilru a awm a ni zawk a. Chutiang chuan committee-in ngun deuhin a ngaihtuah a, BDA chungchang hian chanchinbuah pawh hmun tam tak a luah tawh a ni. Tin, he House-ah ngei pawh vawi tam tak sawi tawh thin a ni a. Chu chu zir chian tulin committee-in a hria a. Chu chu kan han zir ta a, kum chherchhuan deuh te pawh a ni a. Vaibelchhe 35 leh nuai 3 hmanna ni Industries Department in Information min rawn pek uluk takin kan zir a. A hmunah te, hmun hrang hrangah, kilkhawr deuhah te kan kal kual a. Tin, kan member zahawm tak tak te hi Dr.Ngurdingliana te, Pu Vanlalzawma te, Pu T.Sangkunga, Pu R.Vanlalvena leh Pi Vanlalawmpuii Chawngthu te an ni a.

Pu Speaker, report pek hma in kan Assembly a thawktute hi an hah hle mai tih min hriatchhuah tir a, heng kan han thawh naah hian, an rim tak meuh meuh a ni. Tin, Mizoram Department hi an hrechiang hle mai tih te pawh min hmuhchhuah tir a. Kan hriat tlan mah ni se hei Committee peng hrang hrang hi 17 a awm a. Department hrang hrang hi, committee-in kan duh duh kan select kha an thawk ta thin a ni a. Department hrang hrang pawh an hneh hle in ka hria a, an fakawm tak meuh meuh in ka hria. Committee in tih tura a tih te prompt takin an ti zat zat thei a, a lawmawm in ka hria a.

Tichuan, tuna kan sawi lan duh pakhat chauh chu BDA hnuaia a body hi tunah hian tih danglam te kan han rawt a recommendation-ah chuan. A chhan chu a pawimawh si a, central atangin pawisa te a lokal thin a. Chief Secretary hi Chairman tura tih thin a ni a. A tha tho na chungin Chief Secretary hi kan hriat angin Mizoramah an pawimawh si a, all roada lead to Rome tih ang deuhhlekh khan, thil zawng mai mai hi CS-ah hian a lut a ni a. An meeting thin hian duh angin subject matters-ah an chiang lo palh ang tih te a hlauhawm thin bakah policy matter a ni a. Heng thil, policy matter hi chu MLA te ngei hian formulate tihna thinlung committee in a nei a. Chairman atan chuan MLA ni ngei se tihna thinlung te pawh a nei a. Tin, cheng vaibelchhe 35 leh nuai 3 sen tawh na a a production awm lo te, thil siamchhuah mumal awm lo te, employment a generate lo te hi committee chuan pawl a ti tak meuh meuh a, chu chu kan sawi duh a ni a.

Tin, chulo lehah chuan Entrepreneur, Bamboo Chipping Mills leh Unit hi mi pakhua lai hnenah cheng nuai tam tak senga lo din tir tawh a ni a. Chung te chu sick unit an ni vek mai a tun dinhmunah hian. Chu chu pawisa tam tak lo sen tawhna ni bawksih kha sick unit a ni a, a hmun a kan kal in anmahni dinhmun atang chuan han din chhoh na tur leh in siam that chhoh na tur kha an nei ta lo hrim hrim a. A chhan bulpui ber pahnih a awm a – pakhatna ah chuan vanduaithlak takin an khawl sorkarin a supply kha duhthu a lo sam lo hlauh mai a. A hmunah te an zuk kal ve na in leh helai hmunah pawh an rawn install lain darkar khat, darkar hnih te chu khawl chu an nung ve a, an vir ve a. Mahse khawl kha a nung chhunzawm thei ta lo va. A siamtu company kha an zuk contact

thei tawh bawk si lo va. A hmunah zu trace (um) tur an awm tawh bawk si lo va. Tichuan, buai takin tunah hian kan thangtharte leh thalaite hna thawk tura, employment generate tur pawh khan harsatna lianpui an tawk ta a. Chumi thu chu a ni a, sorkar hian eng emaw tih sak se.

Pu LALRINLIANA SAILO : Tin, BDA hi a hmain BAFFACOS sum atang te, ASIDE Scheme kan tih central atanga lo kal, Commerce Industry Department atanga lo kal te a ni a, tin, NEC atang te pawhin a ni bawk a. Khangte kha a then chu de-link a lo nih tawh bawk avang leh BAFFACOS pawh a lo ral tawh a, khami a nih avang khan harsatna lianpui an tawk ta a ni, heng bamboo chipping mill ho hian. electric current man te pawh tam tak tak chawi reng siin harsatna lian tak an tawk a. Hei hi sorkar hian hetiang lo deuh hian an loan, grant-in-aid totally-a rawn sanction, pawisa rawn pek si kha loan component-in an lo pe leh bawk si te leh a purpose, specific purpose-a rawn kala kha a tawp tawh bawk si nen, heng Loan te pawh hi waive sak se tih te pawh recommendation kan siam a ni. Tin, Sorkar Technical Support pe in, heng sick unit te hi tihnun sak leh se tih hi Committee duh dan a ni a. Chutiang chuan kan member ten hah takin an thawk a ni.

Pu Speaker, i remtihna leh Committee-in min authorize angin Fifth Report of Committee on Estimates relating to Bamboo Development Agency under Industries Department chu House-ah ka present e. Ka lawm e.

SPEAKER : Awle, a copy kha sem ni se.

Awle, tunah hian Report pahnih dang present turin MLA zahawm tak Pu Nihar Kanti Chakma sawm ila.

Pu NIHAR KANTI CHAKMA : Pu Speaker, report pekna hun min siamsak avangin ka lawm e. Pu Speaker, vawiina ka report present tur chu Zoram Industrial

Development Corporation Limited(ZIDCO) chungchang C&AG Report 2007-2008 leh 2010-2011, Industries Department hnuai ami a ni a. A bik takin C&AG Report 2010-2011 ah hian Corporation hrang hrangte pawh highlight a ni a. Mahse, sorkarin policy thar a siamsak leh Corporation hrang hrangte tihtawp an tum avangin Committee chuan ZIDCO chauh report siam mai tha an ti a. Chuvangchuan kan report chhung thu ah pawh hian public sector hrang hrang pawh lang tho mahse ZIDCO bik hi report siam a ni.

Pu Speaker, kan member zahawm tak takte pawh sawilang ta ila, honourable member Pu JH Rothuama, honourable member Pu PC Zoram Sangliana, honourable member Pu John Siamkunga, honourable member Dr, K. Beichhua leh honourable member Er. Lalrinawma.

Awle, Pu Speaker, i phalna leh he House zahawm tak remtihna, as authorized by the committee members -

- i) Second Report on the Report of C&AG of India for the year 2007-2008 relating to Zoram Industrial Development Corporation Limited(ZIDCO) under Industries Department.
- ii) Third Report on the Report of C&AG of India for the year 2010-2011 relating to Zoram Industrial Development Corporation Limited(ZIDCO) under Industries Department hi he House zahawm takah hian ka rawn present e. Ka lawm e.

SPEAKER : Awle, a copy kha sem leh ni se.

Awle, tunah chuan financial business-ah kan kal thei tawh a. Vawiin hi kan Minister zahawm takte pahnih Pu R. Lalzirliana leh Pu H. Rohluna te Demand hrang hrang sawihona ni a ni a. Kan tih tawh thin angin an pahnih ta hi kan lakawp leh mai ang a, nidanga in remtih tawhna kha ka ring mai ang a, House remtihna lak hran a ngai tawhin ka ring lova.

Tunah hian kan Minister zahawm tak Pu R. Lalzirliana, a Demand No. 7, 16, 31 leh 38-na te House-ah rawn submit sela, i lo sawm tawh ang u.

Pu R. LALZIRLIANA, MINISTER : Mister Speaker Sir, on the recommendation of the Governor of Mizoram and with your permission Sir, I move the Demand No. 7, 16, 31 and 38 for ` 10,81,00,59,000 only for meeting expenses during 2016-2017 in respect of the following Departments.

Demand No. 7 : Excise & Narcotics	-	₹ 29,55,48,000
Demand No. 16 : Home(including Prison & Sainik)	-	₹5,80,44,13,000
Demand No. 31 : Agriculture	-	₹ 1,13,00,62,000
Demand No. 38 : Rural Development	-	₹ 3,58,00,36,000
TOTAL	-	₹ 10,81,00,59,000

Thank you.

SPEAKER : Awle, Pu H. Rohluna sawm ve leh ila, a Department Demand hrang hrang ama hnuaia mi No. 20, 40 leh 44-na te he House-ah hian rawn submit sela, i sawm tawh ang.

Pu H. ROHLUNA, MINISTER : Mister Speaker Sir, on the recommendation of the Governor of Mizoram and with your permission Sir, I move the Demand No. 20, 40 and 44 for ` 10,33,12,17,000 only for meeting expenses during 2016-2017 in respect of the following Departments.

Demand No. 20 : School Education Department	-	₹9,65,58,93,000
Demand No. 40 : Industries Department	-	₹62,85,87,000
Demand No. 44 : Trade & Commerce Department	-	₹4,67,37,000
TOTAL	-	₹ 10,33,12,17,000 only.

Thank you, sir.

SPEAKER : Awle, kan Minister zahawm takte pahnih, Pu R.Lalzirliana leh Pu H. Rohluna ten an department hrang hranga 2016-2017 chhunga pawisa hman tur he House-ah an Demand hrang hrang te an rawn present ta a, sawiho kan tan dawn a ni. Sawi tawh thin angin a hmalam hi chuh ila, a hnunglam hi chuh lo ila a tha ang e. Sawi tan tawh mai ang. Tunge hmasa ber ang? Pu Hmingdailova Khiangte.

Pu HMINGDAILOVA KHIANGTE : Pu Speaker, a sawi hmasaah ka'n tang ang e. A hmasa berin, kan Minister zahawm tak pahnihte Demand hi sawi chakawm Department an kawl hnem a amaherawhchu, hunin a daih dawn lova. Rilrua min nawrtu deuh deuh Department te pawh kan thlang lo thei lovang a.

A hmasa berin Demand No.16-na, Home (including Prison & Sainik) hi tawi fel deuhin sawi tum ila. Kan Chief Minister zahawm tak leh House Leader ni bawh kaihhruaina hnuaiyah kan Home Minister zahawm tak leh chak tak, huaisen tak, Pu R.Lalzirliana hian thiam leh hneh takin Home Department a enkawl mek a. Law & Order boruak la muanawm ber tih ngam hial hnuaiyah hian thlamuang takin mipui min awm tir hi a fakawm tak meuh a ni tih hi Pu Speaker ka'n tlangaupui duh a ni.

Home Department lamah khan prison –te, police lam te sawi tur a tam mai a. (SPEAKER : Ngawi rawh, khawngaihni kan han inthlak lawk ang e). (DY. SPEAKER : Sawi zawm rawh le). Pu Dy. Speaker, khalam kha chu kan hotute sawiah kheh ila, rilruah lian hle mahse. Sainik lamah hian kai phawt ila. Ngun taka ngaihtuah chuan, Mizoram Congress sorkar chauh hian Sainik lam hi a ngaihtuah emaw tih mai turin Sainik School saklai chak takin Home Minister hian a kalpui mek a. Nakum 2017-ah hian class tan beisei theih khawp a min kalpui chak sak avang hian lawmawm ka ti a, a hnenah hian Pu Dy.Speaker, lawmthu ka sawi duh a ni.

Tin, ka'n zawm leh zauh bawh ang a. Kawnpui Police Station khu kawngkamah a awm a, a hre lawk tan lo chuan han kal hian Police Station a awm a ni tih

hriat a har khawp mai a. Kan Home Minister zahawm tak te an buai a, Police Station awmna zawng zawng an kan hman lo tih a chiang a. Chuvang chuan, a fencing mawi taka, a compound vel khu han hung sak atan a itawm khawp mai tih hi vawiinah hian ka'n sawi duh bawk a ni.

Tin, Agriculture Department Demand No.31-na. Kan ram hi agricultural product, a bik takin rice, chaw bera la hmang a khawsa deuh vek kan nih avangin Agriculture Department hi an pawimawh reng zawng a la ni a. Buh leh bal, thlai leh thei thatna hmun luipui ruamte, khua atanga hla deuh hlek ram tha te kan bawh lo thei lova, chungte chu a lo hlat deuh avangin link road tha tak tak neih a ngai a. Niminah pawh khan, zawhna leh chhanna ah pawh khan link road, km 200 zet mai siam zawh tawh a ni tih kha kan ngaithla a. Tunah pawh hian chung ram tha te a kan buh thar, kan thlai thar, kan thei thar phur haw tur chuan link road kan mamawh a. Link road hian khaw tam tak a kan ram te hi hawlh tlang seng sung mai se la chuan vawiinah hian kan thlai tharte hi awlsam takin in lamah kan phur haw thei ang tih hretu vek kan ni chungin Pu Dy.Speaker, ka'n sawi chhuak ve duh a ni.

Tin, Demand No.38-na, Rural Development Department hi Mizoram mipuiin kan chhawr nasa khawp mai a. UPA Zoram kaihhruai sorkar hotute a bik takin Pi Sonia Gandhi'n ngaihtuahna ril tak, tha tak mai, mipui tan a tha, ni 100 chhung inhlawhfakna MNREGA a'n ngaihtuah chhuak te hi chhungkua a sorkar hnathawk awm lohna te tan chuan a ropuiin a tangkai lehzual a ni tih hretute kan ni a. Vawiinah, Mizoramah hian hei hi kan eibel ber emaw kan ti lek lek zawk hi a fuh lo mang e aw te ka ti. Hei hi chu a chawfun tur a ni a, hemi hmang hian hna kan thawk chiam chiam turah ka'n ngai deuh a. Engpawhnisela, mi chawnghei tur erawh chu a nghei loh tir a ni tih a chiang khawp mai, a ropui hle a ni.

Tin, Demand No.38-na zelah Rural Department hnuaiah khan, BADP kaltlanga international border hnaih a ram kilkhawr a awm ten namen lovin an lo chhawr

a. Harsatna tam tak, development chi hrang hrang, hall sak emaw, kawng emaw kawng tinrengah an hmang tangkai hi lawmawm ka ti a. Kan Minister zahawm tak hian heng ramri hrul a khaw hla tak tak te hi tha tak leh lungawi taka a enkawl thiam avang hian fakawm ka ti bawka a ni.

Tin, sawi hmaih hauh loh tur chu he Department hnuaiah hian khaw tinin kan thatpui Pu Dy.Speaker, hall te an sak thinna kha tunlai hian Social Education hnuaiah khan fund hi a awm ta mang lo emaw ni. Kan Minister zahawm tak hian he Social Education Department ti mai ang, a wing ah hian hall sakna ang tur chi kharawn siam leh se la kan lawm hlein ka ring a, ka'n request bawka a ni Pu Dy.Speaker.

Chulo lehah chuan, vanduaina rapthlak tak te a thleng thin a, in kang te. Hengah pawh hian sum awmlo chung chungin kan Minister zahawm tak hian a tanpuina tur rangva te a lo dah khawl hram hram a. Rangva te min han pek ni hian keini chauh kan lawm lova, in kang chhungte leh thenawmte, khua mi zawng zawngte an lawm thin a ni tih hretute kan nih hi sawi a chakawm vein ka hria a, Pu Dy.Speaker.

Tin, Demand No.20-naah lut chho ila, School Education Department-ah hian sawi tur a tam khawp mai a. Kan Minister zahawm tak leh a Parliament Secretary zahawm tak leh an officer-te hian sikul harsatnate hriain theih tawp an chhuah nasa tih a hmutu ni ve in ka inhria a. Kan sawi seng lovang.

Pu HMINGDAILOVA KHIANGTE : Tun kum kalta ah te pawh khan zirtirtu indaih lohna lamah theihtawp an chhuah a, Primary School teacher 60 an la a, Middle School teacher pheichu 136 zet an la a. Tin, quality education lam an ngaihtuah avangin, in-service training Primary School teacher 59, Middle School zirtirtu 46 leh Hindi teacher thlengin 57 in training an nei mek a. Tin, B.Ed class lam hi ka'n sawi zauh duh a, an ngaihven avangin mi tam takin he class hi an kal bawka a ni.

Chutih lai chuan demand zawng zawng a pawimawh ber emaw chu aw tih theih a ni a, Education Department hi. Chuvang tak chuan Human Resources Development Department pawh an ti bawk a. Han sawi uar deuh phei ila chuan sawrkar department Pu Deputy Speaker, Department zawng zawng hian an hna hi thawk tha lo ta se, fail ta sela, chutih lai chuan Human Resouces Development an nihna angin, kan Education Department hian an duty hi fail ve lo ta sela, mithiam, mifel an thar chhuak zel anga, chung chuan depts., mahni duty fail zawng zawngte pawh kha a chhanchhuak leh thei mai awm mange, tih te ka ngaihtuah a. Chutiang chuan ka lo sawi ve thin a ni, Pu Deputy Speaker.

Tin, chutih lai chuan, Pu Deputy Speaker, tun dinhmunah hian kan Zoram matric result han thlir let ila, last 4-5 years kha, hetiang department dang che sual leh tiful lo te pawh pui tur khawp a Department tangkai an ni kan tih lai hian, matric result tha lo tak hian ngaihtuahna a tibuai khawp mai a. 2010 khan Mizoram pumpuiyah High School 8 result a nil a, tah chuan Govt. High School 1 a awm a. 2011 khan High School 29 result a nil thak a, Pu Deputy Speaker, chutah chuan Govt. High School 11 a tel a ni. 2012 record kha ka hmu lo hlauh a. 2013-ah khan an vaiin, school 18-in nil result an nei a. 2014-ah 8, 2015-ah khan school 15 pass result nil a ni, tah chuan Govt. High School 6 a ni a. A dinhmun han ngaihtuah hian kan Education Minister zahawmtak leh a officer-ho hi an buai viauin ka ring a. A tihthat dan tur hi an rilruah an ngaihtuah reng ka ring a. Chutih lai chuan, kei ka ngaihawh ve zawng tak a nih avangin, Pu Deputy Speaker, ka'n tilang ve a ni. (DEPUTY SPEAKER : I hun i hmang zo) Minute 1 lawk, khawngaihin.

Chuta ka'n sawi duh leh chu, tunah hian B.Ed tel lo chuan High School zirtirtu nih hi a theihloh tluk a nih lain, kan block 1, ti mai ang, President chuan, 'Ka pu, kan veng a Govt. High School zirtirtute hi an hming tawp lam chu a bawk nasa khawp mai a, MA-te, M.Ed-te hi a awm teuh mai a, an result erawh chu a chhe em em si a. Mahse, kawmchhakah khian private school a awm a, an result hi a tha em em a.

Distinction 4-5 kumtin an awm a, 3rd Division-ah pawh pass an awm ngai lo.” a tih kha ka rilruah hian a awm a, ka sawi nasa thin a, school dang dangah pawh. B.Ed nih kha a pawimawh hle nachungin, MA nih kha a pawimawh hle nachungin, kan educational qualification san vang ringawt hian kan teaching hi a tha chuang lo tih a hriat a. Chuvang chuan, zirtirtute inpekna hi a pawimawh tak meuh a ni tih kha, Pu Deputy Speaker, ka'n sawi lang ve duh a. Chumi kawngah chuan kan Minister zahawmtak leh officer-hote hian kei a hriat ai chuan an hre kim vekin ka ring a.

Engpawhnise, vawiinah hian kan demand la sawi kim loh demand no. 16-te,7-te,31-te,38-te leh demand no. 20, 40, 44-te hi ka support vek a, he House zahawmtak hian pass turin ka'n ngenpui bawk a ni e. Pu Deputy Speaker, hun min pek belh avangin ka lawm e.

DEPUTY SPEAKER : Pu Lalrobiaka.

Pu LALROBIAKA : Pu Deputy Speaker, ka lawm e. Vawiinah hian sawi tur a tam khawpin ka hria a, amaherawhchu, tawi te te in, sawikim deuh vek ka duh avangin ka'n ti zung zung mai ang a.

A hmasa berin kan Minister zahawm tak, Pu R. Lalzirliana demand No.7-na kha ka'n sawi hmasa ang a. Excise & Narcotics Department hi Department upa lo tak niin an thang chak hle mai a, a lawmawm ka ti a. Tin, anmahni avangin dan leh thupek kenkawnna kawngah pawh nasa takin hma kan sawn a ni tih kan hriain ka ring a. Chutih rual chuan, MLPC Act kan han neih hnu hian, nasa takin tax lamahte pawh hianin hma kan sawn chhova. Kum kaltaah khan crore 35.67 beisei a nih laiin, crore 41.96 lai an han hmuchhuak thei a. An lawmpuiawm hle in ka hria a, he House-ah hian ka'n sawi lang duh hrim hrim a. Tin, chumai piah lamah chuan 2016-17 ah hianin target vaibelchhia 43.08 a han nei leh a, hei pawh hi nasa takin an khum leh a beiseiawm in ka'n hria a.

Heng avangte hian, an thawhrimnate avangin, sorkar leh Mizoram tan nasa takin hna an thawk a ni tih hi anmahni inhre tharin, an fakawm ka ti a, ka'n fak duh a.

Chutih rual erawh chuan, hetiang riang ruang Department lian leh Department hmasawn si, kuminah hian Work Programme-ah an lang ta miah lo mai hi, engnge a chhan sawi thiam har ka ti a. Sawitur ngah ber awm takah ka'n ngaih rualin an nei tlat lo mai hi a pawh hle in ka hria a. Kum lo la awm turah erawh chuan hetiang lovin, anmahni inphochhuahna a nih piah lamah works tam tak, an tih tur, an hmachhawpte rawn ziaak lang ve thei tawh se tih kha ka'n sawi duh a ni.

Home chungchang hi, demand No.16-ah hian ka'n kal leh mai ang a, a bikin Police-ah hian sawi duh ka nei a. Vawiinah kan police-te modernization chungchangah nasa takin thuam thar an ni a. America ram chauhin an hmang ang tih kan rin chi, ralthuam tha tak tak mai, sniper rifle tha tak tak te; tin, a ken chi, Glock pistol tha tak tak, ram hausa kan tih te pawh in an hman phak loh hial khawpa handle nuam, a kah pawh accurate tak ni si, tha tak mai an han dawng thei hi a hnathawktu tan pawh encouragement nasa tak a nih ka ring a. Sorkar hmasate kan thlir chuan modernization ni si, an mamawh nge mamawh loh pawh ngaihtuah lem lova, kel pal han lei tak mai mai te, ek in kal thei lei tak mai mai te. Chumai piah lamah, mawza man to tih te pawh kha thil rapthlak a ni. Chu aia la rapthlak mah, vawiinah hian ka'n sawi duh chu, mipui an thlamuang a, kohhran an thlamuang a; tin, NGO kan tih te nen thawhhona a tha a hel te pawh kan ramah hian an ti em em a, engemaw harsatna rawn siamte chu border pel rak thlengin umzui an ni thin a ni. Heng avangte hian kan Minister chak tak hi a fakawm ka ti a, a huaisenna te a fak tlak in ka hria a. Tin, chumai nilo in, term hmasa party dang an sorkar lai khan he House ah ngei hian, khatih laia Chief Minister khan a sawi ka mitthla ah ka la hmu reng a. Chu chu ka discretionary fund te pawh hi hel ho in min eizawh sak a tih te pawh kha tun thleng hian Mizo mipuite thinlungah hian a la thi in ka ring lo. Amaherawhchu, vawiin ah hian kan Chief Minister zahawm tak leh kan ram hruaitu, kan House

Leader hian a discretionary fund hel kut ah a pe ngai lo a, a mamawhtute kut ah dik takin a pe zawk a ni. Hengte hi fak tlak, chawimawi tlak an ni a ni tih hi kan sawi duh a.

Vawiinah hian sawi tur a tam khawp mai , Home ah hian, tin, Prison-ah te pawh hmun hrang hrangah, District hrang hrang ah Jail tha zawk te kan nei chho zel a, a then sak lai mek te leh la luah loh te awm bawk mahse, tam tak hmasawna kan nei a ni.

Tin, Sainik-ah te pawh kan member pui khan a rawn sawi tawh a, school tha tak kan han nei tur te hi a lawmawm hle in ka hria a. Tin, hemi kan sawi rual rual hian zalenna leh muanna a awm loh chuan sawtna/hmasawna a awm thei lo. Vawiinni ah kan hmasawna tam tak te, a bik takin Rail kawng lian chi a lo thleng te; tin, kan hriat angin Lengpui Airport-ah chuan kan Chief Minister hmalakna nasatak avangin Aizawl atanga Delhi kan han direct ve thei tawh tur hi a lawmawm hle mai. Airport siam lai khan kan hria a, Choak bak a tum lovang han tih te kha, vawiin ah chuan a nuihzatthlak hle a ni. Heng avanga kan hotute in pekna leh an thawhhahna Mizo mipuite hian kan chhawr in, mite ber thlengin vawiinah chuan kan nat emaw, engemaw harsatna kan tawh pawh in awlsam-te in, a darkar bi lek ah Aizawl kan thleng a, Delhi kan thleng a, chutiang chuan kan kal zung zung thei ta a. Remna leh Muanna a awm avang a ni kan ti lo thei lo a ni. Hemi atana Home Department-in zalenna, remna leh muanna, boruak tha tak mai a maintain chho thei zel hi a lawmawm hle in ka hria a. A Demand neitu a bik takin kan Home Minister hi a fak tlak a ni, a chawimawi tlak a ni tih hi kan sawi ve duh a ni.

Demand No. 31-na Agriculture Department-ah hian hma an sawn chak khawp mai a. A bik taka kan sawilan duh chu Oil Palm chungchangah hian a bik takin kan bial lamah te an uar khawp mai a. Amaherawhchu, an harsatna

chu, a rate a lo sang vak si lova, a phurchhuahna, hmun thenkhat ah chuan a phurhchhuah man leh a rate a in zat reng mai a, chuvangin hralh ai chuan hralh loh kha ngai awh kha a hlawk zawk e an ti a, an rah tir mai mai a. Hei hi tuna link road kan tih ah te hian bial lamah te nasa zawk in tan han la se a va duhawm ve tih kha ka'n sawi duh a, a boruak in a ngeih a. Tin, hetah hian potential tam tak a awm a ni tih kan sawi duh a ni.

Demand No.38 Rural Development-ah hian ka sawi leh duh chu, nichina kan member puiin a sawi ang khan khaw tin ah, khua kan thahnem a, keini bial-ah hian khaw 32 lai mai khaw pangngai kan nei a, sub-village nen pheih chuan 34 kan awm a ni. Chung khua-ah chuan Community Hall kan duh vek mai si a, a buaithlak khawp mai a, Social Education atang hian a lo awm tawh silo a, a awm theih dan hi kan Minister khan min zawn pui sela a va tha awm em kan ti a. Kan member dangte pawhin an mamawh khawp in ka ring a, khawtinah kan mamawh a inang vek a, khaw te a lian in. Khaw lian in an duh lian deuh a ni mai a, khaw te in an mamawh te deuh a ni mai a, khalai kha kan sawi lang duh a. Home Department-ah khan kan sawi hmaih han sawi nawn leh ka duh chu a thunawn ang deuh in, Assembly ah hian ka sawi deuh ziah a. A bik takin Kanghmun tlangdungah hian harsatna eng enge maw kan tawk ve thin a, amaherawhchu, min bialtu chu West Phaileng a ni si a, West Phaileng atangin incident a lo awm a, han tlan tur chuan a harsa si a, chutihruai chuan Kulikawn-ah te an han report a, Kulikawn Out-Post in kan bial a ni lo an lo ti tum hrang baw si a, a buaithlak duh khawp mai.

Term hmasa-ah khan min assure tawh a, hei hi min lo hriat nawn sak sela, chak takin, Kanghmun-ah pheih hi chuan, khawtlangin hmun tha tak mai, anmahni reserve, anmahni pawhin an in bun phalloh-na hmun tha an pe fel tawh a. Chungah te chuan hma min lak sak se tih ka'n sawi duh a. Tin, chutihruai chuan Phuldungsei-ah kan I.R te an awm ve a, chu chu kum 5 dawn kal ta ah

khan an barrack/Quarter a chung thli na takin a la a, chungte pawh chu sawi lan a ni tawh a. Khang kha tunthlengin kan la tihsak thei lova, an khawngaih thlak khawp mai, khunglaia awmte khu. Kan Minister zahawmtak hian min lo hriat sak se tih ka'n sawi duh a ni.

Kan Minister zahawm tak Pu H. Rohluna Department, Demand 20-na School Education ah hian, an achievement hi a tha khawp in ka hria a, Primary School zirtirtu lak thar te, Middle School zirtirtu regular-a 136 lak te, Middle School-ah 76 lai mai an lak te leh Senior Grade-a han dah chhoh te, kan sawi seng lovang, an achievement hi a ropui hle in ka hria a. Tunhma khan kan sawi thin angin school 337 sum leh pai in a support chuang lova, election tlin duh avanga lo dah tawp ang chi te, khatiang chi nilo in, dan ang takin, a process pangngai angin, dik takin hetiang harsatna tello a an han dah thei hi an fakawm ka ti a.

Tin, vawiinah hian kan hriatreg a pawimawh chu Human Resource Development hi keini industry neilo tan chuan kan industry lian tak a ni lo thei lova. Vawiinah hian an pawimawh zia te kan hriat a tha in ka hria a. Tin, sawi hmaih hauh lo tur keini state in kan au ei zo ang em tih pawh ngaihtuahna a la awm ngai lo, India ram mai nilo, khawvel ah pawh mi ropui Ratan Tata te an han au-eih thei ringawt pawh hi a lawmawm ka ti a. Heng hrang hrang avang hian school hrang hrangah Sports Academy te kan han din chho thei dawn a Tata te avangin, chutiangte chu kan sawi duh a.

Tin, Pu Deputy Speaker, Industries Department ah hian tawi te in, Industry hi a pawimawh a, ka'n sawi zauh duh chu, kum dangah te khan industry-ah ka biala kuthnathawktute chhawmdawlina turin khawl te, thir denna hmanrua te kan sem thin a. Khua in kan mamawh em em a, kuthnathawktute kan

ni a, kan chem lo tahhriamna tur te, lo den thatna tur te kan mamawh thin a. Chungte chu Department hian min pe leh thei dawn lawm ni tih ka zawt duh a.

Tin, Demand No. 44-na tawite in Pu Dy. Speaker, Trade & Commerce hi hma an la nasa hle a. Foreign Trade kan tih chhoh dawn ah pheih chuan anni hi Department lian leh la thang tur te an ni a. A sum lam hi a tam viau lo nachungin an hnathawh a ropui ka ti a. Chutih rual chuan keini bial lam, Marpara-ah te pawh ngaihtuahna neiin hma han la sela, a ram angin kan chhawr tangkai hle ang. Chumi bakah chuan Mamit District ang pawh in kan chhawr tangkai tur a la ni dawn a ni tih hi kan sawi duh ani e. Pu Dy. Speaker, hun thatak min pek avangin ka lawm a. Minister 2-te Demand hi thinlung takin ka support a ni e. Ka lawm e.

DEPUTY SPEAKER : Pi Vanlalawmpuii Chawngthu

PI VANLALAWMPUII CHAWNGTHU : Pu Deputy Speaker, ka lawm e. Demand No. 7-na ah kal nghal mai ila. Excise & Narcotics Department-ah hian ka sawi ve duh chu Excise sum hi tun tum kan budget ah hian a that deuh bawh avangin Excise police te hi lak belh theih ni se tih zawng kha ka'n sawi duh a. A dawt leh ah chuan Demand No. 16-na ah khan hmanni lawkah kan hria a, kan Chief Minister zahawm takin Police headquarter building lungphum te an phum kha a ropui a. Hun engemaw chen Police headquarters in building tha nei lova sawtianga an awm hnu in tun sorkar -ah hetiang building tha kan han nei mai tur te hi a lawmawm a a fakawm hle a ni. Tin, nichin ah ka hma a mi MLA zahawm tak Pu V.L. Robiaka'n a sawi ang khan Congress kaihhruai sorkar ah chuan mawza manto leh kelpal leh ekin kal thei tih vel mai mai a ni ve lova, tun ministry-ah chuan ralthuam tha zawk te lei an ni ta te, a rawn sawi ang khan silai tha tak tak te, khawvel ah pawh silai tha kan han nei ve tawh te hi a lawmawm a. Tin, chumi a nih rual chuan, sawi chi a ni nge ka hre lo a, kan

PSO te hi silai tha min pe ve tur in kan Home Minister zahawm tak kha ka'n ngen ve duh a. Keini ang, kah hrep tuar tawh hnu tan pheih chuan ri ve kheuh kheuh ringawt kha chu thihna kotlanga din chuan hlauhawm ve tak a nia. Chuvang chuan tlema silai tha ve deuhlek hi min pek sak theih chuan ka lawm hle ang.

Tun Congress sorkar a din hma khan kan hre thin a hel leh hel an in that a Aizawl khawpui ngei ah. Tin, ka hma a MLA zahawm tak Pu V.L Robiaka bial ah ngei pawh nu pakhat tual thihna te pawh kha kan la hre reng in ka ring a. Chutiang thil chu, sawi tur tam tak a awm ang, chutiang a nih tak ah chuan tunah kan Home Minister chak tak zarah hel te pawh an tawm im ta a. Ka hma ami in a rawn sawi ang khan border pel rak thlenga um an han ni zel mai te hi a lawmawm takzet a. Tun sorkar a Home Department hnathawh that zia a ti lang hle in ka hre bawk a ni.

Tin, kan in fak zo chauh rual in Hrangturzo bial ah khian North Vanlaiphai-ah Police Station kan nei a, East Lungdar emaw, Biate emaw, Sailulak-ah emaw khian police outpost min pe turin hemi House kaltlang hian ka dil nghal bawk e.

Tin, Traffic Police te nikum ah khan ka sawi tawh a, an fakawm ka ti hle a. A bik takin Aizawl ah hian kan hmuh tam an ni a, an smart a, an felfai bawk a ni, Midang pawhin in tih ve ka ring kan Traffic Police te smart zia hi. Tunhma te kha chuan form ha chung a meizial han zu mai mai te, zu rim nam chung a duty tih ang te pawh kha kan hmu thin a. Mahse tun ministry-ah hetiang hmuh tur an han awm lo ringawt pawh hi Department enkawltu te leh Minister chung ah hian lawmthu sawi kan ba in ka hre bawk a ni.

A dawt leh ah chuan Demand No. 31- na Agriculture Deptt. kha sawi leh ila. Congress kaihhruai sorkar a din hma hi a tehkhin loh theih thin lova, sawi a ni fo tawh a, mitam takin kum 2008 hmalam sorkar-ah kha chuan Aizawl khawpui ah ngei kuthnathawktu ten kawng kan zawh a lungawi loh na an lantir a ni. Congress kaihhruai ministry-ah chuan kuthnathawktuten sorkar-ah pawh lawmthu sawina te thu chhuah an nei a ni kan tih tawh thin kha. Tin, Congress kaihhruai sorkar in kuthnathawktute a ngai pawimawh hle a, Kuthnathawktute Ni hial a siam a, January ni 14-ah khan kan hmang thin a nih kha. Heng te hi tun Congress kaihhruai Sorkar hian kuthnathawktute a ngaih pawimawh zia a tih lanna a ni a. Tin, chumi a nih rual chuan NLUP kaltlang in Agriculture Department hmasawna tam tak kan hmu a ni. Mi tam takin sawisel thin mahsela NLUP neih hnu ah kuthnathawktute thar chhuah a tlem ti thin mahse kha kha a ni ringawt lo. Kan hriat tur chu NLUP-ah hian kan trade thlan a inang lo a, tlangram loneih hi tam tak in bansanin auto-rickshaw te an nei a, thingzai khawl te, dawr te an siam a ni. Heng zawng zawng avang hian tlangram lo neih hi a tlem phah bawk a ni tih kha ka'n sawi lang ve duh bawk a.

Tin, ram lama hnathawhna hmanrua ti mai ang, kan bungraw chi hrang hrang khawl leh hmanrua te subsidy-a an han pe thei mai te a lawmawm a. Tin, tractor te, power tiller te hi neih harsa tak a ni a. Agriculture Deptt. ten loneitute harsatna hria a hetiang a subsidy a, man tlawm taka kuthnathawktute tan an han neih tir thei te hi lawmthu kan sawi bawk a ni. Chumi a nih rual chuan Agriculture Department hi kan ram tan a pawimawh ang hu hian, sum dah hi a tlem tih hi kan sawi ve duh bawk a.

Tin, a dawt leh ah Demand No. 38-na Rural Development Department hi sawi leh ila, he Department ah hi chuan lawmthu sawi ringawt tur kan niin ka hria. A bik takin Hrangturzo bial hian lawmthu sawi tur hi kan ngah lutuk a. Hmalakna leh development hmalakna awm tawh zawng zawng he

Department kaltlang hian sawi vek dawn ila, kan hun neih in a daih dawn lova. Chuvangin, khawtin-ah he Department kaltlang hian hmasawanna kan nei te hi kan Minister chungah lawmthu ka sawi a.

Tin, he BADP sum avanga Zoram hmun hrang hrangah hmasawanna ropui tak rawn lut te hi a ropui tak zet a, Community Hall han neih mai te hi thil harsa tak a ni a. Khaw te leh khaw lian ah pawh Community Hall min han sak sak zut zut mai te hi, High School mai nilo, School hrang hrang building min han sak sak te, Library te. Tin, a bik takin, East Lungdar khua-ah chuan Rural Development kaltlangin Mini-Sports Complex kan han nei thei dawn te hi a lawmawm tak zet a, lawmthu ka sawi bawk a ni. Tin, Vanlaiphai Police station kawt te pawh min chei that sak dawn avangin lawmthu kan sawi tel bawk a ni.

Tin, Demand No. 20-na School Education Department hi sawi leh ila, kan Minister zahawm tak leh a thawhpui Parliamentary Secretary in nasa tak in hna an thawk a, an ngaihtuahna an seng nasa a ni. Education Department hi department harsa a ni tih chu tlang hriat a ni a. Chumi a nih rual chuan an hnathawh hi a ropui em em a. Nichina an rawn sawi tawh Primary Zirtirtu nghet 60 an han la te, Middle School zirtirtu 136 an han dah nghet te, an hmalakna hi sawitur tam tak a awm a ni. Tin, Primary, Middle leh Hindi Teacher/Zirtirtu te training-na tha tak mai an han pe thei te hi a ropui tak zet a. Tin, award an dawn te, National Award te, State Award te an han dawng mai te hi a lawmawm tak zet a. Tin, school amalgamation kan han tih te, School naupang tlem lutuk si, sorkar tana sum senna ni si te an han chhun fin a, School pakhat tha tak an han din te hi a lawmawm tak zet a.

Tin, Primary School mai nilo, English Medium a an han let te hi an ti tha tak zet a. Nichina an sawi ang khan Education-ah chuan English te hi kan mamawh tawh a, Primary School, khatianga zirtirna ngai reng ringawt nilo a

ngaihtuahna thar an han nei te hi an fakawm hle in ka hria a ni. Chumi a nih rual chuan Aizawl ah zirtirtu indaihna tam tak kan nei a ni. Zirtirtu senior tak tak, sawi puitu nei tha te, thingtlanga awm duh miah lo kan nei reng mai te hi chu, a hminga thingtlang bialtu nih pheih chuan a lungngaihthlak in a hrehawm a ni. Heng hi semrual dan ngaihtuah thar leh sela. Aizawl-a school naupang neih zat leh zirtirtu neih zat te kan hria a, thingtlanga zirtirtu awm zat leh school naupang awm zat te kan hria a. Chuvangin, hemi kawngah hian Aizawl-a zirtirtu te hi Thigtlanga sawn darh theih dan kawng hi min ngaihtuah sak theih chuan ka lawm hle ang, kan ngen bawka ni.

Demand No. 44-na Trade & Commerce-ah khan, ka hma ami khan a rawn sawi tawh a. Sawlai insumdawn tawna saw a tha chho telh telh dawn a, sawlai Zorinpui kan tih mai Zochachhuah tih bawka, sawng lai te saw Multi-Modal- Project te pawh kan hre vek a, hengte kan han neih pheih chuan. Tin, Zokhawthar lamah te insumdawn tawna tha tak mai kan han nei chho zel mai te pawh hi a lawmawm a. Tin, sawlai Zorinpui ah pawh sawn, Zochachhuah kan tih bawka ah sawn Land Custom Station kan han nei tur te pawh hi a ropui a ni. Hetianga sawi mai ai pawh hian a ropui a ni. A bik takin thangthar-te tan hian kan nghahfak a ni tak zet a, Trade & Commerce hnathawh ropui zia hi leh Zoram tan kan inngahna an nih zia hi ka sawilang ve duh a ni.

Pu Deputy Speaker, kan Minister zahawmtak tak te pahnih Pu R. Lalzirliana leh Pu H. Rohluna Demand te hi ka rawn thlawp a, pass a nih ngei theih nan ka rawn support a ni e. Ka lawm e.

DEPUTY SPEAKER : Hun i hmang thiam khawp mai. Dr. Ngurdinglana a phar hmasa a, Dr. Ngurdiglana i lo sawm ang.

Dr. NGURDINGLIANA : Pu Deputy Speaker, ka lawm e. Nimin lamah khan kan Minister zahawm tak pahnih Health Minister leh Higher Education Minister te Demand-ah khan hun khan min daih lova, chuvangin vawiin chu ka fing deuh hlek a, department pahnih chauh ka sawi dawn a ni.

A hmasain Demand No. 16-na Home-ah hian, Police Department hi a mimal phei chuan state danga kan kalte pawhin kan chapopui, kan inchhuanpui a ni a. An inrelbawl dan hi tunhma atangin thlir a nuam a, hmuh te pawh a nuam a, vawiin thleng hian kei chuan kan police-te hi ka dah sang a ni. Chuvang tak chuan kawng engkimah kan thuam tur a ni tih hi ka ngaihdaan a ni ringawt mai a. Kil hrang hrang atanga ka tehin kan ram dinhmun, thliarkarah kan awm a, kan bul lawkah Bangladesh te, Burma te an awm a, kan thlang lawkah ramri, engtiklai pawha ramri buai chungchanga inpeih at Assam kan nei bawh a, chuta kan ro neihchhun, kan pasalthate ka ti mai a, kan police-te hi, kawng engkimah an facilities te leh allowances te, hetiangah hian dah pawimawh ni se tih hi a hmasain uar takin ka sawi duh a ni.

Kan hriat angin tunah kan ram a ralmuanga, henge pawh sorkar thuneitute leh dan leh dun kengkawhtu kan police-te, mutmu pawh tuah hman lova ram leh hnam tana engtiklai pawha duty-te zarah a ni tih hria in, kan police a hnuaiber atanga a chungber thlengin an quarter chungchangah te hian kei ka lo khawngaih thin khawp a, department lian ve si ah chuan quarter nei chhe berah kei chuan ka hmu a, an khawngaihthlak khawp mai. Khawthlang ah emaw, khawchhak ah emaw kal ula department quarter nei chhe ber an ni, chuvangchuan hemi kawngah hian khawi atangin nge fund a lokal dawn, ram leh hnam min vengtu na na na chu an hahchawlh hunah pawh nuamsa deuhin hahchawl ve sela, tih te ka rawn ngen pui a.

Nikum hmasa lawk khan buaina avangin kan Parliamentary Secretary Lt.Col. Sangzuala leh police atangin DIG-te kan bial khaw pakhatah an han kal a, chu khua ah chuan I.B. chu kan nei ve a, an lo haw in ka zawta kan mi leh sa te, kan Parliamentary Secretary zahawm tak kha chu I.B.-ah a thleng ve mai a, 'a nih leh kan DIG kha khawnge in thlen tir? ka ti a, ka lo in thlahrun luatah, police bahrik an O.C. quarter-ah chhuat-ah khan alo han mu a ni, khami tum kha chuan ka zak khawp mai. Chutiang chu kan dinhmun a ni a. chuvangin anmahni beat post-ah te pawh an officer-te inspection-a an kal a an riahna tur tal hi chu engemaw provision te hi siam theih ni sela, chu chu police-te ka rawn auchhuahpui duh a.

Tin, modernisation chungchangah an mamawh tak, tha an tih tak an lei tawh avangin tunah chuan an dinhmun a tha viauin ka lo hria a, hei hi a lawmawm em em a ni. Tin, an department chhungah hian tunah hian ka hriatsual loh chuan vacancy 1600(sangkhat zaruk) a awmin ka hria a, hengte pawh hi police, kan mi leh sa, kan inngahna bul, kan thlamuanna bul an nih angin khawi atangin nge kan pawh dawn ka hre lova, vacancy 1600(sangkhat zaruk) pawh hi a rang lama hnawhkhah theih anih chuan a lawmawm khawp ang. Hman deuh lawka police 6ft. chin mi 60(sawmruk) lak dante kha han thlirlet ila, khatah khan tute mah ministry atangin emaw inrawlh kha a thiang lova, a tlingte kha anmahni thiamna leh an pianzia in a phu avanga tling an ni te kha a lawmawm ka ti em em a. Chuvangin, recruitment-ah pawh hian khatiang khan kal thei zel sela tih hi uar takin ka'n sawi leh bawk a.

Tin, tunhnaiah police headquarter Shivaji Tillah-a, building chhe tak tak, tunhmaa sak tawh te, tunah building thar sa turin kan Chief Minister zahawm takin lungphum pawh tun session chhung ngeia a phum thei hi lawmawm ka ti a ni. Kan police-te an hamthatna kan pekbelh zel turah hian tawp chin hi i nei lovang u, an phu ka ti. Tin, officer kalchho zelah pawh

Indian Police Service kan confer danah te pawh hian tun aiin chuh chak thei deuhhleik ila. Entirnan - kum 2003 batch MPS kan tihte pawh hi tun hnaiah IPS confer ah chuan pakhat chauh an la awmin ka hria a, chutih laiin kan thenawm state Manipur Service ah te chuan 2003 batch te pawh kha tunah hian IPS confer tam tak an awm a, a chuh thiam dan kha chu kei chuan ka hrethiam pha lova, mahse a nachang hria kan hotute an awmin ka ring a. Hemi kawngah pawh hian tun aia huamhauh zawka kan chet hi ka'n duhpui a ni. Chu chu Police, Home Department bikah chuan ka sawi theih ni sela, vawiinah khua leh tui te anmahni ah kan innghat a, kan chapo pui a, kan chhuan ang hian kal zel sela, duhsakna sang tak nen tih hi ka'n sawi duh a.

Tin, member zahawm tak East Tuipui bialtu Pu T. Sangkunga sawi awm tak a ni a, kan sawi sak ang a, sawi rawh chu min ti chuang lova. Traffic chungchangah discipline a tha a, kan ram ti mawitu, thawkkhat laia kan police hmeltha deuh deuhte kha an rawn chhawpchuah leh theih lawm ni, tiin rawn sawi thawi deuh teh tiin min hrilh a, khangte pawh kha ngaihtuahna lo hmang se ka duh a ni.

Tin, Demand No. 20-na School Education Department-ah hian hotute duhsakna azarah Consultative Committee-ah min telh ve a, tuna kan Minister-te, kan Parliamentary Secretary-te, Education department-a officer zawng zawngte leh a thawktute, an ruahmanna hi a hrechiangtu niin ka inhre ve a, a kip a kawia rawn sawi ka tum lo, Education Reform Commission member zahawm tak tuna kan Finance Minister ni ta Pu Lalsawta hunlai atanga lo duan tawh zulzui zela ruahmanna felfai taka an rawn chhawpchuak hi he House-ah leh mipui min lo ngaithlatute pawhin an lo hriata ka duh chu, kan sum neih chu tam lo mahse, a tahtawlin a nih tur ang thlap thlap hian tunah hi chuan an kal niin ka hria, policy thlak a ngaih pawhin huaisen takin an thlak mai. Entirnan chumi kawngah chuan kuminah Matric chungchangah pawh selection test a awm ta lova, kum danga

private candidate tam tak, sang chuang awm kha kuminah chuan zanga awrh chauh an ni. Tin, kumtharah pawh kan zirna quality education kan umna zelah mark pek dan pawh an rawn ti danglam dawn. Nakinah kan Minister zahawm takin a wind up hunah a rawn sawi theiin ka ring, pawl 10 leh pawl 12 ah chuan external in mark 20(sawmhnih) a pu ang a, internal in mark 80(sawmriat), khangte kha engvanga ti thar tur nge an nih tih te pawh sawi turah ka ngai. Khatiang khan chawthing herlum nawn reng kha chu education bikah chuan khawvel thang zelah kan kalsan a ngai a. Lobbying syndicate group engemaw a awm pawhin paltlang a ngai a ni hmasawna tur chuan. Chumi kawng ah chuan ruahmanna felfai tak an rawn siam a, a kip a kawh chuan ka sawi dawn lo ka tih kha. Vawiina kan rawt duh chu tuna hostel rules & regulations, a bik takin khawpui bikah a ni ang, Aizawl-ah te, Lunglei-ah te, Saiha-ah te, Lawngtlai-ah te pawh a ni ang.

Thahnem ngaihna ah private school kan hawng a. Nu leh pa te kan lo buai a, kan tu kan fa te hostel siam an awm chuan kan dah lut mai thin a. Heng kan hostel siam te hi Aizawl-ah pawh mit ngeiin kan hmu tlang a. Tha fal chu lo awm deuh mahse a tam zawk hi chu awmna chi chu a ni lo a ni. Hriselna leh kawng hrang hranga tehfung atanga han thlir chuan. Chungte chu rual tak leh fel fai taka dan leh dun awmin enkawl ni sela tiin tunah hian department hian rules & regulations fel tak a rawn duang chhuak te hi a lawmawm a. Vawiina ka rawn rawt ve duh chu nimin lamah khan kan chhiar a Higher & Technical Education-ah RUSA kan tih Central atanga sum rawn pe thin tu kan leh university-ah te hian kumin kum session ah hian Gov't. Zirtiri college leh Gov't. Hrangbana College hi model College atan an rawn thlang a. ₹4 crore ve ve an rawn pe a, engtin nge heng model college te hi, an rawn thuan famkim dawn kan hre lo , ma'rawhchu, ₹4 crore chu a tlem lo. Chutiang bawh chuan kan hotu kan Minister te hian district tinah model school hi i siam ve ang u. Aizawl district-ah pawh zirtirtu tha tha la ila, a enkawl dan tur leh a duan dan chu a rawn thiam ang. Kha model school kan siam Primary emaw Middle emaw High school-a luh dan kha chu strick deuh in, tehfung neiin percentage cut-off neiin hetiang school bik kan din ve chu a tul tawh a ni, mi state dang

ah pawh an ti. Kha school a lut thei tur khan a tha zawng in inel rawh se. Zirtirtu te pawh a tha tha lakhawm in tikhan anmahni ah pawh confidence a awm ang a, an work ethic pawh a sang ang. Khatiang khan kumthar ah chuan ruahmanna kan Minister te leh kan hotuten rawn nei thei sela. A dang sawi tur chu a tam mai a, mahse vawiinah hun pangngaiyah ka tawp ve thei dawn hi ka lawm hrim hrim a, tichuan kan minister zahawm tak tak Pu R.Lalzirliana leh Pu H.Rohluna te demand hi ka rawn thlawpin pass pui ngei turin House-ah ka rawn dil e.

DEPUTY SPEAKER : Aw, hun i hmang dik chiah e. Pu Lalthanliana.

Pu LALTHANLIANA : Pu Dy.Speaker, hun min pek avangin ka lawm e.

Nimin kha ka sawi ve lova, sawi loh chhan ka nei a. Ni 28 March, 2015 ah Zokhawthiang-ah kah kan ni a. Chubak ah kan party Founder President Brig.T.Sailo vui ni champha a ni a. Chuvang chuan, ka sun e ka tia, ka sawi ve lova. Vawiin chu tlem kan sawi ve ang e, chhiat kan tawk lehngal a, ka sawi zawh chuan ka chhuah a ngai mai theia ni.

A hmasa ber in Pu Dy.Speaker, ka sawi duh dan hi ka sawithiam loh mai bakah a figure ang zawng hian ka chhut deuh reuh thin a. Thian te ka han zawt a, a tih fuh tak tak theih loh, duh duh sawi mai tur alawm an ti a. Duh duh sawi ringawt kha ka thiam si lova, sum hman dan turte, dah dan te ang hi kan chhut kan chhut thin a, ka sawi lo leh thin a.

A hmasa berin Home ka'n sawi duh a, Home-ah hian sum kan ngah khawp mai a. Ka sawi hmasak duh ber chu minor works-ah hian `159.90 lakhs dah a ni a. Tah chuan work programme lamah khan repair and renovation of police building tih ah `40

lakhs dah a ni a. A bang zawng hmanna tur kha dah a ni ta si loa enge a chhan ni ang aw tih ka ngaihtuah a. Khawi ah nge hman a nih tak ang le. Tin, session hmasa lam ah khan nge mawni motor indaihloh thu te kha sawi a ni a. Chuvang chuan hei `549.38 lakhs dah a ni a, motor leina tur atana hman tur a nih kan ring ringawt a, nge repair na tur? ₹15 lakhs zel pawn ni ta se motor 36 chu an lei thei dawn a nih hi tih te ka ngaihtuah a.

Tin, major works ah hian in ₹573 lakhs chiah dah a ni a, a tam lo khawp mai a. Tin, machinery equipment ah hian ₹642.45 lakhs dah a ni a. machinery equipment ah hian enge an lei dawn tih hriat a chakawm in ka hria a. Finance Minister speech ah khan Pu Dy.Speaker, i phalna in a sawi pakhat chu “kan sum dawn tura bithliah fel sa piah lamah tunhma lam anga dilbelh tur a awm tawh dawn loh avangin kan sum neihsa te thiam taka kan hman a ngai a ni” an tih hi kan sawi hmasa duh a. A sawi hrereng hian budget hi kan rawn siam ni turah kan ngai a. Chutih lai chuan department tin mai hi an dah dan hriatthiam har tih deuh deuh hi ka nei ve bawk a. Home bik kha han sawi leh ta zel ila, sanction post ruak hi Home chauh pawh a ni lova, department tinah hian a tam em em vek thu hi he House-ah hian in sawi vek a ni a. A nih leh sanction post, post ruak a awm a, hnathar kan lak theih loh hian central lama a an hlawh tur sum lokal tura hi a rawn kal ta lo mai tihna em ni ang tih kha keimahah zawhna a awm a. A nih leh kha hlawh tura rawn kal tura kha a rawn kal bawk si a, kan hnawhkhah chuan siloh chuan kha sum kha eng atana hman nge ni ang le tih keimahah zawhna a awm a. Hei hi sawifel theih chu ni se, Home-ah chauh pawh hian ani lova, department zawng zawng ah hianin a awm vek mai a. Sum, an hlawh tur atana post sanction, post awm si post ruak tam tak kan nei bawk si; kan hnawh khat bawk si lo kha khawiahnge ni ta ang tih ka rilru ah a awm a, ka zawhna ni bawk ta se.

Tin, Pu Dy.Speaker, nichina ka sawi ang khan kan member zahawm tak tak te pawhin paper te an rawn lay a, an rawn present bawk a. Khang atang te khan department in information dik lo House Committee a an feed hian thil pawl tak a thleng thei tih chu Zokhawthianga kan accident tawh atang khan in a hriat a. Hei hi sim a tha

khawp ka hria a. Ka sawi hreh viau na in rilru a tihual a, tun achin ah chuan department hotute hian Assembly Committee hrang hrang in House zawhna kan zawh te emaw information kan duh ang te hi chu dik thei ang bera inpek hi a tha khawp in ka hria a. Kan sawi leh sawi hnu sawibelh pawh a ngai tawh chuang lo in ka hria, khami in a nghawng rapthlak tak chu nikum ah nimin angah khan kan tawng a ni. Chubakah chuan, engemaw tanpuina neuh neuh, a hming neuh neuh chu kan sawi lo mai ang a, police thi ta te tan te leh hliam tuar te tan khan pek a ni tawh hlawm nual in ka hria a. Kan PSO te hi ka sawilan duhna a awm a, anmahni instruction ang zela chea khawsa kha kan ni deuh a. 'Bawk ru' an tih leh kan bawk a, 'ngawi reng ru' an tih leh kan ngawi reng a, chuvanga him chu kan ni ve bawk a ni tih kha kan sawi duh a ni. A nihna takah chuan in 'hlau reng reng su' tia kan beng bula min thlamuan mawlh mawlh tute kha kan PSO te kha an ni tlat a ni. Kei police lo huaisen zia hi ka hmu thar e ka ti a. Mi han fak tehchiam thiam hi ka ni lova, min min fak vak lahin ka zak deuh reuh bawk si a. Chuvangin, mi hi ka fak vak lo na in an fakawm in ka hria a, an training te a lo tha ka ti a, an hotute hian anlo train tha hle mai, ka ti a.

Pu LALTHANLIANA : An hauisen em em a min thlamuan em em a, 'hlau reng reng su,' an ti a, min veng a. Khatiang kha chu award tlem a zawng chu dawng ve chi an ni lo maw, ka ti a ni. A nihna takah chuan anmahni vanga chia lo, huai awm taka lang kha kan ni ve bawk a ni tih kha kan sawi duh a.

Demand No.31-na ah hian kan member zahawm tak khan a sawi tawh a, nikum lama oil palm khawl an bunna hmun kan zuk tlawh khan nikum session ah pawh khan ka sawi tawh a. Khawl khu a capacity lian pui kan nei a, a thar chhuah lamah hian tan kan lak chu a ngai in ka hria. Kan ngaihthlak tawh ang khan kan support duh a, a phurhna tur emaw, a hmun hma remchang te leh an lo hlawk ve theihna tura kawng dap hi chu a pawimawh hle in ka hria a ni. Khawl in a her zawh tawh raw material lam hi kan feed zo lo deuh in ka hmu a. Chuvangin tan lak belh dan hi a awm em aw ka ti deuh a ni.

Tin, Horticulture-ah hian Mizoram mipui 75% vel kan innghat kan tih rual hian Agriculture-ah hian engzatnge in nghat ve aw tih ka ngaihtuah a ni. Agriculture hi a pawimawh hle in ka hria a. WRC hlawhtlinna kan sawi te hi NLUP kan han puh a, a dik tho mai thei a, a ni vek em tih te ka ngaihtuah a. Centrally Sponsor Scheme kan han nei te hi thenkhat chuan heng avang te pawh hi a ni ve pakhat an ti a. National Mission on Agriculture tih te pawh hi hemi kan hlawhtlinna tur tan hian hmanraw pawimawh tak an ni tel ve in kan hre deuh a ni. Chu chu scheme tha tak a nih avangin kan sawi tel ve duh a ni.

Tin, Demand No.38 ah hian kan sawi duh chu - Grand-in-aid general non-salary atang hian nuai singhnih sangriat zathum sawmnga pariat leh singli sangthum kan nei a. Ama'rawhchu work programme-ah hian a vaiin a rawn lang lova nuai singhnih sanghnih sawmruk pahnih chauh a lang a, a in thlahna hi nuai sangnga zariat sawmkua paruk singli sangthum a ni a, hehi engatange hman tur ni ang aw. A then lang, a then lang si lo hi keini ang tan chuan hriatthiam a har ta khawp mai. Budget hi a then an tilang a a then an ti lang lova, a then a token chauh an ti a, Finance Minister hian a dil belh theih loh a lo ti bawk si a. RE tan hian kan zuah teuh mai dawn nge tih te ka ngaihtuah a ni. Kan hriat thiam loh pawh hi kan sawifiah thiam lo chu a nih ber hi.

Tin, National Rural Programme MGNREGA kan han tih atan hian nuai singhnih sanghnih zali sawmruk pahnih dah a ni a. A dang a kha hmanna tur chu a awm chawk ang a, engatange hman tur tih kha kan zawt duh a ni. Tin, major works ah hian Demand for grant-ah cheng 4031 lakhs a awm a, mahse programme ah hian a then kha a lang a, a then kha a lang chuang si lova. Hengte hi kan bo na tawlh tawlh chu a ni e.

Tin, School Education Department ah hian an tang tha viau va mahse wages ah hian nikum ai khan in an pung tlat mai a ni. Sum hi kan inrenchem

dawn emaw kan tih lai khanin wages ah nikum aiin an dah hnem ta a. Tunah hian estimates chauh a ni nangin nuai sawmhnih pahnih singhnih sangnga in an dah hnem ta a. Tin, kan Minister hi han fak ve deuh ka duhna chu mid day meal chungchangah hian kei pawhin House-ah hian zawhna te pawh ka zawt tawh a. Tunah chuan school ho hi an lawm khawp mai a. An hotute kan zawh hian, 'kumdang zawng aiin kan dawng tha ta e, kan hlim ta e,' an ti a, a lawmawm hle in ka hria a lawmthu kan sawi duh a ni. Minister hian a la puang chuan ka ring a, mahse ka lei hmawr hian a lo hre deuh reuh tawh bawk si, a lawmthu ka sawi loh chuan nakinah ka awm lo mai thei si a min hriat thiam kan duh a. Ka bial chhunga kan veng Ramhlun North a Primary School hi Model School-ah min thlan sak dawn niin ka hria a, lawmthu kan sawi lawk duh a ni. Zirtirtu te pawh min pek belh dawn in ka hria a, a lawmawm khawp mai a zirtirtu te pawh an tha a thlan tlak pawh niin ka hria a lawmthu kan sawi a ni.

Tin, Industry Department-a minor works-ah hian 96.5 lakhs an dah a, amaherawhchu hna thawhna tur atan work a programme a lan dan ah chuan nuai 60 lakhs chauh dah a ni. A bak la awm ₹36.5 lakhs kha engatana hman tur nge tih kha a lang leh chuang si lova.

Tin, Trade & Commerce-ah pawh hian damlo te hi an nei tawh dawn lo nge ka hre lova. Medical treatment ah hian nikum lamah nuai sawmthum pariat singriat an neih lain tun kumah chuan nuai 7 chauh an dah a. Insum an tum viau nge, hmun dang atangin a tul dan a zirin kan dah leh maiang an ti dawn nge tih kha kan zawt duh bawk a. Pu Deputy Speaker, hun min pek belh avangin ka lawm e.

DEPUTY SPEAKER : Minute khat a la awm a, minute khat chhunga sawi thei kan awm hmel si lova kan chawl rih ang a, dar 2-ah kan thu khawm leh dawn nia.

DEPUTY SPEAKER : Quorum kan la tling tlat lova, minute sawmpanga kan nghak ang a kan tlin loh chuan. Awle, quorum kan tling chiah a, kan sawihona kan chhonzawm leh ang a. Chawhma lam khan member panga in kan sawi hman a, tunge han sawi tan leh ang le? Pu K.Sangthuama.

Pu K. SANGTHUAMA : Pu Deputy Speaker, ka lawm e. Vawiin kan demand sawi tur hi sawi tur a tam khawp mai a, kan chuk lawr leh vel mai mai dawn a ni awm phawt a.

A hmasa in demand no.7-na Excise & Narcotics-ah hian, hei tunah zu zawrh te kan lo ti ta a. Chuvangin a hnathawktu te pawh hi tihpun theih dan te hi a awm chuan a tha khawp a, an indaihlo angreng viau in a lang a. Chuvangin tunah pheih chuan sum tam tak helai atang hian kan hmu a, a theih chuan a hnathawktu te pawh hi tihpun ni se a that ka ring a.

Tin, zu hi kan zuar rau rau a nih si chuan a quality tha deuh zawk hi zawrh dan ngaihtuah ila a tha awm mang e aw tih rilru ka pu a. An zu zawrhna ah kan kal kual a hmanni khan, zu quality tha vak lo, a man tlawm chi ang vel hi, heng hi chu mihring tan an lo in tam chuan pum a tichhe duh leh zual in a lang a. Chuvangin heng hi chu tih tam loh a, a tha deuh hlekah hian kal hi a tha lo maw te ka ti deuh mai mai a. Mahse 'kan hralh theih ber a ni si a zu chhia deuh hi, a man hniam a quality tha lo hi kan hralhtheih ber a ni bawk si a,' an lo ti a. A zuartu tan chuan a awm viau a an hralh kaltheih chi leh a man tlawm chi kha. Amaherawhchu sawrkar hian ngun taka a ngaihtuah a tha in ka hria a. Hetianga kan phalrai a nih tawh rau rau chuan, zu zawrh kan ti rau rau a nih chuan a quality tha deuh hlekah hian kal thei ila chuan a intute tan pawh a that deuh rinna ka nei a. Rinna mai lovin a tha ang tih hi thil Chiang sa niin ka hria a, chuvangin kan Minister zahawm tak hian helaiah hian ngaihtuahna lo hmang sela tih vawiinah hian ka sawi duhin ka ngen duh bawk a ni.

Tin, tunah hian chhiah hi nuai 4857 zet kan hmu a, kan hmu tam viau a. Helaiah hian zu hi kan hralh tam poh leh phailama pawisa kan export hi a tam a ni ve mai a, export engmah hi kan nei ve lova, tunah chuan zu atanga kan export hi a tam a. Thildanga sum kan thethlak hi chu buhfaiah te, thuamhnaw te leh thildangah te hi chuan thudang ni se. Tunah pawh hian hetiang zat hi pawisa tax kan lo lak chuan kan thethlak hi ka chhut thiam chiah lova, lei zat kan hriat loh avangin, cheng vaibelchhe tam tak hi chu zu zuar company ah Mizoram pelin kan thawn thla a lo ni a. Chuvang chuan kan hralh tam poh leh pawisa hi kan thawnthla tam dawn tihna a ni mai a.

Tin, zu hi a tha lo tih chu sawi ngai lovin kan hria a, chuti chungin zawrh a ngai ta si a. Chuvangin zu avanga thihna hi a tam em em mai a. Nikum leh kum hmasa chung khan mitthi in zanga chuang zetah ka kal a, chuta thihna tam ber hi chu zu related ni in ka hria a. An thih chhan ka zawh hian an tar nen a inang hlawm lova, a tam zawk hi chu a insum theih loh avang, zu te a in tam lutuk avanga thi a ni deuh ber an tideuh zel a. Chuvang chuan zu hi chu kan ram tan leh hun lokal zel tur atan chuan a tha mawlh lo a ni tih hi chu kan Chiang theuh a. Chuvang chuan zu tha chi deuh, tun aia quality sang deuh zawk, a quality hniam deuh hlek hi chu lachhuak lo ila, quality sang deuhah hian kal turin Excise Minister hi ka ngenin ka chah duh bawk a ni.

Tin, no.16-ah hian kal ta ila. Police hi an hnathawhnaah te, hmun dang danga police station ah te, nichinah pawh anrawn sawi tawh a an quarter hi a tha lo khawp mai a. Hei hi ngaihtuah ngun atan a tha in ka hria a. Entirnan khung Sairang te pawh khu an quarter te pawh khu han mutna tlak vak a awm tawh lova. Khungte pawh khu entirnan ka sawi mai a ni a, a dangah pawh quarter that loh avanga harsatna an tawh hi a tam khawp mai a, a dang dangah pawh quarter hi a tha lo viau a. Chuvang in Pu Speaker, kan Minister zahawm tak hian ngaihtuahna hmangin police-ho quarter hi tun aia tha zawk leh changlung zawk a tih han tum turin wawinah hian ka sawi duh bawk a ni.

Tin, pakhat lehah chuan Central Jail khu a hungna khu a tha vak tawh lova, hmanni ah ka zuk kal a, a thenah pheih chuan a bal a. Khungte khu tang tam tak awmna a ni a, chuvang chuan Central Jail hungna khu lo enchiang turin kan Minister zahawm tak hi ka chah duh bawka ni. Kha kha police lamah chuan lo duhtawka mai ta ila.

No.31-na, Agriculture, Tunhma atang tun thleng hian kan ramah hian agriculture lam hi kan hlawhtling vak lova. Chuvangin engtia kal chhoh zel nge kan sorkar in a tum chu ka hre hauh lova. Kuminah pawh hian Governor's Speech ah pawh khan cultivation area-ah hian 39.04%-in a increase a ti a. Hemi hi kan leilet te a nih ka ring a, leilet kan siamah hian za ah sawmthum pakua zetin hemi kan cultivation hi a pung tihna a nih ka ring a. Tin kan products hi 22.21%-in a increase an ti a. Heng hi hmanni ah pawh kan sawi tawh a Pu Deputy Speaker, hemi a increase-na hi a sang angreng viau va. Hetiang a nih chuan kan buh thar hi tam viau awm a ni a, chumi avang chuan heng hi a dik tawka lo deuh mai awm mang e awka ti a. Hun lo kal zel turah chuan heng hi fimkhur taka kan thar tam leh kan thar tlem leh kumina kan punna hi hre chiang turin ngaihtuahna lo hmang tam leh zual se ka duh a ni. Tin, 29.75%-in jhum area ah hian kan lo neih hi a tla hniam kan ti a, hei hi chu a dik mai thei. NLUP atang te hian a dang ti turin kan va ti a, kan lo neih ngawr ngawr chu a tla hniam a nih chuan kan products kha thil dangah a san bawka si loh chuan agriculture ah hian kan hlawhtling chuang lo a ni tih chu ka ngaihdan chu a ni a, chuvangin lo neih a tlak hniam ringawt a products dang thlai emaw thil dangah emaw a san chuan si loh chuan he lai hi ngaihtuah ngun tur thil tam tak a awm in ka hria a. Tin, thlai thar te leh thil dang kan han chin tir a, link road tha hi kan ngaihtuah a ngaiin ka hria a, chuvangin he laiah hian tan lak leh a ngai hle in ka hria.

Oil palm chungchangah chuan hma kan sawn zel a, kum sawm (10) hma lam atanga lo tih tawh kha a ni a, vawiinah a lo thar tawh a, chuvangin oil palm-ah hian hlawhtlinna thui tak kan nei turah ngai ila. Kan Minister pawh hi he lamah hian a tui viau in ka hria a, hmanni pawh kan sawi a, 'Oil palm hi ka tui zawng tak a ni,' a ti a, chu ai chuan in Thelret te hi ching la i hlawhtling zawka ang a te kan inti fiamthu a.

Amaherawhchu, oil palm a hi a kum a rei lo a, thelret te hi chu kum sawm (10) vel lai ngai a lo ni a, chuvang chuan oil palm-ah hian hlawhtlinna tun ai nasa zawk hi kan la nei thei dawn in a lang a, hei hi tui takin kan Agriculture Minister zahawm tak pawh hian lo tuipui zel se tha in ka hria a. Amah hi mi taima deuh mai a ni a, a ngaihtuahna lam chu ti ve tlut mai chi a ni a, chuavangin, a bawhna lamah chuan a bawh chak thei viau a, kan Minister zahawm tak hi hengah hian lo tui zel se tha in ka hria.

Tin, Rural Development chungchang No. 38 hi kan budget a tam hle a, ₹ 3,58,0036,000 lai a ni a, hei hi tun aia uluk leh zualin lo enpui zual se duhna ka nei a. Rural lamah hian pawisa kan ngah em em mai a, heng hi a hmanna a va dik lo emaw, an hman dik lo emaw tih chu kan hre lo a, kan han chhui chiah lova. Amaherawhchu, a tam ang hu hian a hmanna hi dik tawk in enpui tha tawk sela tun ai hian rural lamah hmasawna kan nei zawk ang tih ngaihdan ka nei deuh hlek a. IWM- ah pawh hian ₹8,895 lakh lai kan nei a, hengte pawh hi a hman dan dik tak a hman aenpui deuh chuan thingtlang lamah hian hmasawna nasa tak chu kan nei thei chuan ka ring a.

Aw le, Pu Speaker, Education lam hi hei Education Minister fel tak kan nei a, a tih lam chu tive tlut mai, pa zaidam tak mai, sincere taka hnathawk chi a ni a, a lawmawm hle in ka hria a. Primary School-ah hian naupang kan tlem ta tulh tulh mai a, Aizawl-ah chuan henga lut tur hi kan nei ta meuh lo a ni a. Henghi engtia solve tur nge tih chu hriat a har rual rualin English medium-ah hian tam tak an let tawh a, Aizawl khawpui leh district khawpui ho ah hi chuan hetiang vek hian (Pu Speaker, minute hnih khat chauh kawngaihin) han ti ta se heti laiah hi chuan hma kan sawn mai awm mang e aw ka ti a ,chutiang tur chuan ka rawn duh bawk a. Tin, elementary education lam a hi tun ai hian in ngaihtuahna bul fuk deuh hlek hman leh zual ta ila, kan Minister pawh hian education-ah a rilru a pe viau in ka hria a, hei hi ka chah ve leh ngawih ngawih duh a. Helam atanga hma kan sawn chhoh hian a sang lamah chuan High School kan tih te pawl 10 (sawm) leh 11 (sawmpakhat)-ah te chuan an ti tha viau tawh a. Tin, College-ah te pawh mahni a zirna a inpe thei chian an ni a, heng hi chu a zia awm viau in ka hria.

Elementary education atang hian tun ai hian tan han la leh zual thei se chuan a that ngawt ka ring a.

Tin, a dawt leh ah chuan High School-ah hian Science teacher a hranpa in kan la ngai lo a, a dik chiah a, tunah an buaipui mek a ni tih kan hria a, a lawmawm a. Hengah hian Science zirtirtu an awm tlat loh chuan a buaithlak khawp mai a, khung Sairangah pawh khuan Science zirtirtu an nei tlat lo mai a tih ngaihna an hre lo a, a buaithlak khawp mai a, hei hi khawngaihni min lo hriatpui leh se ka duh a. Primary School-a Headmaster chungchang kha chu hmanni ah a sawi tawh a, sawi nawn leh kher ngaiin ka hre lo a. Ka bial ah pawh khuan Headmaster nei lo an awm a, sawi nawn leh kher pawh ngai in ka hre lo a, kha kha nimai se.

Industry hi chu sawi chiam lo mai ila, hun ka nei tawh lo bawk a. Pu Deputy Speaker, Demand No.44-na Trade & Commerce hian tunah Border Trade te kan ti a, khawchhak lama kan sumdawna tura kan hmalakna hi duh angin a chak mawh angreng viau a. Khilai te khi chak deuh hleka kalpui theih chu ni sela kan thil thawnchhuah tur neih ve, entirnan, keimahni siam kher ni lo mah sela, central lama an siamte pawh khiti laiah a ti tute an awm a, tehkhinnan, electric part te, damdawi te leh thil dang dang bicycle part chi hrang hrang hetilai atanga lo ti ve duhte an awm a. Khatianga an tih khan helaia miten engzat emaw an lo hlep ve thin a. Khatianga khan thil tam tak tih theih vena tur a ni a. Chuvangin kan Minister zahawm tak hian khilalah khian tun ai hian rilru lo hmang leh hlek sela a that ka ring a ni.

Awle, Pu Deputy Speaker, ka tawp dawn ang a. New Market chungchang hi, minute chanve emaw chauh, Pu Deputy Speaker. New Market saw tun aia thianghlim zawk leh tha zawka enkawl dan hi Trade & Commerce kut niawmin ka'n hria a, ngaihtuahna hmang leh zual turin ka duh a ni. A chhan chu keini veng atang sawn kea kal zawng zawng chu bazar saw kan through vek a, motor chuan kan through lova. Chuvangin sawlai rimchhia leh engngemaw saw tun aia rimchhe lo zawka kan kal theih

nan leh mi tam tak kan kal chhohna saw tun aia thianghlim zawka a kal theih nan Pu Deputy Speaker, kan Minister zahawm tak hian ngaihtuahna lo hmang leh zual turin ka'n ngen duh a ni e. Pu Deputy Speaker, ka lawm e.

DEPUTY SPEAKER :- A tirah zu chungchang kha i sawi rei em a, chuvangin a tawp lam kha i pawtchhe ta deuh a ni. Le, Pu Chalrosanga Ralte kan sawm hmasa ang.

Pu CHALROSANGA RALTE : Pu Deputy Speaker, ka lawm e. A hmasaa ka rawn sawi hmain hei, ka rawn sawi duh lawk chu, Pu Deputy Speaker, hemi Correction of Speech tihah hian kan record tute hian min han uluk sak deuh se ka ti a.

DEPUTY SPEAKER : Ngawi rawh aw, lawk, i hun chu kan siam rem dawn nia. Hei hi hmanniah sawilan a ni tawh bawk a. Assembly chungchangah sawi duh in nei a nih chuan Speaker-ah in sawi tur a ni. Heti laiah an aiawha chhang tur minister an awm ve lova. Chuvang chuan Speaker Office-ah in sawi tur a ni tih kha tun hnuah chuan hre tawh ila a tha awm e.

Pu CHALROSANGA RALTE : Pu Deputy Speaker, a nih chuan ka sawi lo mai ang e.

Demand No.16 na atang hian Pu Deputy Speaker, han tan ila. Hmanni lawkah Pu R.Lalzirliana, kan minister zahawm tak hian ka bial chhung min tlawh a. Chutah chuan Sazaikawn Lunglei District Jail min rawn tlawh sak a, hma lak dan tur te, (District Jail saw a chep tawh a, a te tawh viau a,) hma thar min lak sak dan tur kawng pawh min dap sak chho mek niin kan hria a. District aiawh pawhin ti teh ang, lawmthu a chungah hian ka sawi duh a ni.

Tin, Rural Development hi han khaiawp mai ila, No. 31 leh 38-na. Pu Deputy Speaker, Buarpui tlangdung, a bik takin saw Buarpui khua chuan Travellers' Inn

tha tak mai kan nei a. Amah ngeiin min va hawn sak nghe nghe a, a lawmawm hle a ni. MR, a enkawltu tunah hian la dah loh an ni a. Chungte pawh chu hma min lak sak a, Travellers' Inn tha tak mai, nuam tak min sak sak saw enkawltu kan neih loh chuan a chhe mai dawn a. Chuvangin kan Travellers' Inn atan MR, Chowkidar te, Sweeper te min dah sak theih chuan a lawmawm leh zual dawn a ni tih kha ka'n sawi duh a ni.

Tin, Home-ah khan han lut leh lawk ila, Pu Deputy Speaker, thil pahnih sawi duh ka nei a. Pakhatah chuan hei, hmanni lawk khan. City Police kan la a, kan criteria kha ft 6 tlangval kan nei tur a ni, kha kan ti a. A tirah chuan kan huphurh a. Amarawhchu, tunah chuan ft 6 Mizo tlangval hi an lo tam tawh khawp mai a. City police tha tak tak mai, politics inrawlh lo ti teh ang, sawipui pawh ngai lo, anmahni criteria a fit, kan Home Minister leh a thawhpuiten an la thei hi lawmawm ka ti takzet a. Ka'n sawi zau duh chu Pu Deputy Speaker, IR-a kan Battalion-ah te pawh hian hmun ruak tam tak mai a awm tawh a. Hengte pawh hi a hnawhkhah dante hi a awm tawh lo'm ni aw tihte hi vawiinah hian han sawi ka duh a. Hnawhkhah dante hi awm se, kum khatah a vai vai ni lovin 200,300 a tahtawla han lak dante hi a awm lo maw tia han ngen a sawi lan hi a pawimawhin ka hria, Pu Deputy Speaker.

Tin, Home Department-a a tawp ber atan chuan Lungleia kan Police Station chungchang kha khawngaih takin Lungleiah hian rawn nghat ngei se tih hi Pu Deputy Speaker, kan Home Minister zahawm tak ka rawn ngen duh a ni.

Pu Deputy Speaker, Demand No. 20 na ah han lut lawk ila. School Education chungchang hi, sawi tur a tam a. A bik takin hmanni pawh khan ka sawi tawh a. Thingtlanga kan zirtirtuten quarter an luah ve theihna turin kan Minister zahawm takte pawh hian hma pawh an lo la chho ve tawh a. Hei aia changtlung zawka an lak chhoh theihna tur hian kan Finance Minister te pawh hian min han ngaihtuah sak se. Kan zirtirtu thingtlanga awmte tan quarter tha tak kan sak that theih chuan kan sawi tawh ang khan Pu Deputy Speaker, transfer & posting te pawh hi kan ziaawm ka ring tlat a ni.

Chuvang chuan quarter tha kan sak theih chuan transfer & posting ah hian kan buai lovang tih hi ka ring tlat a ni.

Tin, Pu Deputy Speaker, School Education bawkah khan amalgamation kan han ti a, hei hi tha ka ti khawp mai a. Ka bial chhungah ngei pawh Buarpui-ah Primary School I leh II amalgamate turin tunah hian tan kan la mek a. He amalgamation chungchang hi nichinah khan an rawn sawi tawh a, han sawi leh ka'n duh chu Primary School tam thei ang ber hi English Medium a min lehsak theih phei chuan kan Education Minister chak tak leh a thawhpui, a Parliamentary Secretary ten English Medium a min leh sak theih chuan a lawmawm khawp ang. Veng hrang hrangah pawh P/S I, P/S II an awm a, hetiangte pawh hi amalgamate a, English Medium-a kan let thei a nih chuan kha veng tan, kha khua tan thil rotling a ni tlat dawn a. Chuvangin, English Medium a min leh sak theih chuan a lawmawm khawp ang.

Tin, thil pakhat, transfer & posting chungchang hi Pu Deputy Speaker, kan Education minister leh kan Parliamentary Secretary te hi kan tibuai em em a. Helaia ka'n sawi duh chu, Rules tha tak kan nei tho si a, hemi Rules denchhen hian hard posting, kum thum, kum thum a zawh hnu chuan a nuam deuh, khawchhungah te an awm ve ang, tichuan a khawchhung amite kum thum an awm tawh chuan hard posting-ah te an awm ve thei tawh ang tih ang zawngte hian roster ang deuh siam dan kawng hi awm se chuan kan zangkhai leh sawt ang tih hi ka ring tlat a. Helai hi Pu Deputy Speaker, min han ngaihtuah sak theih chuan a lawmawm viau ang.

Tin, Pu Deputy Speaker, a tawp ber atan chuan, Industries Department-ah hian lut ila, hmanni lawkah ZOHANDCO kha kan titawp a. A bik takin handloom-ah hian puan tah chung chang hi han sawi ta ila, Thenzawl chu hma an sawn tawh khawp mai a. Amaherawhchu, Lungleia puantaha eizawngte sawn tunah hian harsatna chi hrang hrang an tawk a. An harsatna pakhat lian deuh ber chu a loom an nei lo hi a ni a. A banna khawl kan ti mai a, hemi an neih loh avang hian Thenzawl-ah harsa takin an phei

a, taxi te, sumo te, maxicab ten an kal a, sum leh pai tam tak sengin an kal a. A banna ah an va ban tir a, sum an seng leh a, an rawn haw leh a. Chuvang chuanin helai Lunglei khaw chhungah hian a loom, a banna khawl tur hi tuna ZOHANDCO Office thin ah sawn dah theih nise, Lunglei khawchhunga puantaha ei zawngte tan hian a lawmawm viau ang tih te kha Pu Deputy Speaker ka rawn sawi theih ni se. Tin, kan Minister pahnih te Pu R. Lalzirliana demand leh Pu H. Rohluna demand te hi ka rawn support a ni e. Ka lawm e.

DEPUTY SPEAKER : Pahnih phar lawk kan awm a, ka hmuh hmasak zawk Pu John Siamkunga i lo ko hmasa mai ang.

Pu JOHN SIAMKUNGA : Pu Deputy Speaker, ka lawm e. Vawiina kan sawi tur department-hi a tam leh hle a, chutih rualin Education Department, Mizorama sorkar hnathawk (za a 27% lai) awmna te Home Department, Mizorama Department lian ber pawl awmna te kan sawi dawn a ni a. Hun hi a tlem thei ropui si a, amaherawhchu theih ang tawkin kan sawi ang e.

Demand No.31-na Agriculture hi tawite kan sawi ang a. Crop Husbandary bik hi work programme atang hian National Food Security Mission hnuaiia cluster demonstration tihah khan Rs.356 lakh lai mai kha a rawn lang a. Helaiah hian a cluster demonstration ah hian rice cultivation te leh thil dang dang te a awm dawn niin a lang a, hetiang cluster zawnga kan tih hian Mizoram economy hi a thang tulh tulh turah ka ngai a. A chhan chu khami cluster khan, ‘nangni hian helai area hi chawm tum rawh u’ ti zawngin thil hi han ching ta ila. Keimahni leh keimahni kan in chawm theih hian sum hi nitin a crore tel in kan hum thei dawn a ni. Chumi anih avang chuan a cluster zawnga kan tih hian hemite hian ‘chumi area chin chu chawm se’, ti zawnga kan kala, belt zawng tea kan in then hi a tha hle dawnin a lang a. Henga an hmalakna tur te pawh hi a tha hle turah ka’n ngai a. Tin, ‘National Mission for Sustainable Agriculture’ tih ah hian integrated farming system an hmang ang a. Tin, rain-fed technology hmangin nasa takin

hna an thawk a, an thawk zel turah kan ngai a. Hetah hian Rs.677 lakh lai a awm a ni. Rain-fed technology hmangin, helaia ruahtui tamna ramah hian engnge chin chi ang a, ruahtui awmlah laiin engnge chin chi ang tih te thlengin an zir chhuak turah ngai ila. Helaia budget sum tam tak lo lang hmang hian nasa takin hma an la turah ka han ngai a.

Tin, Agriculture tho si, Research & Education lamah hian, Mizoram hian KVK panga lai kan nei a. Heng KVK te hi an thawhna lamp chin, an bawhna lam chinah chuan an thawk tha hle a. Tin, farmers' training te pe-in theitawpin an thawk ve thin a. Khalamah khan hei aia nasa lehzualin thawk ta sela. Lunglei district ami hi Hnathialah sawn a awm a, ka leng fo thin a, chungah te pawh, nursery an siam ah te pawh, 'lo nei mite ko lut hnem u la, zirtir tam u la, a thar hlawk dan leh a chin dan, phun sawn dan tur thleng hian, thil hrang hrang han hrih khan an nin khami hlenchhuah kha an lo tum ang a, phur takin hma an sawm thei ang,' tih te hi kan sawi tlang thin a.

Tin, ITC (Integrated Training Centre) hi certificate course a ni a, mahse he sorkar chak tak hian theih tawpin hma a la a, hman atang tawhin certificate course atang hian upgrade chho ila tih kha a ni a. Hei, tunah chuan upgrade tumna te a lo awm tawh a, diploma zirna te. Chu mai bakah graduate emaw, post-graduate thleng emaw zir theihna te awm thei sela. Hna hmu silova an zir tawp tawp mai hi, certificate chauh mai an hlawh chhuak hi chu a diklo e, tih thin kha a ni a. Tunah chuan kan Minister chak tak hnuai-ah khatiang zawnga hmalakna te a lo awm chho hi a lawmawm ka ti a.

Tin, Agriculture hnuai-ah, NLUP bikah hian hmasawinna tam tak kan hmu a. WRC-I leh II ah hian tharchhuahte a pung nasa a. Heng hi thil lawmawm tak a ni a, loneitute puihna rah lo chhuak chho zel tur hi a lawmawm a. Tin, Oil palm lamah te nasa takin sorkar hnuai-ah hian hmasawinna a awm a. Kan hmu thin a, a detail in kan sawi hman lova. Tin, kurtai, hemi fu chin lamah te nasa takin hma kan sawn a, khawlailung-ah pawh Kurtai Kut te hmangin hma kan sawn nasa hle a ni, tih hi a hriat a. Chuvangin, helama an hmasawinna hi a rah a chhuak mek a, a chhuak chho zel dawn a. Tin, fu herna

khawl te pawh hi kan bial ve atang te pawh hian min dil thin a, an hmasawna te a duhawm hle a, hei hi la kal chho zel turah ngai ta ila.

Tin, Rural Development, Demand No.38-na hnuai-ah hian, tunhma khan insak tanpuina te kha a awm thin a, Indira Awas Yojna hi. Amaherawhchu in sa manglo tam tak an awm thin a, tun sorkarah erawh hi chuan na deuh hlekin kan hotute'n an han nawr a. Tunah chuan IAY hnuai-ah hian in sa an tam em em tawh a ni. Mahni in ngeia lawi lut ta te pawh an tam a, a sang tela chhiar tur an lo awm ta te hi a lawmawm a. Tin, BADP hnuai-ah, MLA 16 te bialah hian BADP hi a awm hlawm a. Heng hi, ka tawng haw lo sela, sorkar dang hun lai kha chuan asset siam nan an lo hmang vak lo a ni. Tunah erawh hi chuan sorkarin asset siam nan a lo hmang a, kawng laihna atan te, khawchhung black-top na atan te leh thil dang dangah tangkai zawka hman a ni a. Hemi BADP area-ah hian development nasa takin heng vang hian a thang a ni, tih kha ka han sawi tel duh bawk a. Chuvangin, kan Minister-in hengah te hian nasa takin hma a la a, tunah chuan crore 30 atangin 40 ah khati khan a chho sang zel a, a lawmawm tak zet a ni.

Tin, Home Deptt. a ka han sawi duh chu, police te hi an fit tha, dulkiar hiar huar, chaklo hmel tak te hi an awmlo tial tialin ka hria a, hei hi a lawmawm in ka hria a. Tin, kan police te an polite a, an duty-na hmun an ngaipawimawh viau-in ka hria a, ka hmuh ve phak chinah chuan. Tin, khua leh tuite thlamuang taka kan khawsak theihna tura theihtawp an chhuahna te, kan Home Minister chak tak in hetiang zawnga a kalpui te hi a lawmawm tak zet in ka hria a. Mihring hi nung-damin awm mah ila kan thla a muan tlat loh chuan a nuam chuang lo. Amaherawhchu, thlamuang thei tur leh him taka awm thei tura kan Minister-in chak taka hma a la leh kan force ten chutiang lam hawi a mipute himna tura hna an thawk hi lawmawm ka ti a. Tin, Forensic Science lamah nasa takin hma kan sawn tih te a chiang a. Tin, Fire & Emergency Service-te hi kan sorkar hmasa atang khan a sub-station angin kangthelh motor te dah chhuah a ni a, Secretariat building, helai lawkah te pawh dah a ni a. Tin, Ngaizel pheih-ah te engemaw vanduin a lo thlen

thut pawhin rang takin an che thei a. Hetianga hmasawwna nasa tak kan sorkar hnuai a lo lang hi a ropui hle in ka hria.

Tin, chutih lain Excise chungchang tawi tea sawi ka duh a. Kan sawi nasa thin a, zu hi bo tawh se, zawrh loh ni se etc. etc. te a tam a. Ka han sawi duh chu, he khawvel atang hian sual hi kan paih chhuak dawn lova, sual chu a awm reng ang. Lawng pawh tuipuih a kal a, lawngah tui a lut tur a nilo. Kha lawnga tui a luh palh chuan a pil ang. Lawnga tui a luh loh chuan kha tuipui chungah khan lawng kha awmze-nei takin a kal reng ang. Chutiang bawkin Setana leh Pathian inbeihna ramah kan awm a, sual engmah hi a paih bo theih dawn chuang lo. Amaherawhchu, he sual hmuna chengte hian, Kristian kan nihna leh Krista tlanchhuah kan nihna hmangin sual kha kan do hneh mai tur a ni a, keimahni ah khan sual a lutlo mai tur a ni. A sual a zawk kha dahbo kan tum chuan kan ti thei tak tak dawn lo. Chuvangin, sual kan hnenah a awm reng ang, mahse sual atang khan keimahni kan in thiar fihlim mai tur a ni. Chu chu, keini Kristian ramah phei chuan kan inzirtirna ni sela. Sual theh bo kan tum chuan kan hlawhtling dawn lova. Bible a kan hmuh, heng nawhchizawrhna te pawh kan hriat theih tirh, kan chhiar ve chinah chuan, history a ni emaw, Bible-ah tunhma atangin a awm a ni. He hringnun atang hian kan paihbo thei lo. Zu pawh a ni tho. Amaherawhchu keimahni zawk kan insumna atang khan ti lovin kan awm mai thei zawk tur a ni tih kha tawite in ka han sawi duh a. Tin, Trade & Commerce ah hian tawite sawi ka duh a. Hemi kan Budget bu-ah hian grading and quality control for Agriculture produce tihah hian, hemi grading and quality control hi a pawimawh khawp mai. Vawiinah hian agriculture atanga thlai leh engemaw kan tharchhuah kan bazar lo thleng si, nitina a trip trip-a lo lut, Mizo mipuiten eng atanga an chin nge ? Eng leitha in nge an chawm tih pawh kan hriat loh, kan ei puk puk hi a tam khawp mai a. Hengte hi hma tel thei ta sela. Chemical fertilizers hmang a an chin duang tha pui pui mai an rawn nawr luh hum hum te. Keinin khang kha hre si lovin, khang chemical atanga thlai tha pui pui, rah tha pui pui te Zoram mipuite hi min barh mawlh mawlh mai a. Chuvangin, hengte hi hma thei sela a tha awm mang e aw tih te ka ngaihtuah a.

Tin, agriculture marketing facilities-ah hian 75 lakh lai a awm bawk a. Hengah-te hian kan thlai tharte tha zawka kan zawrh theihna ni pah fawmin, , nichina ka sawi tawh bawk, keimahni Mizo leh Mizo hi thlairah ilo vel chu inchawm i tum ang u tih hi kan rilru-ah hian dah ila. Keimahni hnam kan inchawm theih chuan loneimi hausa an tam dawn tihna a ni mai a ni. Chu rilru leh target hmang chuan keimahni hi rilru inpe ta ila a tha awm mang e tih kha ka'n sawi duh a.

Pu Dy. Speaker, hun hi a tawi deuhhlekk a. Industries Department-ah hian tlemte sawi duh ka nei a. Geology & Mineral Resources hian check gate 23 lai an enkawl a. Hetah hian oil & gas exploration chungchangah a sulsutu berte an ni a. Tuna kan oil zawn mek Meidum lamah-te. Eng chin chiah ah nge kan hlawhtlin tawh tih te hi hriat a chakawm a. Helam hi kan ro tur, kan asset tur tak takte niin a lang bawk a. Khalai kha Chiang zawka min hrilh theih ka'n beisei a.

Tin, kan thil siamchhuahte hi keimahni vek hian appreciate ila, a zo teng teng ti lama la lo hian keimahni leh keimahni vek hi insiam tur kan ni tih hria-in, industry hrang hrang ah tunah pawh NLUP hnuaiyah hian trade tam tak a awm a ni. Heng a kan thil siamchhuahte hi inhlutsak thiam ila. Tichuan, industry te pawh a than chuan mipui kan thang ang a, agriculture lam a thang bawk ang. Thang tawn tur vek kan nih avang hian helam ah hian kan rilru pe thei hram ila.

Tin, School Education chungchangah tawite han sawi ka duh a. English Medium-a an Primary School 82 lai kan lo nei tawh a. Education lamah pawh hmasawna ropui tak a ni. Middle School ah pawh 51 lai English Medium a leh a lo ni tawh bawk a. Hei hian Mizoram State Education Reform Commission Report kha zawi muangin an implement chho zel a. Sum phei chu awm se, chak zawkin an implement chho thei turah ka ngai a. Tin, lawmawm em em chu tunah hian kan zirilaibu-te hi SCERT ten a ram mil leh a naupang ze milin an rawn siam tan chho ve ta a. Tichuan, MBSE hian a lo assess ang a. Zirilaibu siamtu ten training an pe ang a. An thiam leh

thiam loh MBSE in a lo exam tawh dawn ni hian a lang a. Heng ang te hi hmasawwna ropui tak a ni. NCERT in a lehkhabu a siam thin ang khuan, SCERT in kan state-ah zirlaibute a siam ang a. Khami zirtirtute training kha guide nen an pe ang a. Chumi a lo evaluate leh tu tur chu Mizoram Board a ni dawn a. Hetianga kan kal chuan systematic deuhin thanna a awm chho zel dawn a ni tih kha a chiangin ka hria.

Minister zahawm tak takte Demand zawng zawngte hi ka thlawp a ni tih kha ka'n sawi duh a ni e. Pu Dy. Speaker, ka lawm e.

DEPUTY SPEAKER : Pu K. Lalrinthanga i lo sawm ang.

Pu K. LALRINTHANGA : Pu Dy. Speaker, ka lawm e. Vawiin a kan Minister zahawm tak takte Demand atanga ka han sawi ve duh chu – pakhatna-ah chuan Demand No. 16-na, Home Department-ah khan a ni a. Ka han sawi hmasak ber duh chu keini area khu SHDC area a ni a. Zin tura programme kan siam hian security lamte pawh kan programme kan pe ve thin a. Chuta thil lo lang ta chu, “security i mamawh em ? security i mamawh chuan motor i intum a ngai ang,” tih a ni a. “I intum thei em?” tiin min rawn zawt thin a ni. Bialtu MLA kan ni a, bial chhungah kan zin dawn a, ka him leh him loh kha kei a ngaihtuah turah ka ngai lova, security te ngaihtuah turah ka ngai a. Chuvangchuan, ka mamawh thu hi ka hrih ngai lo a ni. Security-a hnathawktu an awm a, chungte chuan tun dinhmunah chuan MLA kan nih avanga kan himna leh him lohna tur kha chu an ngaihtuah turah ka ngai a. Hei hi a hmasa-in ka han sawi duh a ni. Chutih rual chuan Saipum-ah te, Saiphai-ah te Demand area an ni a, motor khu an neilo fo a. Engemaw buaina-te lo awm ta se, engtingge khang buaina siamtute kha an umzui tak ang le tih hi kan ngaihtuah a ngaiin ka hria a. Chuvang chuan, heng Demand area-a kan police awmte tan hian lirthei hi regular deuh a kan pek a tha-in ka hria a. An pek awm chhunte pawh hi tlan hleithei lo te a ni thin a. Chuvangin, hna tha taka thawk tur hian beiseiawm vak an ni lovang a ti zawng hian a ngaihtuah theih a. Chu chu ka rawn tarlang a ni.

Serlui bial ka zin hnuhnun ber leh hnuhnun ber dawttu-ah pawh min zuitu tur motor an neih loh avangin khawchhung chinah chiah bike ten min thlah a. Chutiang chuan an awm thin a ni tih kha ka han report duh a. Chuti chung chung chuan ka han tarlan duh chu kan Minister hian India rama state ralmuang ber ni thei tura hma a la hi a lawmawm ka ti a, lawmpuina ka han thawn a ni.

Pahnihna ah chuan Excise Department-ah hian ka sawi duh chu example pakhat han sawi ila. Mizo hi zu in duh kan tam zia chu 2002 nge 2003 kha aw ka hre chiang ta chiah lova, Assam Rifles ah sawn contract hna ka thawk a, Officers Club saw panelling kan thawk a ni. An hna kha an hmanhmawh angreng hle a, zan dar 9:00PM thleng ten kan thawk thin a, hlawhfa thing mistiri 6 leh helper 6 te ka ruai thin a. A sipai ho-te kha an hmanhmawh ve a. Tiphur nan khan zu an rawn kensak thin a ni, atta te leh alu te nen siamsa kha an rawn ken sak thin a. Hlawhfa ho zingah khan in duhlo hi pakhatmah an awm lo reng reng. an in duh vek. Hetia ka han chhuizui takah chuan Mizo-te hi zu in duh kan va tam awm ka ti a ngaihtuahna kal thui zelah chuan, mahni vengte leh veng dang thenkhatte ka'n han chhuizui a. Zu in duhlo chhungkua hi zu in changkang tak thin hmang hian han chhui ta ula, zu in duhlo chhungkua awmna chu a khat pharh ang. Chutiang chu kan awmdan a ni a. Chuvangin, kan Minister hian decision a siam hi a siam sual lo ve. Tunah chuan zu tha in tur a pe thei a. Tun hma ang zu in ni la la a thi ang chi te kha an awm ta lova. Tuna zu avanga thi an tam ti ho hian an sawi chhan ber ni a lang chu sorkar policy anga kal takah hian sorkar demna tur atan an sawi mai niin ka hria. Hemi hma-a thi an tam dan kha an sawi tel lova. Permit pek hnu a zu in avanga thi tam ti a sawi hi tunah chuan an sawi duh dan a ni a.

Pu K. LALRINTHANGA: Chuvang chuan hun kal tawh a thil awm te leh tuna thil awmte hi kan khaikhin tel a ngaiin ka hria a, chu chu ka han tarlang a ni.

Agriculture Department-ah hian hei work programme phok 2 na sl.no. 9 naah khan Purchase of Seeds, Farm Implementations, and Tools tih te, a dang dangte

a inziak a, ka chhiar vek seng lo ang a. Tah khan cheng nuai sanghnih leh zahnih pawisa dah a ni a. Hemiah hian ka rawn rawt duh chu kan buh chin hi a ngai deuh ngawt ngawt tunhma atangin kan ching thin a. Tun hnuah hian SIR te kan ti a, tlemin kan han thar belh deuh ta a, a lawmawm ka ti a. Chutih rual chuan buh tui kan tih thin 'basmati' kan tih te, hotel-ah te fried rice atana an hman chi, a tui chi te hi introduce ve chi a ni lawm ni? Department dangin thil chi hrang hrang thlai chi te, eng eng emaw Zorama chin awm ang an han ngaihtuah a, an han khawn khawm a, experiment an han tih ang deuh hian Agriculture Department pawh hian buh chi hrang hrang hi bial khat te tein han ching lawk chhin sela, a that duh chuan kan mipuite hnenah hian introduce ta sela, buh a tui chuan a man pawh a to a, bial khata kan thar chhuah pawisa a chantir khan a tam thei ang a, chutiang chuan kan hlawk pui thei deuhin ka ring a, chu chu ka han tarlang a.

Tin, buh chungchangah hian engatinge kan mipuite hian buh chin hi an peih tak vak loh tih hi ka chhut ka chhut thin a. Serlui bialah khuan hmanlain kan pi leh kan pu ten leilet neih duhin lo an vat chhuak a. Tam tak an siam a, chu chu an tu leh fa ten an rochun a. Chu an leiletah chuan anmahnin enkawl lovin vaiin an enkawl sak thin a ni. Bial ka fan chuan ka sawi thin a. Thenkhat chuan an haw lek lek thin a ni. Mahse, Chiang taka han chhut chuan kan buh thar chhuah rate hi a hralhna a lo tlawm ta em mai a, ration buhfai a awm tak hnuah hian buh chin hi a lo hlawk ta lova. Chuvang chuan buh chinah hian kan lo tui ta lo a ni tih hi hmuchhuakin ka inhria a. Chuvangin hei Supply Minister zahawm takin Mizoramah buhfai a harsa dawn nia a hriata ngaihtuahna a siamah khan local purchase-in kg. ah (cheng `25/- sawmnhin pangain) a lei thei a. Khatiang khan khung leilet hmunah khuan Mizo buh chin hi kg. ah ₹25/- chuan lei ve ta ang sela chuan kan mipuite hi buh chin lamah an kal leh duhin ka ring a. Vai ho enkawl tir lovin. Chutiang chuan hmasawna a awm theih ka ring a ni.

Tin, Agriculture link road hi kan member puite khan an sawi a. Hei hi a pawimawh a ni. Kan thil thar reng reng a mass a kan thar dawn chuan kan phur

thlenna hi tlawm deuh hleka a zawrhna hmunahte kan phurh thlen theih loh chuan a man a to thin a. Chuvangin link road-ah hian nasa zawka thahnem kan ngaih a ngai a. Sum leh pai pawh nasa zawka kan dah tam a ngaiin ka hria. Link road hi kan neih fur chuan a phurhna tur hi a lo awlsam deuh ang a, a phurh man te a lo tlawm ang a, chutichuan kan loneitute pawhin tam deuh zawk thar duhna te pawh a lo awm ang a. Chutiang atang chuan sum leh pai tam zawk kan la theiin ka ring a ni.

Tin, buh herna khawl lian deuh hi leilet tam deuhna hmunah hian sorkar ang hian a neih theih loh pawhin tanpuina hmang hian bun ta ila, Cachar ramri bul vela buh reng reng khu Cachar-ah a lut a, Mizoram-ah her lovin Cachar lamah hralhin a awm vek a, keini Mizoram hian kan tlan mang lo a ni.

NLUP ah hian (DEPUTY SPEAKER : Minute khat ila nei) Pu Deputy Speaker, niminah khan ka sawi lova, kan ban har ka hlau a, khawngaih takin sawi tur ka la ngah viau a nia, a dangte pawh hi ka la sawi lova, khawngaih takin hun min pek belh turin ka ngen che a. Department dangte pawhin NLUP fund atangin interest free loan te an siam sak a, buh her khawl siam thei tu tur hnenah free loan te inpe ila khatiang ang khanin, kan ramin kan tangkaipui ngawtin ka ring tih kha ka han sawi duh a.

Trade & Commerce-ah Saiphai-ah khuan Zirtawpni bazaar a awm thin a, Vairengte-a Nilaithawhtan bazar ang khu. Zirtawpni-a in kal chuan motor kal hleih theih lovin kawng sirah mi tam tak dawr siam an awm ang a, chu chuan motor kal pawh a tibuaitlak a ni, Market building kan nei lova, Saiphai-ah khuan market building kan neih theihna turin ruahmanna min siam sak ula ka duh hle mai tih kha ka han sawi duh a.

Industry Department hi NLUP trade enkawl tih loh hi chu enkawl hi an nei mang lovin ka hria a, han belhfak tur pawh hi an awm tam lova. Chuvangchuan Minister te hi tang deuhin nge ni kan sorkar hian a vur ve deuh dawn tih ang zawngin ngaihtuah thiam pawh a harsain ka hria a. Mipuiten eizawna atan Industry lam ITI-ah

te an training chhuak a, an eizawna tur bul han tan pui a, tools te han pe tur khan pawisa an nei mumal tawh lova. Chuvang chuan pawika ti a. Pawisa lamah hian dah tam ve deuh hlek chu a tulin ka hria.

Rural Development-ah hian, social education atang hian tunhmaa Community Hall in sak thin a kha a awm ta si lova. Pawisa dah a tul hlein ka hria. Ka bialah khuan khaw 6 in Community Hall an la nei lo a ni. Tunhmaa lo tan tawh ah te pawh khan chhonzawm lohvin a awm ta a, a chhe mai dawn a, chuvang chuan puih an ngai hlein ka hria.

Education-ah hian sawi tur ka nei teuh nain pakhat chiah ka sawi leh duh chu - thingtlangin zirtirtu kan neih that theih loh avangin naupangte zirnaah an hnufum a. Khawpui atangin mithiam deuh te, zirtirtu ah appoint an ni a mahse, an thawk tha leh duh si lova. Tunah tak phei chuan kan Minister-te hian training lo chu zirtirtu kan la thei lo an ti leh tawh bawka si a. Chuvang chuan thingtlanga kan mipuite tan hian Pre-Service training post hi quota-in emaw, khatiang khan siam ta sela. Chutichuan, a khaw hmuna awm a thawk duh te khan training post atanga an training chhuah khan zirtirna an pe ve thei ang a, chu chu a khua amite pawhin an tangkai pui theiin ka ring. Chutiang chuan vawiina kan Minister te demand hi ka rawn thlawp ve a ni e, ka lawm e.

DEPUTY SPEAKER : Le tunah Er. Lalrinawma.

Er. LALRINAWMA : Pu Deputy Speaker, ka lawm e. Tunah hian kan Minister zahawm tak tak pahnihte Demand kan la sawi dawn a ni a. Pu R.Lalzirliana, Minsiter zahawm tak chan atang hian nikum kha crore 137 velin kan phalova, nikum ai in 11.31% (za zela sawm pakhat leh point 31) velin a tlem a. Kan Minister zahawm tak Pu H.Rohluna chanah hian crore 53 velin nikum kan phalova, nikum kha 5.45% velin kan phalova. Engpawhnise, back gear kan sawi nasa lutuk lo

turah ngai ta ila a tha in ka'n ring a, pawisa awm dan azirin siam rem nial tur ah ngai ta phawt ilangin a thain ka'n ring a.

A hmasabera ka'n sawi duh chu Agriculture Department Demand No. 31 na He Department hi a pawimawh khawp mai a. Helaia economic survey 2015-16-a kan hmuh ang khan kan GSDP-ah 17.5% vel a a thawh ve laiin mihring 60% (za a sawmruk) kan inngahna a lo ni si a. Hetileka thawk pawh a heti zat mihring kan innghat a nih chuan tihchangtlun lehzuah a va tul em tih lai hi ka rilru ah a awm a. A chhan chu lo neih dan tha zawk leh kalphung tha zawk pawimawh zia lai hi kan hria in ka ring. Hetah hian lehkhabu pakhat ti mai ila Ministry of Rural Development, Government of India in Expert Group on Prevention of Alienation of Tribal Land and its Restoration tih Committee a lo dinnaah hian tribal te hi kan eizawna hi tun hunah mihring kan tam chhoh zel avangin shifting cultivation kan han tih, tlangram lo neih tih te pawh a ni ang. Khatiang te kha nek chep in a awm tial tial a, a tlahniam tial tial a ni tih a rawn sawi a. Chumi dawmkang tur chuan eizawna tha zawk kha a lo ngai a ni tih he an thil report-ah hian Chiang Takin a rawn lang a ni tih kha kan sawi duh a.

Tin, nichina ka hmaa member zahawm tak te sawi ang deuh khan, keimahni agriculture-a kan tharchhuah buh leh thil dang te pawh hmun dangah kan han ti chhuak niin a lang a. Heng te pawh hi kan ngaihtuahna zau zawk kan sen a, kan ram atanga tharchhuah chu helama kan lak luh thiam te pawh kha a pawimawh khawp in ka hria. Youth Commission te pawh hi kan ti a. Ram pawn lam a hnathawh dan tur ngawt mai kha kan buaipui niin ka hria a. He ram atang ngeia Youth Commission hi kan tan a va tul em. Vawiinah hian tawng mawi lo ni suh sela lehkhathiam lo zawk te leh eng emaw zawk ten kuthna an thawk a. Chumi thawhchhuah sa chu kan ei zawk niin a lang bawk si a. Chuvangin, mithiam zawk te leh, kan Youth Commission te pawhin he lam hi hawi tum ila, kan thalai zawk te hian ngaihtuah tlangin, helamah hian ke i pen teh ang u tih kha ka sawi duh a.

Tin, a dawt leh atan chuan NLUP chungchang hi tlem sawi ka duh a. NLUP-ah hian beneficiaries singthum leh tih zet hmanni zawhna leh chhannaah khan, an trade thlan atanga pawisa la hmu kim lo kha an awm a. Khangte kha pawisa kan nei a nih si chuan pek hi a va tha em. Eng huna hmanah nge kan tih chuan tih hi vawiinah hian kan sawi duh a ni. Chuvangchuan, a changtu Minister zahawm tak pawh in min lo hriatsak se tih ka sawi duh a. Tin, a dawt lehah chuan thingtlangah NLUP chungchangah village level NLUP implementing committee te din a lo ni thliah thliah a. Hengah hian Chairman-ah VCP an nih tur thu tih chu guideline-ah chiang takin kan tarlang a. Heng kan guideline te hi kan zah a tha in ka hria. Tunah hian thingtlang khaw thenkhatah VCP ni lo Chairman tir thliah thliahna te pawh a awm niin a lang a. Hengte pawh hi min lo ensak sela. Keinin guideline kan siam hi chu zawm hram hram a tha a ni tih kha helaiah hian ka sawi duh a ni.

Tin, a dawt leh atan chuan Excise Department hi sawi ta ila. Kan hriat theuh ang in zu te kan han zuar a. Ka ngaihtuah thin a, kei chuan he policy hi ennawn leh hram hi a va tha em ka la ti tang tang a ni. Hman niah damdawi inah ka va kal a, khum hi a lo tlar put mai a. Nurse pakhat hian,' ka pu, en teh, heng zawng zawng hi zu vanga natna nei an nih hi, zu in a kaihhnawih te, RSBY an hmang thei si lo a, pawisa an nei bawk si lo a. Tun lai a thi zawng zawng hi kum 20 atanga 50 inkar an ni tlangpui leh nghal a ni,' a ti a ni. Min zawh dan phei chu, 'zu in zawrh dawn phei chuan kan vote tawh dawn lo reng reng che u a ni, inla zuar ang em tih leh hunah?' min lo ti nghe nghe a ni. Chutiang khawp chuan an lo duh lo a ni. Ka ngaihtuahna ah phei chuan helai a MLCP Act pass anih dawn pawh khan a nghawng tawk nei a kan thlun pawh in kan chaih hneh lo a ni a, a thlunna kan phelh thawl te phei chuan in lal thuthleng te pawh hi a phih thlu vek ang che u' kan tih te pawh kha ka ngaihtuah chhuak a. A phih thlu tak tak dawn che u pawh niin ka hria. Chuvang chuan, lal leh in la beisei a nih chuan, titawp mai rawh u tih lai hi ka'n sawi duh a ni. In lal thuthleng hi a nghing dawt dawt tawh a ni tunah hian tih hi vawiinah hian kan sawi duh a ni.

Tin, Home Department lamah kai leh ta ila. Tunlai chanchin ngaihtlak hrehawm tak mai police te zahawmna tihbawrhban ti mai ila, thil thleng a awm fo ta mai a, khawi hi nge dik lo ber ta ang tih hi ka rilruah a lo lang a, ngaihtlak pawh hrehawm ka ti a. Thil thleng vawihnih kan hnung lawkah khan a awm a. Khangte kha kan ngaihtuah chian a, engvanga lo thleng ta mai nge a nih tih hi keimahni police chhungkua leh mipui pawh hi kan inzir chian tlan hi a va tha em. Tunhma in hetiang police chung thiltih kan neih awm lutuk pawh hi ka hre lo, tih ka sawi duh a. Engpawhnise, hei hi chu ngaihtuah Chiang ta ila, engnge a chhan leh vang hi i zawngchhuak ang u tih lai hi vawiin hian ka sawi duh a ni.

Tin, RD hi a pawimawh khawp mai a. Model village te kan han ti a. Model village lawmawm teh reng nen hian tuman kan sawi lova, ka bialte phei chu kan vannei a, kan Rajya Sabha MP zahawm tak te leh kan thian ten, keimahni MLA pui, MPC te leh MNF lam atang ten min rawn thlan sak a. SAGY hnuaiyah model village kan han nei diah diah a, a lawmawm a. Engpawhnise, RD atang hian heng model village kan han puan te pawh hi hetia thlah zalen ringawt lo deuh hian a theih ang ang in scheme te pawh ngaihtuah puin, remchanna la in an hmasawn na tur ngaihtuah zel ang u tih vawiinah hian RD bika ka sawiduh a ni.

Tin, Demand No. 20 na Education Department chungchang hian, zirtirtu transfer chungchang hian bialtu MLA te an han ti a, a lu hai thlak mam mam thin khawp mai a. Engpawhnise, ka sawiduh lai chu, thingtlangah awm a lo harsa a, khawpuia awm kan han dil a. A tlangpui thu in kan hotute pawh in thingtlanga an awm rei tawh dan te hi tehkhawngah nei ve deuh ta ila, a tha in ka hria a. A ti thei deuh te leh hmelhriat nei tha ang te pawh in a kal rum rum emaw te pawh a tih theih a. Reilote te awm te pawh in an dil tho a, helaiah chuan an lo thawh tawh na kha en ta ila, a kairual lehzual ang a tih ka sawi duh a. Tin, mak tih deuhlek ka neih chu lehkha pakhat a awm nawlh mai a. Zirilaibu hlui hi khawngkhawm tur a ni tih na a ni a. Kan Minister-in nakum lamah zirilaibu hlui hi sem an tum ta mai nge ni a, helai hi min rawn hrilhfiah sela.

Naupangte hnenah zirilaibu kan pe a, a hlui hman tlak awm han khawn leh vek rawh u, tih ngawt mai hi chu engnge ni helaiah hian, pawisa kan indaih lo viau nge ni, a thar dawn te chu a chakawm viau ang tih sawi duh bawk a ni.

Tin, Trade & Commerce chungchangah hian sawi tur tam tak awm in ka hria. Kan hriat angin kan ram chu India ramah hian han penhleleh viau mahse, International boundary thui tak kan nei a. Hei hi kan hmanthiam a tha in ka hria. Tin, Agriculture leh Trade & Commerce hi convergence, insuihkhawmna tha tak neih a ngaiin ka hria a, Horticulture te pawh a ni vek ang a. Chumi a nih loh chuan keimahnin kan ei tawk te leh kan thenawm ram ten engnge an duh, engnge an mamawh tih lai kha kan lo thliar thiam a, khami hawi zawnga ke kan pen hi a tulin ka hria a. Chutilochuan, kan thlai chin tur te kan thlan fel a, felfai taka thil kan tih loh chuan thil hi a buaithlak ve thei a ni. Tin, Trade & Commerce chungchangah phei chuan hmalakna tur kan ngah khawpin ka hria. Kan thenawm ram a bik takin Assam kuan Land Custom Station hi 4 ngawt a lo nei tawh a, Meghalaya in 8 a nei tawh a, Tripura in 7 a nei a ni. Heng Land Custom station te hi hmanlai vek anni a, keini chuan sawlaiah Tlabung ami pawh kan la ti kal hleithei lo va.

Tin, Bangladesh-ah kan zuk kal a. Bangladesh han sawi hi a nuam deuh hlek a. Kan COPU Chairman zahawm tak te nen hian khulamah kan zuk kal a. Tahchuan thil tam tak hmuh kan neiin ka hria, sawhthing chungchangte pawh a ni vek mai a. Khulamah chuan sawhthingte hi an lo lei nasa em em mai a ni. India rama sawhthing tharchhuah zawng zawng leitu lian panga zinga pakhat a lo ni a Bangladesh khu. Chutih rual erawh chuan, anni chu Agriculture lamah an che hleithei lo ve thung a mihring an tam tawh avangin. Khalai takah khan anni chuan bungrua tam tak an rawn thawn lut thei ang. Keini erawh chuan agriculture, anmahni lam mamawh entirnan – la te, sawhthing te leh khatiangah khan chet la ta ila.

Tin, Trade & Commerce chungchang bikah pawh keimahni kut hnathawktute dinhmun hi kan zirchian a va ngai em tih lai hi ka sawi duh a. He paper hi a then chuan in hmu tawh mai thei a. Hei hi USA puih na a buatsaih Value/chain market analysis of the ginger sub sector in Nepal, tih project. a ni a. USA atanga an rawn puih a, an zirchianna a ni. Dawhkan tin, position tin mai a sawhthing a an dinhmun an lo zir Chiang thlip thlep mai a ni. Hmanniah Trade & Commerce Department-ah khan Unstarred in ka zawt a. Chu ka zawhnaah chuan kum 2011-15 inkar chhunga sawhthing rate chungchang thu (price trend) ka zawt a. Min chhang thei lo tlat mai a ni, a production trend chu min chhang thei a, pawl ka ti a. Khulai kan zuk kalna atanga kan rawn hawn chu sawhthing hi kan khingpui ber pakhat chu Nepal ram te an lo ni tih te kha kan rawn chhuichhuak chho zel a ni. Sawi tur tam tak a awm a, engpawhnise thil zir chian leh kan kuthnathawktute dinhmun kan lo zir chian hi a lo ngai a lo ni.

Tin, nichina member zahawm takten Red oil palm an sawi kha tlem han sawi ka duh a. Red oil palm hi kan member zahawm takin a sawi ang khan a thente phei chuan an seng hleithe tawh lo tih kha thil ni thei a nih ka ring. Mau sumdawnaah hian rei tak ka tal a, mau hmun kan va lei a, mau hmun hnuai lam hi chu kan sat thei tawh ngai lo, a lak khawm na rate leh a pekna Cachar Paper Mill kha a inmil tawh thin loh avangin mau kha a tang ringawt mai a ni. Khatiang chiah kha an dinhmun hi a lo ni ve ang tih kha ka hrethiam nghal a.

Chuvangin wawiin ah hian khulaia Bukvannei a ni emaw helaia red oil palm hernaah hian engzat chiah nge red oil palm heng atang hian, a oil hi an hralh chhuah? Engzatnge an production cost? Chumi atang chuan red oil palm chingtute hian engzatnge an lo chan ve tih pawh hi kan hriatchhuah a ngai a ni. Kan hriat loh kar hian min lo Exploits fel der tawh thei ve tlat a ni. Chuvang chuan production cost atanga producer cost kha engzatnge ni, engzat percent nge ni tih te pawh hrechiang tlang ta ila. Chumi atang chuan red oil palm man te pawh kha kan chhiar belh thei turah ka'n ngai a. Chumi a nih loh chuan kan hriat loh kar hian, 'hralh ve, hralh ve' ti reng chung khan kan

kuthnathawktute hi min lo exploit thei tawh tho a ni tih lai kha a pawimawh a. Khalai te kha zirchianah a thain ka'n ring a. (DEPUTY SPEAKER : I hun i hmang zo tawh a nia.)

Pu Deputy Speaker, tlem te, thil pakhat lek, NLUP-in hna hrang hrang kan thawk a, hma kan la a. Chutihlai chuan thil lungchhiatthlak tak mai chu hatkora hmun an vat thin thu tih hi a ni. A ngaihthlak hrehawm pawh ka ti a ni, hatkora hmun an vat thin tih hi.

Engatinge helamah thlai tiak tir tih len kan tum a kan bei ve lauh lauh a, a puitling sa te kan vah tir mai le? Engatinge hma kan lak loh, tih lai pawh hi ngaihtuah tham tak a tling a ni. Bangladesh-ah kan zuk kal a, kan zawt Chiang a, kan rawn haw lehna zela thil kalah chuan hetiang hi Pu Deputy Speaker, kan hriat ve hrim hrimah tunah hian Bangladesh hian fresh fruit an tih thlai hring lakluhah hian chhiah hrang hrang an la ta a. Chu chu a hmasa berah, hemi a chhiah lakna base hi, Cost Insurance Freight (CIF) an ti a, CIF atanga 30% kha supplementary duty an la a, 25% kha custom duty an la a, 15% VAT-ah a la a, 5% kha regulatory duty a la a, 4% hi advance trade VA-ah an la a, 5% chu advance income tax anla a ni. A pumpui in 84% CIF (Cost Insurance Freight) ah Bangladesh hian a la a ni. Chumi ka sawi duhna kher lai chu Pu Deputy Speaker, tlem te, ka sawi zo tep a nia. (DEPUTY SPEAKER : I sawi teuh tawh a nia.) Khualaiiah Hortoki lam te pawh ka zu bia a, anni chuan import duty an la tam lutuk niin kan hre ber a ni an lo ti a ni. Tahchuan, ka ngaihtuahnaa lo lut ta chu za zela 84% CIFa tanga an lo lak si chuan keimahnin tan kan lak theih ni chu cost ah chiah hi a ni, insurance pawh kan ti thei lo, freight pawh kan ti thei lo, cost ah hian tan kan la thei a ni. Chu chu khulaia hatkora chingtute hi engzatnge kum khatah an thar chhuah tih te hi ngaihtuah ta ila, price support pawh hi pe ang u tih hi ka ngaihtuah a ni. Khutah zu kalin cost hi engzatnge tih zu zirchiang ta ila, chumi atang chuan keimahnin price support kan pek a anmahni kan chhanchhuak thei a nih chuan entirnan, hatkora kg-ah `100 lo ni ta se, cheng li pawh lo pe ta ila kg khatah, khami atanga Bangladesh-a kan thawn luh theih chuan a la tha tho tho tih ka ngaihtuah a ni. Vawiinah kan thlai pawh a puitling dawn nge dawn lo tih pawh

hriat loh pawh nasa takin NLUP atang pawhin kan ti a, thil dang eng eng emaw pawh kan ngaihtuah a. Thil puitling tawh sa a hmun vah tih te chu a thanat thlak lutuk. Chuvang chuan import-export chungchang hi kan zirchian a englai chu nge a mutan tih chu kan hriat chian lehzuai a ngai. Vawiiinah he paper atang a lan dan ka rawn sawi mai a ni a (DEPUTY SPEAKER : Le, tih tawp tum rawh le) a aia chiang zawk te pawh kha a la awmin ka ring. Pu Deputy Speaker, ka lawm e.

DY. SPEAKER : A fiah tawh e. Awle, N.K. Chakma.

Pu NIHAR KANTI CHAKMA : Pu Dy. Speaker, ka lawm e. Vawiiinah senior minister pahnihte demand sawiho a ni a. Pu Dy. Speaker, a hmasa ber in Demand No.16-na ah sawi ka duh a. Home Deptt. hmalakna in Tlabung Police Station sak hi kansa zo tawh a, a lawmawm ka ti khawp mai. Department chungah leh a bikin Minister chungah pawh lawmthu ka sawi a ni. Pu Dy. Speaker, nangmah kaltlangin a, Minister ngei hian hawng thei se tih hi kan beisei a ni.

Kan hriat theuh angin, bial ang zawng te pawhin sawi ta ila, ka bial No.35, West Tuipui Constituency hi sensitive area a ni a, border area a ni bawk a. chuvangin department te pawhin chak taka hmalak ngaihna area a ni a. A bikin sawi ta ila, motor hi an nei tha vak lova, law & order maintain nan a pawimawh si a. Chuvangin, Minister zahawm tak hian motor leh speed boat te pawh, (tui kawng te pawh a awm ve tho si a,) law & order maintain nan min ngaihtuah sak thei se tih ka sawi duh a. Fencing chungchang hi Pu Dy. Speaker, niminah pawh kan sawi tawh a. A wind up a, hei hi Revenue Minister purview a ni miah lova, vawiiin ah pawh ka sawi duh chu, tunah Indo-Bangladesh border fencing tih mek a ni a, 80% zawh tawh a ni a, 20% a la bak a. Hemi Indo-Bangladesh border avanghian harsatna tam tak ka bial chungah a thleng tawh a. A guideline sawi dan chuan, Zero point atangin 150 yards ah Indian territory hi fencing tih tur a ni. Hemi a nih avangin thenkhat India ramah thui deuh an rawn lut a. Chuvangin Pu Dy. Speaker, ka ngaihtuahna ah chuan Mizoram hian border area 318 kms a nei a, ram

engzat nge kan chan ang tih hi ka ngaihtuah thin a. Entirnan, ka bial chhungah hemi fencing vang hian khaw tam tak bifurcate (then) an ni a. Pu Dy. Speaker, i remtihnaa ka sawi duh chu, entirnan Khojoisuri te, Kalapani te, Chaldobighat te, Lokisuri te, Tipperaghat te, Nunsuri te, khaw then an ni a. Hei hi fencing hung zawh hnu chuan Central Force te an strict viau dawn a ni. Chuvangin, khumi pawnah tam tak sorkar asset tam tak te pawh kan nei a, sikul te, PHE etc. te. Khami tih zawha an resettlement na turin ngaihtuah miah lovin fencing hi tan a ni a, hei hi chu pawh ka ti khawp mai. Hemi chungchang hi min ngaihtuah sak thei se ka lawm hle ang. Border fencing hi 318 kms laih tura ruahman a ni a, Mizoram chhungah Zero point atangin 150 yards. Hemi ram zawng zawng hi ram tha lai vek a ni a, miin eizawna nghet an neihna hmun a ni a, tihchhiat nual a ni. Chubakah, Revenue Department in, Ward No.2009 hi tun thlengin compensation a la fel lo a, pawh ka ti khawp mai. Minister zahawm takin hemi chungchangah hian hma min lak sak thei se ka han ngen duh a ni.

Pu Dy.Speaker, Demand No.31-na, Agriculture Deptt. hi sawi ta ila. Economics Survey 2015 – 2016 hi en ta ila, tun thlengin Mizoram hi ei leh barah hian kan la intodelh miah lo a . Tlabung sub-division hi agriculture-ah hian potential area a ni a. A Deptt. te pawh hi an fakawm khawp mai a, a hma an la nasa khawp mai a, a bikin official staff leh Minister chungah pawh lawmthu sawi ka duh a.Lawmthu sawi ka duhna chu ka bial Diblibagh-ah Custom Hiring Centre min dah sak bawka, a lawmawm khawp mai a. Mipui/ farmer-te pawhin an chhawr tangkai hle mai a. Hetiang tho hi hmun dang entirnan, Kalapani-ah te pawh leilet an nei nual, Malsury-ah te pawh min dah sak thei se ka duh khawp mai a.Chubakah Pu Dy.Speaker, ka bial hi agriculture ah, a bikin WRC potential area a ni a. Agriculture Deptt. pawh in hmalakna tam tak a nei a, a bikin ‘land development’. Ka ngaihtuah chu Agriculture Deptt. hian hetiang Custom Hiring Centre ang tho hian JCB min dah sak thei se, kum 5 chhungin Mizoram pumpui a intodelh thei lo pawhin, Tlabung sub-division chhung chu a intodelh ngei ngei ang.

Nikumah khan kan bial hi a vanduai a, tuilianin WRC a tichhe nasa khawp mai a, buh thar a pung thei lova. Pu Dy. Speaker, World Bank chungchang te pawh sawi ta ila. Hon'ble member-te pawhin an sawi nual tawh a, keipawhin entirna ka sawi ve ang a, oil palm 3000 kan phun a mahse, 3000 atangin tunah hian 300 chauh a nung a. Engvangnge kan tih chuan sakuh hian an ei nasa a, Kalapani-ah pawh 100 kan phun ,a a ei fai vek a ni. Chuvangin, Department atang hian oil palm hi hum theih dan a awm lawm ni ? Pawisa sengso in nasa takin farmer ten taima takin an thawk mek a ni a, hetiangsa sakuhin an ei zawh zel chuan farmer-te an beidawng ang a, oil palm hi a fail dawn a ni. Ka area chu potential a ni a, problem engmah a awm lo. Engemaw dah mai mai pawh ni ila an nung tho a nia. Oil palm chu a mak lutuk, hetah hian Deptt. hian min pui thei se chuan ka lawm khawp ang.

Pu Dy.Speaker, Demand No.38, Rural Development Deptt. chungchang hi sawi tawh ila. Pu Dy.Speaker, hemi chungchang hi ka sawi fo thin a, ka bial ang zawngin han sawi ta ila. Ka bial pumpui hi RD Block pahnih hnuaiyah hian kan awm ve a, Bungmun RD Block leh Lungsen RD Block. Problem kan face nasa khawp mai a entirnan, MNREGA chungchang te, IAY chungchang te, development hrang hrang chungchangah Tlabung atangin Lungsen-ah an lo kal a ngai a. Nikhatah an zawh theih loh chuan riahna tur hotel mumal pawh an nei lova, haw leh a ngai a, expenditure hi a tam lutuk, mipui hian an tuar nasa khawp mai a. He scheme hi, rilru leh thinlungah dik taka implement duhna awm se la, implement theih a ni. Chuvangin Pu Speaker, a tawp berah chuan, Tlabung sub-division hi sub-division hlui a ni a, additional RD Block tal hi dah theih dan a awm lo maw? Additional RD Block dah thei se chuan hei ai hian Tlabung chuan hma a sawn ang. Minister zahawm tak hian ngaihtuah thei se chuan ka lawm ngawt ang.

Pu Dy.Speaker, a tawp berah chuan School Education chungchang hi tawite a ka'n sawi duh chu, kan hriat tho angin... (DY.SPEAKER : Nichin khan 'a tawp berah' i ti tawh si a) Ka sawi ngai vak lova Pu Dy. Speaker, min hrethiam ula. Ka bial hi

educationally backward bial a ni a, practical problem hi kan face nasa khawp mai a. A bikin primary level-ah zirtirtu an indaih lo nasa khawp mai a, a tam ber chu single-teacher leh two- teacher school vek a ni a. Chuvangin, Minister zahawm tak hi a efficient a, hmalakna pawh a nei nual a, hemi chungchang pawh hi min ngaihtuah sak thei se ka lawm khawp ang. Aw le, Pu Dy.Speaker, Pu R.Lalzirliana Demand leh Pu H.Rohluna Demand chu ka support e, ka lawm e.

DY. SPEAKER : Dr. K. Beichhua.

Dr. K. BEICHHUA : Pu Dy.Speaker, ka lawm e. Kan Minister zahawm tak pahnihte ram tana hma an lakna nasa takah lawmthu ka sawi a. Demand No.7-na siamthat ngai lai ka rawn sawi dawn a ni. Tuna Mizoram dinhmun hi, Excise & Narcotics lam deuh bik han thlur bing ta ila, a dark side a thlir chuan a mangan thlak viau a ni. Chutihlai chuan, Excise & Narcotics Deptt. tan a lehlam takah chuan a challenging viau in ka hria a.

Kan ram dinhmun hi ngaihtuah ta ila, tun kan dinhmunah chuan zu dan lova kan khuahkhirh theih loh, wawiinah khuahkhirh ngai tam tak a awm a. Chulovah, ruihhlo tam tak kan ramah hian a hluar em em a ni, tunah hian, chung zawng zawng enkawltu leh vengtu Deptt. an ni a. Hei hi kan Minister zahawm takin Pu Dy.Speaker,min hriatsak se, rilrua pawimawh ka tih deuh chu ka Excise Deptt, hi deptt. lian a siam chi a ni tlat a ni, tuna kan context ngaihtuah hian. Tuna ka Excise Force hi kan ram dinhmun, kan harsatna sukiang tur chuan a te deuh tlat a ni. Chuvangin, Excise Deptt. hi tih len ni se tih kha Pu Dy. Speaker, ka rawtna a ni a.Dik tak chuan wawiina Excise Deptt. hlawhtinna ang a kan ngaih te, sorkar hlawhtlinna ang a kan ngaihte hi heng kan NGO, YMA, chhim lamah chuan YLA, MTP leh CAY kan tih ang chi te hmalakna hian nasa takin kan chhe lutuk tur hi min veng a ni. Chutihlai chuan ka rilrua lo lang chu, heng NGO- ah te hian tun aia tha lehzual hian siam ila, incentive-te pawh hi tihsak ta ila, tuna aia chak zawk leh phur zawkin anni pawh hian ke pen thei se. NGO

atang chuan hlawh neilo leh sum neilo chuan hmalak hi har tak a ni a. Misual pakhat um tur ringawt pawhin motor pakhat hman man hi to tak a ni. Chuvang chuan, heng ho hi thuam chak ila, tuna kan hmalakna hi a chak zawk ang tih kha ka rilrua lian taka ka neih a ni a, chu chu kan Minister zahawm takin min hriatpui se tih kha Pu Dy.Speaker, ka rawn sawi duh a ni.

Demand No.16-na, Home Deptt. chungchang han sawi leh ta ila. Kan police-te hi misual an awmlo in ka hria, an tha viau in ka hria. State dang police-te nena khaikhin hian an tha viau a ni. Chutihrua chuan, enkawl dan a zir hi a ni khawpin ka hria a, sorkar-in kan enkawl dan ang ang a discipline tha tak, thuawih tak an nih avang hian tuna kan dinhmunah hi chuan (hmanni lawk ah question-ah engemaw chen kan inhnial tawh a, zu-ah bawk hian). Kan police-te zu kan chelek tir dan hi chu en that a va tul em ka ti a ni. Zu kan zawrh tir a, chanchinbu-a a rawn lan dan ah te pheii chuan nikhat leh a chanve dan-ah police pakhat zel an thi tih te khan rilru a ti na a, kan police te chung a thleng tur atan chuan tuman kan duh lo a ni. Chuvang chuan, force lam tih dan zulzui-a kan tih dawn chuan kan police te pawh hi zu quota siamsak mai ila. Kar khat-ah um khat emaw, um hnih emaw sipai ho tihdan angin a free te pawh hian tihsak mai ila, tuna kan zawrh tir dan ang style hi chu tha lo ka ti viau a ni Pu Deputy Speaker. Chuvangin, hei hi kan Minister zahawm tak hian min lo hriat sak se, tih dan kawng thar te pawh min ngaihtuah sak se tih te kha ka ngenna a ni a.

Tin, ka bial lamah hian Saiha Police Station khian motor 1 te chauh (Sumo) kan nei a ni. Chu pawh chu running start a tihnun ngai chi a ni a, misual han um tur chuan running start chhung khan khawng a thlen ang tih kha, a thlen tumna ram kha a thlen a rinawm a ni, chutiang dinhmun ah chuan kan awm a. Kan Police Station a kan motor khi khawngaih takin a thar min pe se tih kha ka ngen duh bawk a. Tin, kan S.P. Office te, kan quarters zawng zawngte pawh khi hmelma hlauh ai chuan thli hlauh khi a na zawk a ni,

tlangchhip-a quarters chhe te te khi an ni hlawm si a. Chuvangin, khing lai khi khawngaih takin kan Home Minister zahawm tak hian min enthat sak se, siamthat dan kawngte pawh min dap sak se tih te ka ngen duh a.

Tin, Saiha jail khi 1972 U.T. laia sak a ni a, tunah chuan a tla bal tawh lutuk a ni. A building a tla bal a, a hungna te pawh khi barbed wire a ni a, a tuiek deuh vek tawh a. Kan jail tangho khi an fel hlauh a, an tlanchhuak lem lo mai mai a. Tunhma deuh kha chuan a then chu in ah an va haw a, zan lamah jail -ah an lut leh mai a, chutiang deuh vel chu a ni a. Khawngaih takin khilai khi min enthat sak se. Superintendent office pawh khi fur ah chuan a thutna tur hi khawiahnge tih ngaihtuah a ngai a, ruahsur far nasa lutuk hian thutna mumal pawh hi a nei hlei thei lova, chutiang dinhmuna awm chu kan ni a. Khawngaih takin khi khi min enthat sak se, a staff te leh jail tangte khi an fakawm viau a ni. Co-operation a tha a, an tlanchhuak lo mai chauh a ni tih kha Pu Deputy Speaker ka sawi duh bawk a. Kan Home Minister in khawngaih taka min chhinchhiah sak a, hma min lak sak kha ka ngen bawk a ni. Thil pakhat pawimawh deuh ka rilrua awm ka sawi duh chu, India ramah hian khawi hmunah pawh hian hel ho vanga election an tih theih loh hi keima knowledge-ah chuan ka la hre lo a ni. Naxalite-ho hel na hmun ah pawh hian election an postponed a, an tih loh hi awm in ka hre lova. Chutihlaia kan rama V.C. 31 kan la inthlang theilo hi chu pawl ka ti a. Mahse tunah chuan sorkarin notification a chhuah tawh a, tluang taka kan inthlan pawh beisei ila, hei hi a pawl hle in ka hria.

Pu Deputy Speaker, Demand No. 31-na Agriculture hi han sawi ta ila. Kan budget-ah khan sum a tam zia chu kan hmu theuh a, kan Agriculture dinhmun ngaihtuah hian U.T. kan nih atangin kum 43 a ni tawh a, state kan nih atangin kum 32 ani leh tawh a, chutihlain mega block kan ti, khawchhak lam atangin buhfai kan ti, hei hi chu Pu Dy. Speaker, tunlai khawvel atan chuan a

zahthlak deuhhlek tawh in ka hria a. Agriculture heng buh thar theihna awm chi chhim leh hmar chhak leh thlang leh kan ram khawilai hmun kilkhawr ber pawh hi explore a, buh chinna atana kan siam a, tun aia nasa zawka hma kan lak a, a tul chuan mechanise vek thei tura kan tih hi a va tul em tih hi ka rilru ah a awm a ni, Pu Dy. Speaker.

Tin, Demand No. 38-na Rural Development kha, Rural Development-ah hian sum a tam, hmalakna pawh hi a tam, chutih laia ka ngaih pawimawh em em chu a monitoring lam hi kan ti tha lo deuh in ka hria a. Kan hmalakna hi diktak chuan visible assets, assets puitling han tih tur hi a vang viau in ka hria, District hrang hranga han kal pawh hian. A bik takin keini District ang ah phei chuan Autonomous District Council area-a awm tan phei chuan kan politics lak dan hi a tak leh zual a, opposition leh ruling inthliarna hi a na teh a nia, tui pawlh loh ang kan ni a. Chuvangin heng R.D. atanga kan sum hmuh ang chi te hi a nihna tur ang taka kan hman leh hman loh hi state sorkar pawh hian uluk taka min monitor hi a pawimawh hle in ka hria a ni. BADP te, BRGF te leh Central Sponsor Scheme atanga sum kan hmuh ang ang te hi a nihna diktak ah chuan kan hruaitute hian JCB te nen hian an lo chang emaw tih tur hian a kal a ni, a kal sual viau a ni. Chuvang chuan khawngaih takin, helai hi kan Minister zahawm tak hian min enchian sak se tha hle in ka hria. Pu Dy. Speaker, hun a tawp ta em ni (DEPUTY SPEAKER : Tawp tawh) sawitur ka la ngah viau a, mahse ka dil belh lo mai ang che. Hun dangah ka dil belh dawn che nia. Ka lawm e.

DEPUTY SPEAKER : Pu P.C. Zoram Sangliana.

Pu P.C. ZORAM SANGLIANA : Pu Deputy Speaker, vawiin-a kan hotu zahawm tak tak Minister 2 te demand-ah hian a Demand tin a sawi tur a tam vek chungin pahnih khat chauh ah hian chen bik, kan duh deuh a. Demand

No. 38-na Rural Development Department ah hian keini, BADP nei ve lo, PD leh BDO kaltlanga development nghakhlel taka lo thlir ve tute kaltlanga hnathawh nasat thin zia te, pawisa tam zia te, ka Unstarred Question pek chhanna ah, Bilkhawthlir BDO in, Kolasib bial bik chauh tana a sum hman kumkhat chhunga a tam zia pawh helai kan dawhkan tinah pek kan ni a. Chutianga tam ah chuan, he department hi thingtlang/ zokhaw mi te tan malsawmna an ni a, lawmthu kan sawi duh a. Hemi ah hian sawi tur tam tak a awm, he department hi a hming ang ngei hian thingtlang/zokhaw tan chuan kan nghahfak a ni tih hi kan sawi duh a ni.

Demand No. 7-na Excise & Narcotics ah, hian a hminga he department lo enkawltu ka nih ve laia sorkarin a lak bak kha a hu hova lak an awm leh lo niin ka hria a. Chuti chung chuan, sipai leh officer 270 emaw chauh lak te avangin mipui leh khawtlang in a himna, malsawmna kan nei a, tin, NGO te an thawhpui thiam bawk a, kan NGO lian YMA te nen hian an in hne hnai em em a. Malsawmna nasa tak mipui, khawtlang tana himna min pe hi lawmawm ka ti a ni.

Demand No. 16-na Home including Prison & Sainik-ah hian, Home bik ang zawng hian han sawi ta ila. Tun tumah hian ka hriatsual loh chuan post ruak ringawt pawh hi 1300 chuang daih an nei niin ka hria a. Chanchinbu leh Whatsapp te, Facebook te a kan lo chhiar ve atanga kan lo hmuh ve dan ah pawh, tun kumah ringawt pawh hian 130 nunna chan an awm tawh niawm takin kan lo chhiar in, kan lo hmu a ni. Kan ram in a tawng tur kan hre miah lova, Law & Order problem hi tawng ta ila, vawiina kan police dinhmun, hmun ruah tam em em mai nen hi chuan an veng hneh lovang. Hman deuh lawk khan veng pakhat-ah Police te leh Civil mite innawrna a awm a ni. Chuta police pakhat in a sawi ka hriat chuan, ka rilru a khawih khawp mai a, 'heti khawp a police in

civil mi kan hnen lohna, kan tlawm chianna kha ka la hre ngailo reng reng, police ka tan tawh hnu ah hian,' a ti a ni.

Pu P.C.ZORAM SANGLIANA : Civil mi, ralthuam nei pawh an ni lova, anni pawhin ralthuam an chelek bik lo na a, an tlawm hneh hle a ni tih, police pakhat in a sawi a. Chutiang a nih laiin chungte chu problem lian tham pawh a la ni lo zawk a, i ti teh ang. Law & Order problem lian zawk te, harsatna tam zawk te hi lo thleng ta se, kan police-te an huaisenna te, an rinawmna te, ram tana an inpekna zawng zawng te kan zu dah hniam lam ni lovin, tichung hi chuan min veng tur an awm lo tiin sawi ta ila a dikin ka ring a.

Chutah chuan, Pu Deputy Speaker, kan Home Minister zahawm tak hnen a i Chair kaltlanga ka'n ngen duh chu, session zawh veleh hian Cabinet Memo-te hi buatsaih thuai thuai se, Police Deptt.-a post ruak lak khahna hi sawrkar hian rawn siam vat mai sela, training chhung nen, han tih chhung nen, a va pawimawh e aw, te hi ka ti a ni. sawrkarin hemi hi ngaihawh ah rawn nei se. Police officer pakhatin min hrilh hi police-te dinhmun a ni a, kaisan zawng zawngah chuan constable atanga naik-a kaisan a nuam ber an ti a ni, constable atanga tan ho officer ni tawhte pawhin. Enge a chhan? Zandar 12 ah, thlasik khawvawt hnuaiyah, ruahsur hnuaiyah thiante'n min rawn kaitho a, 'Thianpa, i duty a hun e' an han ti ngat mai hi chu, naik kan han nih ni atanga bo ta kha a ni. Vawiinah chuan constable-ah post ruak a tam si, Constable hna kha naik-te, havildar-te, hmun thenkhatah phei chuan arsi kaite pawhin an khawih a ni. Chutiang chu a ni a, kan ngaihtuahna kan sen pawh a tul a, pawisa kan neih ang ang te, hemi hian a daih dawn lo a nih pawhin, nakina Session kan neih leh hun pawha pek belh leh turte pawhin consider an pawimawh ka ti tak zet a. Chuvang chuan, he Deptt. hi, nichinah MLA zahawm tak takten an sawi tawh a, min veng turten min rawn pe a, MLA-te, Minister-te, kan zavaiin, helaia sawi thinte ho leh midang tam tak pawh, chung ang zawng zawngah te chuan an indaih lo em em a ni tih te kan hriatpui rualin, vawiinah hmun thenkhat,

report an dawn afimkhur ngei tura an ngaih ah te hian min vengtu tur pawh hi min pek duh mah se min pe thei lo.

(DEPUTY SPEAKER : Chair kan han inthlak lawk ang.

SPEAKER : Awle, sawi zel rawh le.)

Pu Speaker, ka lawm e. Chuvang chuan, he Deptt. hi a bikin kan en a ngai ka ti a ni. Vawiinah hetiangah kan tih loh chuan law & order, ti zawng hian ka sawi thin a, India sorkar in Look East Policy a ti emaw, Act East Policy a ti emaw, a tih zawng zawng hi min hmangaih vanga min pe a nih chuan a lawmawm ngawt ang. Kei ka thlir ve na ah chuan China ral hlauh vang hian theih ang ang hian min duat ni mai hian ka hria a. Chulai takah chuan, heng ah te hian central sorkar atanga sum leh pai chawkh luh dan hi zawn ni sela.

A bik takin hmeichhe battalion-te pawh hi kan din a va han hun tawh emaw, ka sawi nawn fo duh a ni. Pu Speaker, kan state thenawmten hmeichhe battalion an nei a, India ram aiawha duty turin Naga hmeichhe police tluka tha an awm lo te an ti a. Chung chu Mizo hmeichhia, kan nula te pual in bethiam ni ila, Mizo ne pawh hi an ek lo ang tih ka chiang a ni. Chuvang chuan, heng angte pawh hi kan Minister zahawm tak hian Session zawh atang hian, hma han la thei se tih hi ka'n ngen duh a.

Demand no. 20-na ah hian han kal nghal dawrh ka duh a, School Education Minister zahawm tak chanah hian. Pu Speaker, vawiinah hei Unstarred Question no. 70-na kan dawhkanah min rawn pe hlauh mai a, lawmawm ka ti khawp mai a. Heta ka Unstarred question min rawn pekah hian 'Tun ministry chhunga School Education Deptt. hnuaia zirtirtu hrang hrang awmna atanga sawn chhuah, an school hlui leh sawn chhuahna thar, sawnchhuah an nihna chhan'. Ka zawnna ber lai chu sawn chhuah an nihna chhan hi a ni. Ka theih ang angin hemi atang hian ka'n belh khawm a. Pu Speaker, lecturer atanga Higher Secondary School atanga Primary School thlenga zirtirtu kan

sawn chhuahte hi 459 a lo ni a. Chu 459 atanga sawn chhuah chhan chhanna lai hi min khawih lai tu chu a ni a. Chumi a 68%, ka thiam dan ang ang ka chhut, 312 te hi family problem, health problem an nia. Vawiihah kan Minister-in thiam takin MLA-te, a Deptt. ah mawh min han phurhpui tir a. MLA tan pawh, Minister tan pawh, Deptt. tan pawh tih hleihtheih loh khawp a tam si.

Chuvang tak chuan, heng zirtirtu bikah hi chuan, Aizawlah competitive exam kan han ti a, thingtlang nula tlangvalin khawpui, Aizawl chang ni lo, India khawpuia school tha ber ber, institution tha ber bera zirchhuakte kan tluk ngai dawn lo. Post chu an han dawng mai, thingtlang kilkhawr tak takah an rawn kal a, an kal atanga reilote ah, thla 2-3 ah an han hrisel lo tan a, sawipuitu tha tinreng hrang hrang nen kan Minister leh MLA-te min dawr hut hut a. Kan Minister-in MLA-te ah ball a rawn vawm si a. Chutah chuan MLA leh MLA-te kan harsatna inhriatthiapui chuan an post an kalpui baw si a. Chumi a nih avang chuan, helai takah hian ngaihtuahna kan sen pui tha in ka hria.

Pu Speaker, nimin lama Health Department a ka sawi tawh ang khan, a bik takin School Education-ah hian inhriatthiamna in khawtlang hotute leh school management enkawltute leh sub-division a ni emaw, district a enkawltute nen hian aikal kan phalsak an ngai a ni. An khaw nula, an khaw tlangval aikal turin ti ta ila, Aizawl nula tlangval awmna hmunah khan. Chunga aikal tur a nih chuan khawtlang tan khaw nula leh tlangval, sawrkar atanga hlawh la neih tharna ni baw, kohhran thleng pawhin Pathian ram pawh a rawn pun phah dawn a ni. Chutiangte a nih avang chuan tha hlir hi ni mai hian ka hria a. Vawiihah remhre taka MLA-te min han punna, min han mawhphurtir a transfer chungchangah, chutah pawh thenkhatte phei chu, Pu Speaker, an post an kalchhuahpui dawn miao avang khan family problem, an life atan pawha harsatna an tawh chung pawhin kan Minister-ten sawn chhuah duh mah se, Deptt.-ten sawn chhuah duh mah sela, chuta tanga sawn chhuah tur neitu khawtlang leh bialte khan kan lo ui ve leh thin a ni.

Tin, a policy hrim hrimah hian, an awmna hmunah, tunlaih te chuan puihiamte pawh an post-ah awm hunbi an nei thei tawh a. Chutiang chiah chuan, zirtirtute pawh hi awm hunbi te hi siamsak ni ve ta sela, kum 5 an awm chuan, kum 4 an awm chuan, Deptt. hrang hrangahte chuan, entirnan, Chhimtuipui District-ah chuti chen an awm chuan, Lunglei ah chuti chen an awm chuan ti ila, tunhma district 3-a kan awm laite khan an ti thin a. Khatiang khan chuti chen an awm ang, chuti chen an awm ang. Chutiang chuan hard post kan tih, rural area-a awmte ang hi an awm tur hunbi te hi siamsak te ni sela. Chungte chu heta tan hian ka'n ngaihtuah a, transfer rule pawh siam a ngai a ni

Zo khua ten kan aurawl chu, sawrkar hmasa atangin world class education-te siam kan tumin, education-ah pawh Commission, kan Chief Minister leh khatih hunlaia kan Education Minister zahawm takte khan, India rama a ber berte chu Commission-ah pawh chuan member-ah an la chhuak in, an report-te pawh thehluh a ni tawhin, kan lo hmu tawh a. Mahse, Pu Speaker, world class education neihna tur atana bul tanna atana kei ka ngaih ve tlat chu, khua-ah naupangten, khaw kilkhawr ber pawh ni mah sela, veng kilkhawr ber pawh ni mah sela, hlim takin chutah chuan an zirtirtute nen, engtiknge khawpuiah Aizawlah, Lungleiah ka haw thlak ang tih ngaihtuah miah lova, Sunday School lamah pawh zirtirtu an ni zui dawn a ni tih hria, khawtual nula leh tlangval hian enkawl ni sela, world class education bul tan nan chuan a fuh ang tih hi ka ring tlat a.

Chuvang chuan, helai bawrah hian ka ngaihtuahna ka seng tak tak a, pawisa kan neih ang ang, vawiiinah Finance Minister-in Deptt. tinah a rawn pe tawh, a beitham, a tam, ti a sawi ka tum lo. A awmchhun ang ang leh nakinah RE-ah pawh pek belh leh tur zawkin, huaisen takin, a bik takin, vawiiina, demand neitute Minister pahnih te hian Home-ah leh School Education-ah hian, hma rawn la ngam se ka ti tak meuh meuh a. Chu chu member tin pawh hian Minister phurrit kan lo chhawk ve na tur niin kei ka hre tlat a. Helai bawr hi thahnem ka ngai em em mai a ni. Chutiang zel chuan,

(SPEAKER : I hun i hmang zo) Aw, ka'n khaikhawm ang e. Heng Deptt. dangte hi ka ngai pawimawh lo a ni miah lo. Keini district tan te phei chuan Agriculture Department-te hna thawh chu kan inchhuanna an ni a, an hmalakna te hi sawitur a va han tam. He Deptt. kaltlanga thiltha kan hmuh leh thar chhuah te hi, darkar 1 hun min pe ta la, Pu Speaker, sawi tur ka hria ang, chung te chu kan sawi hman lo zawk a. Helai bawrah hian min hrethiam sela kan minister te pawh in. Heng kaltlanga hma an lakna chi hrang hrang te; tin, Industry Department leh Trade & Commerce Department kaltlanga hmalakna te hi lawmawm kan ti a. Chuvang chuan, wawiinah hian kan department neitute pahnih Pu R.Lalzirliana leh Pu H.Rohluna te demand hi lawm taka pass pui duh chung in khang te kha rawn titel ta sela, aiawh kal te kha rawn phal ta sela aikal te kha. Tin, a hlawh te pawh `10,000/- in hlawh ang te pawh ti mai sela, School Education lamah. Chutiang in police lamah pawh keimahni min vengtute an ni tih hre ran hian tih leh ah chuan heng hnathar lak chungchang te hi lawmthu sawina House ah tih theih beisei chungin ka rawn thlawp a ni tih hi ka'n sawi a ni e. Ka lawm e.

SPEAKER : Awle, Pu Vanlalvena.

Pu R. VANLALVENA : Pu Speaker, ka lawm e.

Kan minister zahawm tak tak pahnih Pu R.Lalzirliana leh Pu H.Rohluna te demand wawiina sawi theia ka awm hi lawmawm ka ti a. Pass a nih theihna turin ka support a ni tih a hmasa in ka sawi duh a.

Demand No.7-na Excise & Narcotics-ah hian a hmasa in tan ka duh a. Zu hi kan hria a, kan vei tlang khawp mai a. He sorkar pawh hian zu hi a vei a ni tih kan hriat avangin duh vang ni lovin mamawhna avang leh ram leh a mipui te hmangaihna avangin wawiin ah hian zu kan zuar a ni tih kan debate hmasa ah pawh chiang takin kan sawi tawh a. Wawiinah pawh hian chu chu kan rilru ah lian se a tha in ka hria a. Zu hi tuman kan sawi mawi lova, kan duh lova, awm lo se kan duh a. Mahse a loh theih si lo a, sual kan hneh lo a, chu chuan min buan a, kan ram ah harsatna a thleng a ni tih kan

hrechiang tlang a. Keini helaia Pu Speaker, a hminga MLA 40 rual te hi chu kum 5, kum 6, kum 10 dawn lai mahni bial ah ngun thluk taka lo kal kual thin, chhungkaw tam tak tlawh a, mitthi te ral a, damlo te kan a kal thin kan ni a. Tah chuan, zu zawrh a nih hma a zu avanga thi an tam zia hretu chu kan ni vek a ni. Khatih lai khan mi an thih in zu vang an ti ngai lova, ngunthluk taka han kawm a, an chhungte nen han sawi a, han ti ti kauh kauh chuan zu vang alo ni leh thin. Mahse zu khap a nih avang khan zu vanga thi an ni tih kan sawi ngai lo. Zu zawrh a nih dawn khan kan hotu zahawm tak tak ten Pu Speaker, an sawi thin chu zu hi kan zawrh chuan vawiina mitthi tam tak zu vanga thi an nih an sawi loh hi nakin ah chuan zu vanga thi tiin an rawn sawi ang a. Chung zawng zawng chu sorkar hian a mawh kan phur ang a, kan tuar dawn a ni tih hi an sawi lawk a ni. Chumi a nih avang chuan tuna zu zawrh a nih tak avang hian zu vanga thi hi an pung hlut lova. A hmaa zu vanga thi nia kan sawi thin lo kha vawiinah chuan zu vanga thi nia kan sawi tak thin avangin an tam hmel mai zawk a ni. Chuvangin, Pu Speaker, kan hotuten zu tha lo in a mi tam tak an thi thin hi heti zawng hian a chhan chhuah theih dah lawm maw tiin tun ah hian hreh tak chungin zu an zuar a, zu tha hi in se kan thalai te hian an thatpui zawk ang. Vawiin chauh thlir lovin kum rei tak thlir in kan hnam hian hmasawna kawng a zawh ang a. Kan thalai te hian hmasawna kawng an zawh ang a, helai state nilo state danga an kalin a tam tho si a; chuvang chuan, hma kan sawn thei zawk ang tih an hisapah a tel a ni tih kha thu hmahruai ah ka'n sawi duh a.

Excise Department hi tihlen a ngai khawp mai a. Tun ah hian Excise Department tihlen a ngaihzia a hretu ber chu a Department changtu minister zahawm tak hi a nih ka ring, ani pawh hian tihlen a duh hle ang. A thawktute pawh hi zawt ila, an indaih loh zia leh tihlen an chak zia chu a sawi thei ber an nih ka ring. Ama'rawhchu, chutiang dinhmun ah chuan ding mah ila, kum rei tak atanga kan ram kalphung kan thlir in kan finance position a tha thei si lova. 1948 te, 1962 te, 1965 leh 1974 bawr vel ah India leh China an intithiam lova, ram venhim a tul avangin sipai an la a, sipai an tipung a, kan hria a ni. Ram ven ngai dinhmun te a awm avangin min sipai an la thin. Keini chu kan hria a, kum 8, kum 9 lek kalta ah election-a kan tlin duh vang te nge ni kan finance

position ngaihtuah si lovin IR kan la pawp pawp mai. Chu chu a dawt leha sorkar in a a mawhphur a ni. 2001 CAG report kan en chuan kan pawisa lakluh kha mi 1-in `100/- lalut ni ila, `106/- zel hmang ang kan ni. Chutiang dinhmun khawp chuan khatih lai khan kan finance position a chhia a. Tunah kan sorkar kan Chief Minister te kaihhruai na avangin kan Finance minister te leh kan senior minister zahawm tak tak te min kaihhruaina avangin kan Sorkar sum dinhmun an tha chho hret hret a. Excise te, police te pawh hi lak belh theih a nih leh nih loh chu kan hotute hian an en ang a, lak belh chu a chakawm ngawtin ka ring. Kan excise dinhmun kan en chuan sawlai Vanapa Hall hnuaiah sawn office an nei a, An office saw han en ila, han luh pawh sawn a rimchhe em em mai a. Sawlaia chhun zan zawm a awm saw chu hrehawm tak tur a ni. Darkar 1 lek va luh pawh sawn an tawt a, a rimmtui lo a. Hriselna atan pawh tha lo thei tur khawp dinhmun ah an office saw a awm in ka hria. Chuvangin, tunah hian ka hriatsual loh chuan ZENICS ram saw an dil mek in ka hria a. Sawng te saw han luah chho thei se insawn chho thei se'ng chuan kan force te pawh hian hrisel nan te an hman phah ka ring a chu chu kan sawi kai tel duh a ni.

A dawt lehah chuan, Home Department chungchang hi nichin khan Saiha bialtu zahawm tak khan a rawn sawi tawh a. Police office that loh zia te a tawp zia te, siamthat a ngaih zia te nasa tak in a rawn sawi tawh a. Kan Home Minister zahawm tak hnuaiah kan Forest Minister zahawm tak Parliamentary Secretary-a a awm lai khan kan zin dun tam a. Ka zui nasa a, a sawi ka rilru a la awm reng chu khatih lai khan RD nen an la kawp a. 'RD leh Police office kan han tlawh tawn a, RD in building tha tak tak, office tha tak tak an nei a. Kan Police te office leh an chenna hmun hi tlawh pawh hrehawm khawp hian a chhia a,' a ti thin a. An rilru ah a lian khawp mai. Kum rei tawh tak sorkar alo awm a, kum 10 chhung i veilam ami te pawhin Pu Speaker, sorkar na an chelh tawh a. Khatiang hunah pawh khan a tha chuang lova, vawiinah an tha hret hret chho te hi a lawmawm ka ti a. Vawi leh khata tha thut thei a ni lova, theihtawpa hma an lak na avangin office thar an nei zel a, tun a helaia session kan neih chhung ngei pawhin kan hria a. Nimin lawk ah khilai ah headquarters office tur te pawh kan Chief Minister

zahawm tak pawhin a lung a han phum a. Hetianga kan Home Department pawhin hmasawna thar building ah mai nilo decipline thleng pawhin a an nei a. Sorkar hmasa nena khaikhin phei chuan thlamuang taka min muttir thei te hi kan Home Minister te an zahawmin an thawhrimna a fakawm ka ti a, chu chu kan sawi duh a.

Tin, Agriculture ah khan buh kan thar tam kha kan Agriculture department te hmalakna hi a ropui khawp in ka hria a. Kan hria a, tlangram lo neih te hi ti tlem ila tiin nasa takin hma an la a. Tlangram lo neih, lo vah duai duai ang jhumming cultivation ti tlem si in kumdang zawng zawng aia buh an thar tam te hi a lawmawm ka ti a. Chu chu statistic-ah hmuh tur a awm a, buh thar tam si buh tui zawk bawk si, kan Agriculture mithiam ten loneitute hnenah buh chin dan an zirtir a, a chi thlenga an sem thin hi a lawmawm ka ti. Chutih rual chuan leilet a lo tam theihna turin kan minister zahawm tak in khaw khata mi pakhatin nei mai lovin, in hmantawm tura tractor an sem te hi a remhriat thlak ka ti a, an hmalakna hi a lawmawm tak zet zet in ka hria.

Tin, Rural Development Department hi a hming atang ringawt pawh hian thingtlang lam kawka ni tih kan hria a. Hmanni khan kan senior, MLA zahawm tak Pu J.H.Rothuama hian a sawi zawk tawh a, in rilruah a lo awm em ka hre lova. Khawpui MLA te chu kan lal mu khawi hawi vak vak ringawt mai a, mi hmasawna hi kan thlir kan thlir a, keimahniah hian hmasawna hmuh ve tur a awm si lova. Rural Development Department-in hma an lakna thingtlang khaw hrang hrangah Hall te an sa a, kawng te an lai a, agriculture link road te leh thil chi hrang hrang, school building te an sak kan hmuhte hian keini Aizawl bialtute hian kan awt hle thin a ni. Chuvangin, hetiang Minister tha tak mai kan nei a thingtlang lam bialtuten hmasawna an hmu a, a chhunga cheng ten a rah an seng thin te hi a ropui ka ti a, a lawmawm takzetin ka hria, lawmthu ka'n sawi ve duh a ni.

Tin, School Education Department hi nichin khan an sawi tawh a, ka ngaih pawimawh em em pakhat chu, an hmalakna tam tak hi fak dawn ila, fak sen loh a ni, darkar khat pawh hi fak dawn ila hunin a daih lovang tih tur khawpa fak sen loh khawpa hma la an ni a. Mahse, kan lo kal tawh dan hian duhthu a sam lova, vawikhata tha duak thei a ni lo tih kan hria a. Tunhma atangin pre-primary zirtirtu atana lak kha primary teacher-ah an han up thut mai a, khang khan vawiina information technology-a kan chuan kai tawhnaah leh, hmasawna chak tak a mai a thang ah hian kan fate an zirtir a ni a, an tan pawh hrehawm khawpin hmasawna a thang chak a ni si a. Chu chuan kan fate hi kan duhthusamin an zirtir hlei thei lo a ni tih a chiang a, chumi chuan nasa takin kan ram hi min bawhbet niin ka hria a, education-ah hma kan sawn hlei thei lo a ni. Chuti chung chung chuan kan Minister te, kan Parliamentary Secretary te hmalaknaah theitawpin hma an sawn a ni tih kan hria a, a lawmawm ka ti a.

Pu Speaker, tunlai kan hmasawna kal zelah chuan pawl 11 leh 12 Science hi a pawimawh em em a ni tih kan hria a, thil engemaw training tur lo awm se 'pawl 12 science an ni tur a ni' tih hi a nih deuh zel avang hian Science pawimawh zia hria in College Vengah khuan Higher School behchhanin private pawl 11 Science an hawng a, zirtirtu 4(pali) an la dawn a, mi 92(sawmkua pahnih) in an han dil mai chu ka rilru hi a khawih khawp mai. MSc mithiam rual thah 4(pali) lak dawn a 92(sawmkua pahnih) lai maiin an han dil kha. Khatiang khawpa mithiam hna hmulo an tam kha ka lo chhut ngai lo, ka rilru hi a khawih khawp mai a, keini ho a hminga MLA-te, Minister zahawm tak takte leh he sorkar hi min cho in ka hria a, engtinng e kan Minister zahawm tak takte hian an chhanlet dawn ? Pawisa kan neih hun chuan Science zirna bik lian deuh hlek Aizawl khaw chhungah hian din thei ila, job oriented hian kan kal thei mai awm mang e tih kha kan Minister zahawm tak kiangah hian ka'n sawi duh a ni.

Tin, Industry Department hnuai Mining Department hi an te viau na a, an tangkai hle mai a, tunah pawh khan tax kumkhat chhunga an chhunluh kha a tam hle a ni tih kan hria a. Mahse, tunah hian an pachhe khawp mai a, anni pawh hi thuam thar an tul hle in ka hria a ni.

Tin, Home-ah khan han kir leh lawk ila, forensic ho hi an tangkai khawp mai a, kan ramin hma a sawn rualin sualna a tam ve telh telh a, heng sualna te han zawngchhuak tur hian forensic department hi an pawimawh hle a, an hnathawh zawng zawng hi fakawm ka ti.

Pu Speaker, hun tlem ka bawhpelh a i mi ngaihdam ka dil a ni. Pu R. Lalzirliana, Home Minister zahawm tak Demand No. 7, 16, 31, 38 leh Education Minister zahawm tak Pu H. Rohluna Demand No. 20, 40 leh 44 hi lawm taka pass turin ka rawn support a ni e, ka lawm e.

SPEAKER : Pu Lalruatkima

Pu LALRUATKIMA : Pu Speaker, ka lawm e. Vawinah kan Minister zahawm takte pahnih Pu R. Lalzirliana leh Pu H. Rohluna te Demand sawihona hun tha tak mai kan nei hi lawmawm hlein ka hria a.

Demand No. 7- Excise & Narcotics Department hi sawi hmasa ila zu hi kan tuipei niawm tak a ni a. I dinglama thute khanin Pu Speaker, chhiah kan hmu tha bawka, zu tha in tur kan hmu bawka te kha fiamthu khan an han ti a. Kawng lehlamah chuan MLPC Act hi a hlimawm zawnga ngaihtuah chuan hlimawm ang reng tak, inhnialna tam tak siamtute pawh a ni a, chulaiah chuanin a kenkawh kawngah pawh thahnem kan ngaih zual a tul khawp mai a. Zu avang hian society-ah inhnialna nasa tak mai, issue lian tak mai a awm avang hian sorkar pawhin tan kan lak a tul khawp mai a. Pu Speaker, chhiah kan hmuh kha

budget speech-ah te khan kan han en a, amaherawhchu, unstarred question an chhannaah hian Taxation Department ringawt hian vaibelchhe sawmpathum nuai sawmkua leh paruk sangkhat zakua sawmhnih pariat he MLPC Act hman atang hian an hmuh tawh thu an rawn sawi a. Tin, unstarred question-ah tho khan Excise & Narcotics Department hian tun thleng hian cheng vaibelchhe sawmli leh pariat nuai sawmnga leh pasarih sing khat leh sangkhat zahnih sawmthum leh paruk an hmuh thu an sawi bawk a. Chuti anih chuan a vaia MLPC Act atanga January thla thleng a kan hmuh tawh belhkhawm chu vaibelchhe sawmruk pahnih nuai sawmnga pathum singkhat sangthum za sawmruk pali zet mai a ni a. Sumdawng rilru atang chuan 10% emaw kha tax -ah hian kan pe anih chuan 500 crore chuang hi state pawnlamah, zu manah hian a liam mai dawn anih hi tihte pawh a ngaihtuah theih a, chulai chu kan hriat zau nan kan sawi tel a.

Nizan lamah whatsapp lamah thil thlengte kan han hria a, a pawl khawp mai a Hualngohmunah zu dawr mi thenkhatin an suusam tih te kan han hria a. He thilah hian venhimna kawngah te pawh chak leh zuala tan kan lak a tulin ka hria a. Tin, chutih lai chuan ruihhlo man tur a tam em em mai a, nitin kan chanchinthar hriat chu ruihhlo man a ni a, pseudophedrin te, meth kan tih ang chi te leh no. 4 te, kan NGO a bik takin Central YMA, SRS ten nitin ruihhlo an man thawm kan hre ta reng mai a, hengte hi a tihrehna turin theihtawp kan chhuah zual a ngai a. MLPC Act lamah hian, a kenkawh lamah hian kan lo tui lutuk deuh ang a, Champhai velah te khianin check gate siam ta ila, Aizawl rawn thlenglo hi tam tak a awm ang, Aizawl rawn thleng chauh an man si a. Chuvang chuan tan kan lak a tul takzet zetin ka hria a, NGO kutah hian kan lo inngat lutuk ang a, ruihhlo do kawngah hian kan lo muthlu mai ang tih hi ka hlau takzet a ni.

Demand No. 16-na Home-ah khan han lut leh ta ila. Pu Speaker, Police-te hian ration money hi ` 600(cheng zaruk) an dawng a, Police Training

School-ah te an va kal a ₹ 2,000(cheng sanghnih) thla khatah hian an chawi a ngai a ni. An ration money hi a beitham em em a, a hming chauh tak tak a ni a, tihpun theih ni ta se a lawmawm hlein ka ring a.

Pu LALRUATKIMA : Nikum tun hun ang khanin Zokhawthiang daia kan Police te, kan MLA rual han kal te an lo lambun misual in, chutiang angah chuanin nichina kan Member zahawm takin a sawi tawh ang khanin, khata police duty te kha vawiin thleng hian reward pawh la dawng lo, la pek loh an ni a. Session-ah pawh hian vawi engemaw zat ka sawi tawh a, pek theih ni se chuan, an duty a an pute chhanin theihtawpin an bei ve a. Chuvang chuan heng ang duty hah tak tak te hi reward pek theih ni se tih kha ka sawi duh a ni.

Tin, vawiin thlenga kan hri vei chu Police Officer kum tam tak lo pension tawh hian Orderly leh Driver tun thleng hian an la kawl reng mai hlawm a, kan Minister zahawm tak pawh hian a hriain ka hria a. Chuvang chuan heng ang ho hi an hming hmerh chuan ka sawi dawt lovang ama'rawhchu, anmahni an inhriain ka hria, an kawl rei tawh khawp mai a. Police kan indaih bawk si lova, hengte hi chu kir ve tawh se a awm tawh viauin ka hria.

Tin, Vairengte Check gate khu session a kan sawi tawh ang khan strict lehzuala kan enkawl a ngaiin ka hria. Ka thu dawna hi a sual loh chuan two wheeler te hi a bo nasa a, ama'rawhchu, check gate-ah khuan two wheeler lut leh chhuak kha an lo enter ngai reng reng lo mai a. Khatiang te a nih chuan two wheeler bo hi khuta tang khu chuan an hmu chhuak thei dawn lo a ni a. Chuvangin kan Minister-in min chhinchhiah sak se a tha in ka hria a ni.

Tin, Private Member Resolution Home-ah hian pahnih kan passed tawh a, hemi te pawh hi eng chen nge kan kal, eng chen nge hma kan lak tih

te pawh hi khawngaih takin han inhriattir ve thin te pawh hi a tha khawpin kan hria a. Tin, thil pawl tak mai chu tunhnaiah kan police ten Uniform ha chungin harsatna an tawh tih kan lo hria a, a pawl khawp mai a hengte hi tu mawh nge, enge a chhan tih hi kan society hi kan inenlet a, kan Police lam te pawh kan inenlet a ngai tlangin ka hria. Tun hnuah hetiang ang thil duhawm lo kan police te dan leh dun kengkawh tute an ni a, chung ang te chu mipuite hian zah kan inzirtir ve tur a ni. Chumi kawngah chuan hma kan lak a theih ang anga tan kan lak hi a tul hle a ni.

Tin, Aizawl Traffic Police te hi an hah hlein ka hria a Pu Speaker, dar 9 thleng zan lamah an duty hmuh tur an awm a. Anni tel lo chuan chhiat pawh kan tawh thei tawh lo a ni. Chhiat ni thatniah anmahni tel lo hian thil kan ti thei lo a ni ber mai a, an hah takzetin ka hria a an duty-naah an fakawm hlein ka hria a, kan sawi lang tel ni sela.

Tin, Police Station hi East Tuipui-ah an mamawhin ka hria. Dungtlang-ah khian temporary deuh takin a awm a, kan han kal a khawchhak lam atangin motor a rawn lut thla a, Bawng kai nen engkim mai a rawn kal thla a. Khitah khian duty temporary chu an awm ngei mai a, Police Station puitling han nei ve sela an zangkhai lehzualin ka ring a ni. Kan Home Minister bialah khian thawkkhat lai khan an decline a mahse an duh leh viau tawh a ni. Khalaiah khian Police Station dah ni se chuan Bawngkawn Police Station atanga han hmui reng hi thil harsa tak ni te pawhin a lang a ni. Hengte hi ngaihtuahnaah kan neih thlen kha a thain ka hria a ni.

Tin, Pu Speaker, Agriculture-ah hian tawitein NLUP hmalakna tam tak sawi tur a awm ang mahse NLUP hi tehkhawng chihnih kan nei a. Political measure a teh tu i dinglama mite chuan a hlawhtlinna hahipin an sawi a ni. Ama'rawhchu, Economic measure a tehtu i veilama thute hi chuan economic thilah

kan hmuh loh avangin a hlawhchham a ni kan ti ve thung. A tute pawhin khalaia kan tanna ve ve kha a dikin kan ring a. Chuvangin helai hi chu lut thui lo ila.

Tin, Potential area hmun tha tak tak kan neih lai hianin WRC system hrim hrimah hian Kolasib district lamah hi chuan hmun pawh kan ngah, ama'rawhchu ram neitute hian kan Buh thar hi khulamah a tlak thlak avangin statistic mumal kan nei thei lo ni te pawhin a lang a ni. Chuvangin he House zahawm takah pawh hianin kan Minister zahawm tak pakhat khan Agriculture buh thar te chu Dawhkan atangin duh duh zat kan thar mai a lawm, an thar ang zat hi chu thar tak tak ila chu, ration buhfai te pawh kan lak a tul lovang tih fiamthuaa sawi te kha dikna chen a awm a ni. Hengah te hian tan lak a tul hlein ka hria a ni.

Tin, thlai tharte hi a phurhchhuahna tur link road activity kan neih a ngai a ni. Chuvangin link road-ah hian tan kan lak te pawh a tul hlein ka hria a. Chungte chu a tlangpui kan sawi te chu ni sela.

Tin, Demand no.38-na Rural Development-ah hian project lian tak tak mission kan han tih ang chi te kan han nei a, NRLM te IWMP te pawh kan han nei a, heng ang chi hi mipui lamah awareness kan nei tha tawk lo deuhvin ka hria. Keimahni Legislator te ngei pawh hianin kan aware tawk lo a ni. Mizoram hmun hrang hrangah Water set chungchangah te NRLM chungchangah te pawh an nei, ama'rawhchu sorkar hmalakna tihlawhltin tur leh mipuite va zirtir tur khan mawh kan phurh tlan vek avang hian, kan hriat chian tawk loh avang hian harsatna te pawh kan tawk thei a ni. Chuvangin awareness hi kan neih tul takzet zetin ka hria a ni.

Tin, BADP hi tun hma pawh khan hmalakna pawimawh tak a ni, amarawhchu, BADP hi tun hma atanga vawiin thlenga kan kalpui dan han en hi

chuanin assets siamna tur aiin induhsakna lam a hawi nasain ka hria a ni. Border area lam ami develop kan tum danah hian tangkai taka hman tur a ni a, heng ang pawisa hi khawi atang mahin hmun dang atangin lokalna tur a awm chuang lo a ni. Chuvang chuan he ram kan siamna kawngah hianin sum leh pai kan neih ang ang te hi kan hman tulin ka hria a ni. Ni za inhlawhna pawh kan nei dawn niin ka hria a, mahse work culture tichhe lovin kan inzirtir a tul khawp mai a.

Tin, School Education-ah hian drop out rate hi Primary School-ah 16.49 a ni a, Middle leh High School chuan a aia hniam a ni. Engatinge Primary school a drop out sang ta lutuk hi kan inenlet a tul ta khawp mai a, chutih lai chuan kan literacy percentage a hi 91.33 census 2011 ah khan a ni a. Chulai chuan Tripura state khuan literacy percentage ah hian census awm leh hmasak ber ah chuan min leh pel dawn niin a lang a. Anni chuan ni za inhlawhna ah te Ration ah te ziak leh chhiar in thiam vek em tiin tan an la a ni. Chung angah chuan tan kan lak loh chuan pahnhna dinhmun hi hlauh theih mai dinhmunah kan ding ni te pawhin a lang a ni.

Tin, Chhun chaw chhum ho hi an hlawh thla engemawzat pek loh ni te pawhin a lang a, hengte pawh hi kan ngaihtuahnaah awm thleng se a thain ka hria a ni. Tin, Hindi teacher te an contract a tawp hnai ni te pawhin a lang a, a project hi heng angte pawh kan Minister zahawm tak ten tunlai India ram kalphung zel han en hian hindi thiam inzirtir hi kan ngai si a.

Tin, ACRT hmalaknain conversion policy te pawh kan han nei a, mizo medium kha English-ah kan han let a, a tha viau va. Mahse kan mizo tawng information technology avangin pakhat pahnih kan tih kha a bo der mai a, Phone no. han sawi ila saptawng vekin kan sawi a, nakinah kan hnam tan hian a pawl dawnin ka hria. Tin, kan A Aw B pawh kan hmang tlem ta, information

technology avangin. Tunlai kan message hrang hrang Whatsapp ah te social media hrang hrangah te kan han inthawn dan kan han en chuan Mizo tawng leh kan number hu humhalh a tulin ka hria a.

Pu Speaker demand pakhat chiah Industry hi ka sawi leh lawk ang a,

Demand no.40-na, KVI Scheme PMEGP hmalaknain an han tichhova, PMEGP hi bank lam atanga hlawhchhamna hi a tam khawp mai a, hei hi chu kan Minister zahawm tak hian min enpui zel se a tha in ka hria a. DELOITTE ten min han zirchiannaah ZIDCO chu restructure turin, MIFCO chu privatise turin an han ti a, entiknge kan thlen dawn kan hre lova. Kan Home Minister zahawm tak khan a sawi tawh a, Home atanga kan zu zawrhna hlawkna chu Police Welfare ah kan hmang mai atih ang khan an hmang ve chak viau mai thei a. Amaherawhchu anni chuan sawrkarah revenue tha tak an rawn pe a a lawmawm in ka hria a.

Tin, Zoology & Minerals Resources-ah hian Pu Speaker point khat chiah ka sawi duh chu pawisa an thawkchhuak tam ve a ni. Revenue tam tak an la a. Chutah chuan lung leh balu atang te, PEL atang te pawn tam tak an hmu a ni. Amaherawchu waviinah an department tet avang hian kan hlamchhiah deuh emaw ni chu aw ka ti a. Field staff te an ni a, motor pahnih chiah hmantlak an nei a, hengte pawh hi kan ngaihtuah thui a ngai khawp mai. A thawktute an ni a, theihtawp chhuaha an thawhna tur kan ngaihtuahpui hi a tul takzetin ka hria a.

Tin, Pu Speaker, demand no.44-na Trade & Commerce hi border trade land custone centre hi kan ngaihtuah a ngai khawp mai. A hlawhtlinna hi kan mawhphurhna a ni, business conclave te kan ti a, MOU hi tamtak kan sign a. Amaherawhchu a hlawhtlinna tak tak turin kan bawhzui tha tawk lo deuh nge ni a chhan ka hre lova. Chuvang chuan tan kan lak a tulin ka hria a.

Tin MAMCO hmalakna an chhawm chho ta zel a. Mizoram State Agriculture Produce Marketing Development & Regulation Act, 2008 te pawha hlawhtlinna turin theihtawp an chhuah a ngai. Sawhthing Market te pawh kha kan Assembly Committee te pawn an han hmuchho zel a, khang te pawh kha kan ram dinchhuahna tur leh kan ram hmasawna tur ani tih hria in tan kan lak a tul khawp mai a.

A tawp berah chuan khawpui chhung kawngpui dunga thlai zuar hi ka ngaimawh khawp mai a. A tuihnai lo a ni, motor tan pawh a hlauhawm a ni Pu Speaker. Motor tawt tak takin kan kal a, bazar nen kan innak nulh nulh mai a. Tin, vaivut khu nen, bawhlhlawh chi hrang hrang nen kan inchiahpiah nei nuai a, eitur kan zuar a. Chutiang te chu a ni a, hei hi chu enchian a ngaihtuahna kan hotuten kan hmantlan hi a tul takzet in ka hria a. Chungte chu thahnemngai takin ka han sawi a ni e, ka lawm e.

SPEAKER : Pu R.L Pianmawia

Pu R.L. PIANMAWIA : Pu Speaker, tlema zawng sawilan ve ka duh chu demand no.16 Home-ah hian a hmasain lawmthu ka sawi duh a. Ka bial khi chi hrang hrangin a tha zawng ni lemlo ten kan lar ve thin a, chumi avang pawh chuan ngaihsak kan ngai a. Ngaihsak kan ngaihna laiah kan Home Minister pawh hian min ngaihsak viau in ka hria a. Tunah Tingham leh Sakawrdai-ah te building pawimawh tur cheng tam tak man min ngaihtuah sak mek a, a lawmawm hle in ka hria a. A hmaa min tihsak tawh te pawh chhuanawm tak tak, sawi lan chakawm tak tak te a awm a. Amaherawchu tunah a tharin min han ruahman sak leh tur hi lawmawm ka ti a. Zohmun BOP khi kan sawi nasa tawh khawp mai a, an khawngaihna lantir nan cheng singnga vel camp siam nan khan an pe a. Cheng singnga chauh chu tun fur ruahtui han do na tur chuan a tawh lo deuhin ka hria a, hei hi ngaihtuah belh theih hram ni sela chu a tha in ka ring a.

Tin, kan budget-ah khan motor leina tur sum tam tak a rawn lang kha a lawmawm ka ti a. Khatiing a nih chuan Sakawrdai a dah tur leh Darlawn-a dah tur a thar

kan han hauh ve a ni tih kan Minister khan min lo hriat sak se a tha in ka hria a. Kan pawimawh hle a ni, a hlui nam ngai reng mai lo deuh hi minrawn pek theih chuan, motor thar ngei minrawn pe ta e tih ziakin lawmthu sawina kanrawn thlen ngei ang tih pawh ka intiam duh a ni.

Tin, demand no.38-na Rural Development hi ka sawi leh duh a. BADP tuam lohna bial ho tan chuan tuna kan budget han en chuan a manganthlak khawp mai a. Social Education-a Community Hall min sak sakna thin te kha a awm tawh bawksi lova, kan community hall min sak sak mek Lungsum te, Ratu leh North Serzawl te khi a chhumbungin min tlansan ringawt mai a. Sum a awm leh tawh bawksi lova, churang chuan tun tumah budget-ah a awm leh bawksi lova, entikahnge min sak zawh sak ang aw tih hi ngaihtuah thiam a har hle mai a. Churang chuan a bak hi khawvel awm chhunga kan tithei dawn tawh ngang lo a nih pawhin tuna kan tihlai tal sak zawhna tur hi huikhawm dan awm hram se tih ka ngenna ni sela.

Tin, Housing for Project Staff-ah pawh khian ruahmanna, lawmthu te kan lo sawi ve tawhna Darlawn RD Block BDO Office sakna tur nuai 15 kha thil pawimawh dangah khan hmansak kan ni a. Tun thleng hian a hmel arawn lang leh ta lova, a tawlhbo hlen ang tih chu kan hlau khawp mai. Khi khi sak that a tul hle mai a, khimi sak thatna tur khi minrawn ngaihtuah leh theih chuan kan lawm hle ang tih ka sawi duh a. Tin, kan sawi ang khan BADP hmanlohna bial ho te hi chu a bik tak pawha kan hmasawn ve na tur hi ngaihtuahna a bik taka hman fo a tulin ka hria a. Chumi tur chuan ka chah duh bawka.

Tin, demand no.20-na School Education Department-ah hian ka sawi duh chu harsatna awm reng mai chu zirtirtu indaih lo tih a ni a. Hemi hi tuna a landan angah pheichuan thingtlang ho chu kan indaih lo tial tial ang a kan chhe tial tial dawn a ni tih a lang reng a. A chhan chu zirtirtu lak dawn ah training lo chu zirtirtuah a lak theih loh tih te a ni ta si a. Training-na turah lah hian thingtlang lam aiin khawpui mi hi an hlawhtling

thei zawk a, training tura lak chungchang ah hian. Chuvang chuan a bik taka training na tur hi thingtlang mi te tan min buatsaih sak loh chuan a ngaihna awm dawn in ka hre lova. Chuvang chuan a tlai tawh mah mah a, tun atang hian bul min tan sak ka duh a. A sub-division wise hian training tur hi quota min pe thei ula a tha in ka hria . Chutilo chuan training tur seat za awmnaah khan thingtlangho tan khan sawmnga emaw khatianga sub-division anga min khek sak loh chuan khawpuia milian fa ho hliir kan training chhuah tir zel a, an rawn awm a, reiloteah insawn an duh a. Khatiang ringawt mai tawng tura indah bik ngawt mai hi tha in ka hre lova, chuvang chuan hemi laka kan chhuah theihna tur kawng hi min ngaihtuah sak a pawimawhin ka hria. Tin kan chan ve phak tawkhawpui in a chan ve tul lemlo a awm a ni, Education department-ah hian. Zirtirtu indaihloh naah Special Trainer min pe a, an hlawh kha ₹4000/- Primary ah, Middle school-ah ₹5000/- a ni a. Amaherawhchu sum daihlohna avangin Primary-ah ₹3000/- a tihtlak a ni a Middle school-ah ₹4000/- a ni a.

Chuvang chuan thingtlanga a khawneitu te kan han duhsak ve theihna hmuna an lo inhlawh ve theihna tur takngial pawh kha tihhniamin a awm si a. Kan chan hi chu a va han chau tial tial ve aw tih rilruah a awm a, a hrehawm duh khawp mai. Chuvang chuan thingtlang miten a nghet pawh ni lova an lo thawh ve theihna turah hi chuan norms kan neih baka tlem han belh te pawh hi a tha hlei hleiin ka hria a. Cheng 4000 hlawh turah 4500/- te lawmthu sawi nan han tih theih pheih chu ni sela a hlu lehzual in ka ring a. Chuvang chuan thingtlanga zirna kal tha tur chuan heng kan special trainer lawmman kan pek te pawh hi norms ai kan tisang thei lo a nih pawhin a ngai ang tal kha chuan min tih sak leh hram thei ula chuan a tha in ka hria a. Chu chu thingtlang miten hma kan sawn ve theihna turah pawh kawngro a su dawn a, kan tihhniam hi chuan kan hmuh tur te thiamna pawh hi a tlem deuh hlek a ni. Thahnem pawh an ngai lo deuh ang tih a rinawm a, mahni pawh han inchan ta ila, cheng ₹4000/- hlawhtheihna ah cheng ₹ 3000/- hlawhin min ruai ve ta sela thahnemngai taka thawh kha a har viau mai thei a ni. Chuvangin hemi kawngah hian ngaihtuahna thar hman leh a, a lohtheih loh na ah hi chuan tiang khan min ngaihtuah sak se tih ka duh a.

Tin, building chungchangah te leh kawng hrang hrangah Education department hian hmaa la tha em em a. Tin, kan Education Minister leh a puibawmtu kan Parliamentary Secretary te inpekna hi a hrechiang pawl ka niin ka hria a, a lawmawm ka ti a. Hetianga pumkhat anga hnathawk thei Education department in a nei hi a lawmawm ka ti a, kan ram tan pawh vanneihna nasa tak awmin ka hria a, churang chuan term leh ah pawh sorkarna kan chan leh hun ah Education Minister leh Parliamentary Secretary turin ka hauh lawk tih ka sawi a ni.

Industry Department-ah hian tawngkam khat lek in han sawi ka duh a, duhsakna avangin puantah training te kan bialah min rawn dahsak ve a, pangchan luat a awm hleinem maw le ka ti a. Puantah an training zo tawh a, a workshed siamna tur min pe tawh bawk a, puan banna in hi pawisa pek turah khan a tel ve lova, workshed te kha chu a pawisa min peksak vek tawh a kan sem vek tawh a, puan banna in kha a pawimawh a ni, a huho va in hman tawm theih tur khan. Chu chu a rugin ka sawi a nih chu, puan banna in sakna tur min ngaihtuhsak leh theih chuan.

Tin, Trade & Commerce, Demand no. 44 ah khan kan thiante sawi tawh tho kha han sawi nawn ka duh a, a thawktute an tlem si a, an thawkchhuak tha bawk si a, churang chuan thawk chhuak na na na chu a tui tha te pawh ei tir ve hun hi a awm thin kha a ni a, churang chuan an indaih lohna zualpui thawktute (Speaker : I hun i hmang zo) khawngaihtakin ngaihsak zui ni se tih ka sawi duh a ni e. Pu Speaker, hun min pe a, ka lawm e.

Pu T.T.ZOTHANSANGA : Pu Speaker, ka lawm e. Hei MNF leh Congress te hian kan manifesto-ah khan transport chungchangah thlawhtheihna leh rel chungchang hi kan sawi ve ve a. Tun tum session-ah hian special mention pawh sawi awm tak kan ni a. Kan manifesto takah chuan Lumding – Badarpur – Silchar relkawng broadgouge a siam tura nawr tih kha keini chuan kan dah thlap a, anni pawhin hetiang chiah lo deuh hian an rawn dah a. A hlawhtling ta cheng a rin ai hian ka au ring lo riau in ka hria a,

hmanni lawkah khan kan Minister zahawm tak Pu John Rotluangliana khan Bairabi-ah a zuk hawng kha a ni a, tunah hian bungraw phur chi, rel lian chi Bairabi ah a lo thleng thei tawh a, hemi in a indicate chiang tak mai chu Mizo hian economic life line thar pawimawh tak Bairabi thleng kan nei tawh a, tun hmaa Silchar ho kan ngam loh na fo thin kha chu economic line a dang kan neih loh vang a ni. Silchar leh Aizawl inkarah Bagha ho in sual an chhuah chuan kan chuti der mai a Pu Speaker. Tunah erawh chuan Pathian zarah kan dam ang a, anmahni kan zuk ngam ta viau ang tihna ni lovin hetah a reliable zawk, phur tam zawk Mizoram leilung ngeiah a hmunah a rawn thlen avang hian lawmawm ka ti khawp mai. Hei hi Special Mention-a lo sawi awm tak pawh kan ni a, kha kha lawmawm ka ti a, Buhfai 26,000 qnpls vawikhatah a rawn thleng thei tawh a ni. Kha kha mipui in kan lo hriat loh takin ka sawi hmasa duh a.

Tin, Pu Speaker, chutiang bawh a pawimawh, kan manifesto-a awm bawh pakhat hlawhtling dang a awm leh a, Delhi Air Flight direct-in nimpiniah lawk ah khan kan han nei thar leh bawh a, khang hmasawna kha a ropui khawp mai a, Choak bak a tum kan rin loh laia direct-a nikhat thil thua Delhi kan thleng thla mai leh Delhi atanga nikhat thil thu a kan naute an rawn thleng ta mai turte kan ngaihtuah a, Special Mention kan lo pulut lo kha ka ui hle a ni tih kha ka sawi a. Engpawhnise, he kan sorkar-ah hian change hi a thleng a ni tih a hmasa in ka'n sawi duh a ni.

Pu Speaker, a hmasa berah chuan Excise lamah khan kan thiante, I vei lam mi te kha an tui khawp mai a, ka hawi ka hawi a, tun hmaa Excise lama hnuhma nei kan awm em tih te ka ngaihtuah a, mahse ka sawi lem lo ang a. Demand 3-na kha a hmasa in sawi ka duh a. Pu Speaker, Mizoram hian leilet siamna hmun tha kan ngah khawp mai a. Tunah hian WRC-a siam theih tur hi Agriculture a kan mithiam ten an chhut dan chuan 74644 hectare a awm a. Chuta tang chuan WRC-a kan siam tawh hi 16866 hectare chauh a la ni a, 57778 hectare hi siam theih a ni tih remote sensing data atang hian an chhut chuak vek a ni.

Tichuan, tuna kan production-ah hian 16866 hectare lek atang hian 36471 metric ton kan thar a. Tin, Jhum cultivation ah hian a tlangpui in 24000 metric ton vel kumtin kan thar thin bawk a. Tichuan, kum khatah hian 60000 metric ton vel kan thar thin a ni. Kan census data angin Mizoram-in buhfai kan mamawh hi (Agriculture kaih hnaih a ni a, Pu Speaker min lo hrethiam la) 179941 metric ton a ni a. WRC hi siam ta vek ila kan area ah hian in 162005 metric ton kan thar thei a. Tichuan, jhum-a kan thar nen pheih chuan Mizoram mamawh aia tam hi tunah hian kan la produce thei a ni. Kha kha tawite in ka sawi duh a. Agriculture hi kan tanna tur a ni a, riltam a huaisen theih loh an ti a, kan fairel bel hi chu kan en hmasak chu a ngai ve a ni.

Mizoram in a mamawh aia tam thar thei kan ni a, tin, Mizoramah hian floating population kan ti a, vote pawh nei lem, lo vei vak kan ti mai dawn em ni hetiang hi 2.5 lakh vel kawl reng kan ni. Chu chu ka sawi tel duh a. Tuna kan buh thar hi thla thum (3) tha deuh vel mamawh chiah tunah hian kan thar chhuak a ni a, chu chu 27.5 % kan thar ang a ni. Kan rama kan siam theih zawng zawng hi siam ta ila kan mamawh aia a thar tamna tur chu 6064 metric ton a ni. Hei hi a pawimawh ka ti khawp mai a. Hemi kan sawi duah nachhan chu tunah hian RD a kan sum che vel zatve pawh hi Agriculture hian a tum pha lo a ni. Agriculture hi kan sum tamna ber turah ka lo ngai a, land development kan han tih te, link road kan han tihte hi thingtlang ah chuan a pawimawh khawp mai a, a prone area te kan lo ni bawk a. Tin, khawchhak tlangdung-ah pheih chuan keimahni a lo neitu ngei hian kan han thar a, vairamah kan hralh ve ngai bawk si lo a, Mizoram tan Mizo in kan ei nghal miah miah mai a ni a, duhsak hi chu kan phu ve a ni.

Tin, trecktor te, power tiller te hi kan mamawhna a sang bik em em a. A bik kan tih nachhan chu, ran nena leilet thin kan ni a, ran a vulh theih tawh si loh a, horticulture a thang duang si a, chulai karah chuan kan ran te kan chawm reng thei tawh lo a. Chubakah, an han thi deuh puk puk thin bawk nen hian tracktor leh power tiller lam zawng pawh khan kan Minister zahawm tak hian ngaihtuahna rawn hman tam thei sela chuan Zoram fairelbel hi chu a phuisui thei deuh ang a tih te ka ngaihtuah a ni. Kan

sorkar hmasa, keimahni ni lo, sorkar hmasa-ah pawh BAFFACOS-ah pawh khan in Agriculture-ah khan an han dah teuh a, Rs 209 lakh lai kha antam chi leh engemaw chi neuh neuh ah khan an han sem ral kha a ni a, a pawl khawp mai a. Development nghet ang zawnga rilru kan put theih hun hi kan hmasawna tak tak tur chu a ni ang tih ka ring a ni.

Tin, Pu Speaker, Demand 16-na Home Department ah khan kan kal leh ang a. Hmanni ah khan police 6 ft chuang vel kan lak danah khan chanchinbu leh social media-ah te a fair lohna pakhatmah a awm lo kha a lawmawm ka ti khawp mai a. Tunhma atangin Mizoram-ah sorkar hna kan lak reng reng in a Minister te emaw, a kaihnnawih official te emaw hmingchhiatna hi a awm thin a, tun tumah felfai taka kan Home Minister ten an han la thei te kha a lawmawm ka ti a. Ka'n sawi thui deuh hlek ang a Pu Speaker, i phalnain - IR kan han la tak tak te kha chu a buaithlak ve a nia, a tling lo kha June ni 11,2007 khan tling ta deuh teuh niin kan hria a,Prism ho phei kha chuan tling lo chung IR-a thawk bang tura ngenna memorandum kha an theh lut nghe nghe a ni.

Tichuan, an sawinaah phei chuan kan nawrna avangin tam tak chu ban leh an ni te pawh an rawn ti a, an lehkhabu te pawh hetah kan kawl vek a. Khatiang taka felfaia kan Minister in hna an la thei kha lawmawm ka tih rualin kan hmalam hunah pawh hian a tling leh a fel, a tha,fit tak hlir kha force ah hi chuan lak theih ni sela tih kha he House ah hian ka duh thu kan sawi chhuak a ni.

Tin, Pu Speaker ka'n sawi leh duh chu – Sainik School, Chhingchhip ami khi chak leh zual a kalpui theih ni sela ka duh khawp mai a. Tunah khian seat 60 awmna tura ruahman a ni a, seat 60-ah khian seat 40 khi kan hnam tana reserve a ni. Manipur te chuan an nei a, army officer an chhuak teuh teuh mai a, kan nau te army officer an nih ve theihna tura a kailawn pawimawh tak a ni.

Army officer nen khian a in link tlat a ni tih kha kan hriat a tha a. Chuvangin, NDA-ah te an han lut a, khatiang khan kan nau te officer an nihna kawng a inhawng a ni.

Tin, Pu Speaker, army recruiting lam hi ka rilru ah a kal thui khawp mai a. General caterogies-ah hi chuan kan nau te pawh an han lut deuh mawlh mawlh zel a. Amaherawhchu, technical category-ah hian an lut tha thei lo riau hi a mangan thlak a ni, 2010-2015 ah khan Army lam hotute khan Mizoram state tan hianin demand 350 min siamsak a, khami 350 ah khan he kum nga chhung hian 27chiahin kan luah thei a ni. A pawl khawp mai, a uihawm. Pu Speaker, chumia ka'n sawi duh tak chu technical a kan luh theih nan hian keimahni tan an rawn inhawng zau si a, he an rawn inhawna ah hian pre-rally training kan ti dawn em ni, YMA te leh district tina kan sipai hotute nen hian in tie-up theih dan hi chu awmin ka hria. Thingtlang atangin Aizawl ah an lo kal a, an tlan ve tawrh a, an theih theih an han ti ve tawp hi chu tlin a har lutuk a ni. Chuvangin, YMA te nen in co-ordinate in, engnge Labour & Employment in nge hma la ang ka hre lo, khatiang khan ti ho sela, thlakhat vel an training hnu ah khan duh leh sipai-ah te han intlar ve sela, engemaw chen an lo hriat tawh kha chuan a zia hle ang tih ka ring a, kha kha ka'n sawi duh a. Ka sawi tum tak pawh hi ka sawi zo hman dawn lo, nia ka sawi tam tawh lovang.

Pu Speaker, RD ah khan ka'n sawi duh chu - ka bial khi Tiau hrul a awm te kan lo ni a, rangva hi kan mamawh hnem em em mai a, rangva zawng pawh khan kan Minister pawh hi rawn tang leh thei hram se tih kha kan hma thlir, kan duhthusam a ni, min lo hriat sak selangin. Tin, IWDP hmangin ram kan siam thin a, he ram kan siamna kawngah hian zep thu a awm lo a bialtu MLA te hi kan ram leilung leh kan bialte hre deuh ber kan lo ni a, hengah te hian min rawn hriattir ve zel thei sela kan tan hian a tha tlang ang tih rinna ka nei a ni.

Tin, Pu Speaker, (a rei tawh lovang,) Education ah khan lawmawm ka'n tih em em mai chu - kan Minister hmalakna-ah hian Headmaster reng reng an seniority avang ringawta heta Headmaster-a han dah tumna kha a awm ta lo niin ka hria a. Ka hriatsual loh chuan departmental exam a exam tir a 50% an hmuh loh chuan an senior avang ringawt khan an kaisang dawn tawh lo ni ang zawngin an rules te an siamtha mek niin ka hria a, kha kha tha ka ti khawp mai a. Seniority vang hrim hrima chhoh kha hmanni ah kan member zahawm tak Pu Sangkunga khan a rawn duh lo kha a ni a, kha kha a tha hlein ka hria.

Tin, zirtirtu indaihlohna nasa tak kara kan awm laiin hlawh tlem te te in khaw tinah special trainer min han dah sak thei te hi a lawmawm ka ti a. Kan member zahawm tak Pu Nihar-a sawi angin doctor aiin matric passed ka biala zirtir thei hi ka duh zawk a tih ang deuh hlek khanin keini pawhin a khaw neitute kha weightage pek tha kan ti a. Tin, kan member zahawm tak Pu Piana'n a sawi ang khan pre-service, training-na ah te leh exam reng rengah hian weightage pek leh kha tha ka ti a. Khawpui ami in training-na hmun an luah khat zat zat a, thingtlangin kan chang ve thei lo hi kan mangang a ni. Chuvangin, training na hun tha hi engtinng e kan tih ang. a District level a a theih chuan a tha ang a, sub-division level pawn a la tha thovin ka ring, chu chu ka'n sawi duh a.

A tawp ber dawtah chuan Industry Department-ah khan ka'n sawi duh chu Horticulture Department-ah khan hlawhtlinna duhawm tak kan nei a. Horticulture -a kan hlawhtlinna avang khian tunah Horticulture-ah tam tak kan thar a; mahse Horti-ah min buaipui ru han tih rem lo pawh a awm a ni maithei. Chutah chuan Industry lamah Distillery Unit din kan duh a, kan Minister zahawm tak Pu H. Rohluna'n concept paper NEC priority-a thehluh turin tunah min pawm sak a, a rawn chhawpchuah avang hian ka lawm a. Horticulture in bul min tan sak a, an hna engemawchen an puanggo zawh tawh a, tunah a lo bial ve thin tu Pu

Rohluna'n concept paper hmanga hma min lak sak leh hi lawmawm ka ti khawp mai a, hei chu ngaihtuah hunah pawh min lo hriatsak ula.

A tawp tak takah chuan - Trade & Commerce-ah hian Zokhawthar leh Melbuk hi hma kan han la duh viau thin a, hma lak leh zel dan tur khi chu awm lehzel turah ka'n ngai a. Sorkar insak hrang hrang te pawh khi a tawl deuh tlat mai a Melbuk ah khian. Zokhawthar-ah erawh chuan hmasawmna a takin kan hmu chho a, kan lawm hle a. Helai Aizawl khawpui chhung New Market ah crore 13 an han buaipui tan mek te ka'n hmu a, lawmawm ka ti a. Kan Minister te Demand an rawn chhawpchuah hi lawm takin ka rawn pawm a ni, ka lawm e.

Pu T. SANGKUNGA : Pu Speaker ka lawm e. Vawiinah member zahawm tak tak te'n kan Minister te pahnih demand ngaihnam tak takin an rawn sawi tawh a. Ka'n sawi ve duh chu Demand No.20-na School Education Department chungchang a ni a. A hmasa berin anni chungah hian lawmthu ka'n sawi duh a. Kan thalai te hmasawmna turin Staff Selection Commission leh IAS Coaching Centre dinna tur baihvai taka kan awm laiin leh Home Minister ho meuh a kan zawn zak zak hnuah kan beidawn viau hnuin kan Education Minister zahawm tak hian an school building te min pe a, kan sorkarin cheithat na te min pe bawka, an chungah hian kan lawm em em a. Tunah hian heng coaching centre pahnih te sorkar-in a hawng tawh a, inauguration tak hi chu tun Zirtawp hian neih kan tum a; kan House Leader hian min hawn sak dawn a, MLA chin zawnng zawnngte hi rawn sawm ang che u a ti a, chuvangin, vawiin ah Minister, Parliamentary Secretary leh MLA zawnng zawnngte hi he House kaltlang hianin lehkha siam hma pawhin ka'n sawm che u a ni tih kha lawmthu sawi pahin ka'n sawi duh a.

Tin, ka hma amiten an sawi kan Minister leh Parliamentary Secretary inkawp that vang hian an chak a ni tih ka pawm em em a ni.

Pu T. SANGKUNGA : An Department hmasawna hi Secretary leh Director tha em em mai kan nei hi a ni pakhatin ka hria. Director leh Secretary inrel reng hi ka hrawn ngun tawh khawp mai a, ninawm khawp mai a, hna hian a tuar thinin ka hria a. Kum 40 vel department hrang hranga lo awm lawr tawh ka ni a. Tuna kan Secretary leh Director inkawp fuh tak mai kan han neih chinah hian MPSC kal tlanga hna lak hi a tam em em a ni. Headmaster lak tih te, zirtirtu lak tih in rawn sawi thluah tawh kha anni pahnih inkawp rem vang hi a ni pakhat a. Secretary hi rei lote Education Director-a a awm chhung khan a thawktute zawng zawng aiin zirtirtu zat, thingtlang kilkhawr ber ami pawh hi a hre veka ka va phone thin a, Computer hi a'n hmet zauh zauh a, chumi khuaah chuan chuti zat an awm a ti vek thei mai a. “Keiman tlaivar deuh thawin ka bei a ni,” a ti mai a ni. Khatiang chi kan neih avang hian Education-ah hian beiseina sang tak ka nei a, hma kan sawn chhoh thuai thuai pawh ka ring a.

A dawt lehah chuan nichina kan member zahawm takten thingtlanga zirtirtu indaih lo an tih thin kha, a dik a ni. Central te pawh hi hlau lo mai ila, kan bengte hi chhu chhet lui ila, zirtirtu in daih lo zual lutukte hi chu Special trainer hlawh tlem te te a rawih hi chhunzawm ngam ila, aikal lak pawh hi huaisen takin ngam bawh ila. Chutiang a nih loh chuan ka hma amite sawi ang khan thingtlang kil amite tan chuan tihngaihna a awm lo reng reng. Exam-a sang kha Aizawl lam an ni zel si a, an hna an zawm hmawm transfer hi an dil nghal ngawt zel mai bawh si a. Chuvangin helaiah hian, tribal kan nih angin luhlul chhuah a ngaiin ka hria a. Kum 1977 khan Delhi-ah sava ka kap thina, “arawn kah phei chu damchung tan theih a ni,” an ti a. Kei chu tribal ka ni a, tang mah ila a rei lovang ka ti a, parva te hi ka kap lui zel mai a. Major General, Sikh pa phei kha chuan mi rawn khak na khawp mai a, kan Chief Secretary khan kan Liaison Officer te WT-ah a rawn thawn a, ti tawh lo turin a rawn hrilh a. Tribal ka nihna ka lo chhuang ve ringawt zel mai a, ka lo tang tep ni hian ka hre ta a. Tribal mawl na na na kha chuan zirtirtu an indaih loh chuan luhlul mai te pawh hi a tih chi mai dawn lawm ni ka'n ti duh a.

Tin, a dawt lehah chuan Demand No. 40, Industries Department hi ka sawi duh a. Kan changkan tawpah chuan a thlenna chu industry a ni deuh zel mai a, Horticulture-ah thei thar teuh ila a vawnthatna leh a siamtuina chu Industry a ni a. Kan sawi mawi em em thin mau pawh ching ila, Industry-in an lo sawngbawl leh , khatiang zel kha a ni a, Industry hi a pawimawh em em mai a, thil laihchhuah tih leh Industry & Mining hnuai a ni a, kan minister chan hi a pawimawh em em a ni. Hetah hian ka duh loh em em Vigilance & Monitoring Committee, Champhaia kan neih pawha ka sawi chu, thingpui chin a ni. Thingpui Industry chan nge Horticulture chan pawh a hriat loh va, tunhmain Industry ah te a bet a, NLUP-ah khan Horticulture-ah te an rawn dah leh a, tu chan nge hriat a har. Horticulture Secretary ka nih lai khan Tea India hotupa a lo kal a, IAS retired, Union Cabinet rank deuhthaw a ni an tia, sum kha an ngah em em mai a. Mizoram-ah thingpui ching duhte chu tanpuina pe theitu a ni. Tea India hi hausa em em a ni, an ti a. Tuna kan House Leader, Chief Miinister ni bawk kha an rawn contact a. A ni chuan “Thingpui huan kan siam tam chuan thingpui sih hi a hlawk si lova, nakinah vai ho hlawn tlem te tea chhawr loh theih an ni lo anga, An awm nghet tual tual anga. Kan la buaipui ang. Assam-ah pawh Tea Tribe tih te an lo chhuahna chhan hi a ni e, a ti a. Chutih laia kan minister Pu Liangsailova kan meeting a min ho tura kan Director in a sawm khan a ni chuan “Kan CM in a duh lo tawp mai, hei hi chu a theih loh” a ti a, aniha Secretary ah an ti a, chu pawh a awih lo, “Director ho khan lo kawm mai mai teh u,” a ti a. Tunah Tea India an lo chhuak leh ta a. Champhai district ah te chuan hma an rawn la nasa mai a, ka sawi chhe nasa hle chung pawhin ka bialah ngei pawh VC thenkhat chuan thingpui huan tur an theh teuh mai a ni.

Hei hi pawl ka ti khawp mai a, an thingpui china tur ram an vah te tun hnaia ka han kal khan ka hmu a, ram tha lai an vat nghek nghek mai a, an neih hlen chuan nakinah Tea Tribe kan siam chuan Tlangsama tu kohhran pawl emaw ang vote duha inthlan dawn apianga. Kan Chief minister hlui khan Gypsy var a pe tih leh a pe chiah lo ti a inhnial reng mai te, Sangau lam chhuak, chumi pawl han tih a ‘pawisa tam tawk a pe a ni’ tih leh ‘a pe lo a ni’ tih kha debate a awm reng mai a. Chumi ka sawi tum

chu tute emaw ka demna ni lovin Tea Tribe an lo chhuah chuan, hlawh tlem te a thingpui sih peih, an rawn pung zel ang, kan thalaiten an sih peih tawh bawk si loh chuan, mechanization nen lo chuan kan thawk tak tak peih lo a ni a. Farmers' meet kan neih reng rengin tar lam vek a ni lo kal tawh, Horticulture leh Agriculture a ka awm chhung khan. Chuvangin tuna kan Minister in mechanization a'n tih hian beiseina ka nei a, thingpui sihna khawl a la awm bawk si lova, sapthei (blue diamond) tih laia a mu suak chhuak thei khawl a awm e tih ang kha intihderna chi a ni tawh lo reng reng a. Chuvangin thingpui hi chu tea tribe lo chhuahna tur a nih avangin tuna thingpui chin tawhna hmun bakah hi chuan i uar vak loving u. Tute vote bank emaw, intlawn siak tur, duh lam lam min puih that loh chuan lehlam an titling leh a, khatiang ringawt kan neih loh nan thingpui i ching lovang u. Assam pawh tribal status pek an inchuh leh ringawt tawh a ni. BJP leh Congress hi tumah fak tur awm chuvingin ka hre lova, state sawrkarin Tribal nihna pek an duh a, central BJP lamin pek an rawn duh bawk a, Union Tribal minister Jual onam phei chuan a kal apiangin a sawi ringawt mai a ni. Khatiang intlawn siak ngai ang chi, vote 500 awm chin te tlawn lungawi an awm chuan midang tan buaithlak deuh ania, 500 hlawm lehlama a awm chuan thingtlangah tih ngaihna a awm lo, constituency khatah vote a tlem si a. Hei vang hian thingpui chu sawi mawi chi loh, a tilui VC te chu thiat ngei ngei sela, kan LAD minister a awm bawk a, Pu Speaker, LAD Minister lo hriat atan ka sawi duh a ni.

Tin, Demand No.31-n aah, Agriculture Department hi an thawk tha ka ti em em a. Punjab leh Haryana agriculture-a an hlawhtlinna chu mechanization a ni an ti thin. P.C sorkar lai khan kan Finance Minister, a hming pawh sawi ila, Pu Hminga khan a sawi ngaihnawm hle thin a ni, ka rilruah a cham reng thin. Mahse an Mechanism ta chuang hlei lova. MNF lah khan Bulldozer 2 vel an leia a zo der. Tunah chuan ngawi rengin kan minister-in a ti miah miah mai, Power tiller pawh farmer subsidy a an lei sen loh an nei a ni. A lei tura thlante khan pawisa ka nei leh lo an ti a, a lei tur an zawng zawk a, hetiang a kan leilet te kan mechanize chuan nichina Pu T.T. Zothansanga, kan member zahawm tak rawn sawi ang khan an la laih lohte pawh, an la lai phut dawn tih hi

ka rilruah a awm a. Kan thalaite hian bawngtuthlawhin lei let rawh ti ila, hlawhfa tur pawh kan hmu tawh lo reng reng, khawl a nih kha chuan an phur tlat si a. Hna pawh a lo sawt hlei em a ni. Chuvangin kan changkanna tura hetiang kan minister leh a thawhpuiten hma tha tak maia an rawn la hi lawmawm ka ti tak zet zet mai a.

A dawt leh NLUP leh RKVY avanga Zoram hmasawn zia hi, kil tin han kal ila, East Tuipui khi hmana ka kal chuan kan khua Vanzau-ah chuan di in hi a lo paw ther fur mai a. Nawalh fung khatin a hal theih vek ang ka ti a. Ka lairil hi a pawt a ni, hrehawm ka ti em em a ni. Mahse NLUP hmasate kan han tihchhuah khan hma nasa takin an sawn a. Di in a awm ta mang lo. Tun sorkar NLUP & Bonus (RKVY rangva in leh a then phe chu agriculture budget a kan dah tam vanga hmuh) crore za tel kan han hmuhbelh nen hian khawtin hi han en ila concrete in hi a ding chuk tawh mai a ni. Hal mai mai theih loh khua hi a tam em em tawh a ni. Bike te chu e, license nei silo hian an rawn khalh thluah thluah mai a ni. Engatinge i side loh han ti ila, side enge te an ti mai mai a. A chhan chu kan hausakna hi kan changkanna in a umpha tlatlo mai a, two wheeler te an leive tawp mai si a, thingtlangah hei hi kan zirtir pawh a ngaiin ka hria, kan ramin Agriculture lama hma kan sawn chak zia em em leh Pathianin ka tawng hawlo sela, NLUP sem china Pathian ram pun dan hi namenlo a ni. Ka bial UPC upa pakhat phe chuan Pulpit atangin ka sawi tawp e a tia, NLUP hian kil tinah hmasawmna a rawn hring a ni. Ka bialah chuan (Armed Vengin kumin a sial Rs. 70000 vela an han lei ang kha Rs. 30000 awrhin a lei theih a ni). Sial khi an khalh khup khup mai a ni. Sepui 100 neih chuan a kum leh a 200 neih a ni mai a, kumtin no an nei ngei ngei Sepui no pai lo hi a talh theih loh reng reng. A no a lo hram tak tak hma in a dang a lo pai zel. Chawm a ngai baw si lova, ramah an va chhuah ringawt a, mahni ta hriat hi a neitu hna chu a ni ringawt mai a. Chuvangin hetiang NLUP avanga kan ram hmasawmna hi hmutu ten an hrefo tih ani. Hmulo chuan in awih pawh ka ring lo.

Pu Speaker ka hma a mite pawh tlem i pek belh a min han pek belh ve hlak la ka duh a. A dawt lehah chuan MLCP Act kan hmang tan a. A pawimawh em em chu

nichina i vei lam ami Dr. Beichhua sawi ang chiah kha a ni. A Department Excise kan tihlen siloh chuan ven tur an ngah sia hneh a har a ni. Tun Christmas leh Kumtharah zuin min chim nasa dawn emaw tih nak laia total prohibition tih lai aia rui man tur an tlem tlat mai kha, YMA te, Excise Department te leh Police Department te tan kawp that vang a ni ber a. Thawktu hi an tlem lutuka. Department te lutuka post 100 vel an ruak ringawt mai te hi a rang a ranga fill up vat tur niin ka hria.

Demand No. 35-na, Fishery Department hi han sawi ila. Fishery-a ka awm lai khan a te lutuk an ti a, Plan ah pawh post create tharna awm reng reng lo kha post creation rawn rawt teh u, Serchhip, Mamit, Lawngtlai leh Champhai District a, District office awmlo hi a ni em em lo. Post creation rawn move rawh u ka ti a. Hei Zirtawp ni a ni a, Inrinni kal ula, Nilai-ah chuan rawn submit ngei ngei rawh u ka ti a. thla 6 chhungin post zawng zawng nen khang district pali-ah khan post thar kan create vek thei a ni. Thla ruk chhungin District office kan hawng kim vek thei a, chuvangin he department hi a rang thei ang bera tihlen chi a ni. Post ruak tal hi chu hnawhkhah chi niin ka hria.

Demand No. 16-na Home Department hi han sawi ila. Hetiang boruak tha leh ralmuang kan kan nei hi ropui ka ti a. Amaherawchu sum leh pai indaih lohna avangin thil tih tur tam tak Police Station ah te a awm a. Ka bialah pawh khian kan Police Station neih chhun khi tunah chuan a chungah far rei tawh lutuk a, silpouline ka pekin an dawh a, an khuap li luau a. A tam lutuk chinah a an va paih thin a. Tui in thir a chiah rei tawh lutuk a, kumin a chim leh chuan repair tlak a ni tawh lo ang an ti a. Kan Home Minister hian a han en a, a hre chiang em em mai a, hei hi sak turah a tel loin ka hria a, a tih ngaihna a awm ngang loh phei chuan thawhlawm ila, a chungah cement i chhung ang te kan ti a. Kan Home Minister hian a endiktute tirin a hmunah an en tawh a, hei hi chu min rawn sakthat sak se ka duh khawp mai a.

Tin, nichina an sawi damlo awm put leh zu zawrh china zu avanga thi tamna an sawi hi chu a dik tawk lovin ka hria. Police thi teuh an tih khan police officer ka zawt a, a thite kha zu in rei tawh deuh hliir an ni a. Tuna thi hi chu kum 10 kal ta a in an tama a ti mai a, MLCP Act hnu a in thar an ni lo. Damlo mu put pawh kha zawt ila kum 4 inlo hi chu an la mut put hman ka ringlo reng reng. Kan implement chauh a ni a, keichu zu hi ka tan miahlo. Kan hotuten he House-ah ngei (kan Leader leh kan Deputy Leader a changtu in) an sawi kha, kan han ti phawt ang a, heti khawpa zu chhia leh drug tam hi a thatna tur ni a ringin zu tha zawk phalna nen control na hnuaiah zuar sela. A that loh chuan kum 4 dawn kan la nei alawm kan sorkar chhung hian kan ti tawp leh hman ang an tih ringtu nghet tak ka ni a. Pu Vanhela? MNF Speaker hluuin MLA-a a in Candidate khan, “Pu Laldenga ang hi kum 100 chhungin Mizo hmeichhia ten an hring leh tawh lo ang tih nghet taka ringtu ka ni e” tih kha a insawimawi naah a ziak a, chutiang deuh hlek chuan kei pawh kan pute thusawi kha nghet taka ringtu ka ni a, a that loh chuan an tih tawp leh ka ring. Chuvangin tuna damlo te hi chu kumli kalta a lo in tawh vek, addict an nih ka ring. Zu tha phei chu awmlo se tuna mu dul hi an thi tam ngawtin ka ring a, chuvangin helai hi zirchian tham niin ka hria. Amaherawhchu, sawisel duhtu tan khang va hmuh khan sawi mai chu a rem a. Mahse engchen nge an in tawh tih kha an hotute leh rualpui ten an lo hre em em mai a ni. Khangte pawh kha Pu Speaker, kan chhui chian thain ka hria a. Kan Minister pahnihte Demand hi a tha ka tiin ka duh aiin pawisa hi a la tlem ve ve leh nghal a, dukhawp lo tak chungin kan Minister zahawm tak te demand hi pass pui ngei turin ka rawn support a ni e. Ka lawm e.

SPEAKER : Tunah Pu Vanlalzawma i lo sawm ang.

Pu VANLALZAMA : Pu Speaker, ka lawm e, thusawi thiam deuh hnunga thusawi hi a huphurhawm thin angreng a, tun hma kan inzui thin lai kha chuan, ‘ngawi rawh, nawi deuh nak in kan sawi ang a, nangin i rawn chul mam dawn nia’, kan tih thin kha a ni a. Hei a hnunga thusawi hi a tul fo ta mai a, engpawhnisela thiam vaklo

a kan sawite ngun deuhin min lo ngaihthlak sak thin a Pu Speaker, ka lawm e. I vei lam amite kan tlem alei ah hian thu hi kan sawi a, kan sawi kim leh thlep thin a. Hei hi kan Speaker leh kan Deputy Speaker te min hriatthiamna avang a ni tih kan hria a, kan lawm tak zet a ni.

Tichuan tawite te in kan sawi ve leh ang a, mi sawi tam loh deuh atangin tuna department te deuh anga lang, nakin lawka department pawimawh em em ni tur pahnih lam atang hian tan ka duh a. Trade and Commerce leh Geology and Mineral Resources atang hian Minister dam thlap mai leh Parliamentary Secretary viak tha zet maiin an enkawl department a ni a. Rawtna leh ngaih pawimawh han sawi te pawh a chakawm a. Kan sawi hmasak duh chu Geology and Mineral Resources ah hian kan thiante sawi loh deuh hlek lai nia ka hriat pakhat leilung hausakna haichhuah lam hi han sawi ka duh a. Minister leh kan Parliamentary Secretary ten an lo ngaih pawimawh leh an lo bawhzui atan a ni nghe nghe a.

Hmanni lawkah kan Chief Minister zahawm tak hian ka hriatsual loh chuan Union Petroleum Minister kha a zu hmu niin ka hria a, enge an sawi chipchiar chu ka hre miah lova, amaherawhchu an sawi ngei a kan rin pakhat chu heng oil leh gas tuna ONGC leh Oil India Limited ten an buaipui mek chungchang te pawh an sawi tel ngei ka ring a. Helai tak mai hi kan sawi duhna ki chu kan state budget atanga sum sen ngai pawh a ni lova, amaherawhchu khu lamah khuan pressure pek deuh a zu nawr nat deuh hi a tul mange aw ka ti a. Kan C.M. in Petroleum Minister a hmu a, a protocol-ah a hmuh tur tak pawh a niin ka ring a, khami hnuailam kha C.M tan a rem chiahlo mai thei a. Pawimawh tak zawk nia ka hriat erawh chu ONGC leh Oil India Limited-a and CMD Delhi ah khuan an kal chak zel na turin hmuh an ngaiin ka hria. Corporate body an ni ve tawh a, sorkar hian chuti lutukin a control lova, a control chin chu awm bawh mahse CMD te khu an pawimawh em em a. Tin, Executive Director an tih, a bik takin exploration lam te khu, zu hmuh a zu nawr deuh khuan awmzia a neih leh zual ka ring a. Tuna an hmalak dan hi a tha thawkhat viau chuan ka hria a, amaherawhchu hei aia chak

hian hma an la theiin ka ring a. India sorkar pawh oil to chho zel ah hian a hmanhmawh ve tho a gas emaw, oil emaw an hmuhchhuah hmel bawk si a. Helaiia awmte leh min lo thlirtu-te pawhin kan hre vekin ka ring a. Mizoram hi gas leh oil-ah hian category-1 a an dah kha a ni a. India ramah category 1 a tam lova, Mizoram hi a tel tlat a. Tin, kan thenawm Bangladesh leh Tripura te, Myanmar lamte pawh khi a tel a. Chuvangchuan, han nawr nasa leh zual se, gas emaw, oil emaw hi chu an hmuh ngei ngei a rinawm a. Chumi tur erawh chuan pressure zuk pek ve deuh reng hi a ngai a. Chutah tak chuan kan Minister leh kan Parliamentary Secretary te khan hma han la leh zual ta ula tih kha ka'n sawi duh chu a ni mai a.

Tin, nichina kan hotu dangte pawhin an sawi tawh ang khan he Department hi a lian zawnga thang tur ang khan tun atanga kan inrel chhoh tan a ngai a ni. A chhan chu chawp leh chilha tih len thutte pawh kha a harsa ve thei a. Mithiam kan la ngah tawk lo a nih pawhin kha lam zir tura zirlaite infuih pawh kha thil tul lutuk tak niin ka hria a. Chu chu ka'n sawi duh a.

Tin, a dawt lehah chuan khatiang tho a pawimawh sum sen thar em em pawh ngai chuang si lo, state budget khawih lemlo pawh a tih vat theih Trade & Commerce-ah hian sawi duh ka'n neih leh chu nichinah pawh kan ngaithla tawh a, Zokhawthar Trade Centre tur te, tin, chhim tawpa Zorinpui kan tih te leh Tlabung-a Kawrpuichhuah bawrah te keimahni lo tih vak theih pawh a ni lova. Central sorkar in a rawn tih mai tur a ni a. Ama'rawhchu, hetia kan ngawih mai mai a, kan thut mai mai chuan nghah ringawt chi a ni lo. Zuk nawr chak a, tihchak chi a ni a. Chumi atan chuan khawvel inherchho-ah hian tunhmaa harsa em em kha a harsa lo tan a. Tin, a pawimawh ber erawh chu Aizawl atanga Dhaka zuk dawr emaw, Aizawl atanga Rangoon dawr emaw lam hi a ni lo lehngal a. Delhi in Dhaka a dawr a ngai a, Delhi in Rangoon a dawr a ngai a ni. Chung tur chuan keimahni tih theih chiah loh, ama'rawhchu, pressure kan zuk pek a awmze nei tur si hi a awm a. Chutah tak chuan kan Minister leh kan Parliamentary Secretary te khan ngaih pawimawh leh zual-ah min neihsak ta ula. Kan hre

vek a, khawvel chu tunhma ang kha a ni tawh reng reng lova. Europe-ah te khuan international boundary kan tih thin te kha a lang che che chauh tawh a ni, a fiah tawh lo. Tun hma kha chuan border cross hi a buaithlak lutuk a ni. Europe ah te chuan tunah chuan a ni tawh reng reng lova. Pawisa an intawm a, tikhan an inkalpawh nuai nuai a, khawvel kalphung hi a ni tawh a. Tuna Bangladesh border kan tih te, Myanmar border kan tihte pawh hi khulam ang khuan kan kal thuai dawn. Chumi hun atan chuan Trade Centre te hi kan lo tihpuitlin ve vat vat loh chuan kan hnufum leh bik ang tih kha a hlauhawm a. Chuvang chuan central lam zuk dawr chak hi kan hotuten ngaih pawimawhah nei ta ula, he ram tan hian a pawimawh dawn a. Chuvang chuan, he Department pahnih Geology & Mineral Resources Department leh Trade & Commerce hi ngaih pawimawh berah i nei teh ang u tiin rawtna ka'n siam ve a.

Tin, School Education-ah ka'n kai zawk ang a. Thil tam tak ka sawi lovang a. Kohhran school te leh private school tha ho chawikan chak hi kan education tak tak atan hian a pawimawhin ka hria a. Kan ramin kan tih fuh chiah loh a ka hriat chu, a kohhran ang te pawh a nih theih dan a awm a, 1952 chho a kan school te mission enkawl ni thin sorkar a kan hlang vek mai kha, khata tang khan a kal a kal a, tun hi kan thleng a ni. Mahse, tunah hian kohhran te kan harh tan a. School din a tul a, a tha a ni tih te kan hrechhuak thar a. Khaw tam takah kohhran ten school an din chho a. Hei hi kan ramah chuan a kal dan tur niin ka hria. Chuvang chuan heng school lo ding chho neuh neuh hi sorkar ang pawhin tanpuina tam zawk pek chhoh hi a va hun em aw tih kha kan ngaih pawimawh tak a ni reng chung hian ngaih pawimawh leh zual atan ka'n sawi leh duh a.

Kan Minister zahawm tak Pu R.Lalzirliana Demand lamah kal ta ila. Sipaiah te pawh lo tang tawh Parliamentary Secretary, viak tha zet maiin an pui a. Rural Development-a BADP kan sem dan ang vel hi, a fuh tawh lo deuh em aw ka'n ti a. Heti lo deuh hian a tih theih em ? Kan duhsak zawngte chu kan pe tho ang. Amaherawhchu, hman deuha helaia kan thian pakhat zawhna a lo langah khan BADP-a sum hman reng reng hi contractor hnena pek hi a lo awm reng reng lova. A hmangtu chu BDO hi an lo ni

fai deuh vek mai a ni. Ama'rawhchu, a tak takah chuan a thawktu chu kan awm si a. Helai tak hi a fuh lo deuh mang e tih kha ka'n sawi duh a.

Hman deuhhlekan khawchhak lamah kan zin a. Chuta khaw pakhat kan tlawhna-ah chuan kan RD Minister zahawm tak in a tlawh tuma thil an lo dil a tih sak min kawhhamuh a, an bulah chuan ka comment duh miah lova. Mahse, ka rilrua lo awm chu a petu hian hmu se a thin a rim ka ring a ni. An han sawi chho kha chu an phur viau a. 'Kan phur viau a, kan Rural Development Minister pawh a phur ve a. Mahse, a han sa tak tak chu hetiang hi a chhuak a ni. A sum sen zat chuti zat chu a ni a,' an ti a. Ka rilrua lo awm ber chu a petu hian hmu se a lawm vak hi ka ring lova. A an deuh bawrh bawrh te pawh hi ka'n ring deuh ringawt a. Chu chu ka'n sawi duh chhan chu kan tih phung kha a fuh lo deuh hi a awm a ni. Record lam han en chuan BDO te sak vek ang khan a lang si a, amaherawhchu, a thawktu kha midang an ni lawi si a. Chutah tak chuan va tih vel kha a BDO tan pawh a buaithlak a. Party worker inti fel tak tak te leh party tana thahnemngai zet te kha an lo ni bawk si a. Chutih laiin kha kan party worker kan pek kha mi a a ni miah lo a. A tak takah a hming engmah a lang lo tih kha hrethiam si khan, tha vak lo a a sak pawh khan a tawrh tur hi a awm reng reng lo a ni. Dik tak chuan PWD contract kan inpe te ang hi chu tender te kan ti a, mimal contractor te kan pe a. Amahin a thawk chiah lo a nih pawhin, a thawh chhiat pawhin a tuar thei tlat a ni. A registration te pawhin a tuar phah thei a. Khatiang ni lo khan tuna kan siam dan system hi ennawn a ngai mang e aw tih kha Pu Speaker, kan Minister zahawm tak in min lo hriat sak se tih ka'n duh a. Tender te chhuahin, a hnu ah pawh engemaw action lak a tul pawha ti tha lo viau nih pawh a hrem theih ang khan awm se a tulin ka hria a heng border area development fund kan pek chhuah danah te hian.

A dawt lehah chuan hmanni-ah Home Department-ah Police headquarter tur kan Chief Minister zahawm tak in foundation stone a laid na-ah khan kan kal a. A chhan chu a hmingin kan bial chhungte a ni ve bawk a, kal ve kha ka duh ve hrim hrim a. Kan sawi kai leh duh pakhat chu sawlaih building tha deuh mai kan Police ten an nei

dawn a, a lawmawm ka tih rualin saw mi an tih mek lai sawn, khami tum khan Khatla Local Council member te pawh kha an lo kal a, fiamthu-in ka lo fiam a. ‘Nangni lo kal chhan chu ka hre mai. Helai kawng vel in duh avangin Police ho in lo tlawn a ni maw,’ te ka’n ti fiamthu vel a. ‘Khawng Bethel Welfare ho hi an lo lang na nge?’e te kan in ti a. A chhan chu sawlaih Police quarter an insingsak vel mek lai sawn chhuah lampang kawngpui zim tak mai saw Bethel Welfare tiin Local Council te hriatpuina in hma an la a. Kan Parliamentary Secretary te pawh sawlaih an awm a, an hre vekin ka ring a. An tang em em a, sum te anmahniin an thawh khawm a. Tikhan, hnatlangte kovin kawngte an lai a. Sawlaih sawn Police ram tichhe si lo sawn tlem tlem a han zauh hlek hlek duh lai saw an nei a, kan bulah te pawh an sawi ve a. Tin, kan Parliamentary Secretary hnenah pawh an sawi tawhin ka hria a. Hengte hi tlem a inngaihnhathiam theih chuan, kan Minister te kan Police Officer te chungah an lawm em em a. Bethel Welfare te pawh anmahni tan a nih rual rualin khawtlang leh ram tana thawh ve nia an inhriat avangin Police lam te pawhin an lo hrethiam chho mek a. Chutih mek lai chuan an kawng zauh duh lai te saw, anmahni ram a ni lova, Police ram a ni a han lai hlek hleka awmze neia chhuak thei ni si saw kan Home Minister zahawm tak pawn ilo hriat pui a ilo hriatthiam sak kha ka’n ngen pui ni ta sela, an inpekna saw a tak taka han hmuhin a hlu a, a ropui a, anmahni sum te an seng nasa em em a, hnatlang an ko reng bawk a tih te kha a ni a.

Tin, Pu Speaker, khawngaih takin Excise chungchangah hian point khat lek kan sawi ve leh lawk ang e. Tunah hian zu vanga thi leh ilo laia kha kei chuan ka sawi tum a ni lova. Ka sawi tum lai tak chu hmannia kan ngaihthlak tawh ang khan kan Police tena vendor licence an neih ve a an zuar hi a dik em aw tih hi ka ngaihtuah thin a, dik lo hian ka hre deuh tlat a. Home Minister zahawm tak, Excise Minister zahawm tak ni bawk khan a battalion dangte pawh hi pek kan tum a ni ti ang deuh khan a sawi nghe nghe khan ka hria a. Thil kalphung a ni lo a ni lawm maw ni aw, tun dinhmunah hian a ngaihtuahna a hmang tha leh thei em tih ka rawn sawi duh a. A chhan chu Police ber ina khatiang vendor licence neia zu kan zawrh hi a nih dan tur ani em maw ni aw! Corporation dangte kha chuan an lo ti a nih pawhin a hriatthiam theihin ka hria a.

Police te chu kan zirtir dan tur pawh zu in reng reng lo tura an duty te tha taka ti tura kan tih mek lai khan khati lo zawng deuh khan a tih theihin ka hria a. Kan Commandant hlui pakhatin hmanna kan sawinaah pawh a sawi zauh chu 'Hetia an ti hi chu kan naute ka ngaihtuah mange aw' a ti vawng vawng a ni. A ngaihtuahna rilru kha sorkar policy a sawisel lam a ni lo, an naute ho awm dan tur kha a ngaihtuah a ni. Mizo te chu kan hre vek a, kan fel em em laiin hoh deuh riau na lai te kan nei a. Thian ten an tih chuan han tih ve mai, an tih lem loh chuan tih loh mai, kuhva te pawh hi an han phawrha an han tih chuan ei mai, ei tur kan hmuh loh chuan ei lo mai, sahdah thlengin a ni a. Zu te pawh in tur a awm a in mai, a awm loh chuan in lo mai te hi kan tam hian ka hria a. Chung avang tak te pawh khan kan Police lam te pawh kha zawrh tir loh hi ven pui zawkna a ni em aw, a loh theih loh te a awm a nih chuan tuna kan ngaihthlak ang deuh khan an quota ang deuh te tih sak a, khatiang ho in an chan tur tawk kha chu a awm thei thovin ka ring a, ti te pawhin ka ngaihtuah a, Supply Department atanga Police hovin buhfai sem Retailer-ah te hian tang se tih te nen pawh khan a inang thei thuk thuk tho mai lo maw tih te ka ngaihtuahnaah a awm a. Han ti ta ila, ni lo deuh huin kan hria in ka ring. Amaherawhchu, zu a nih tak avanga Police han tih tir lai tak mai kha Pu Speaker, ngaihtuah chian deuh a tih loh zawk hi a tha lawm maw ni aw tih kha ka thu khar nan ka'n sawi a ni. Ka lawm e.

SPEAKER : Awle, sawihona chu kan duhtawk tawh mai anga, tunah hian kan Minister zahawm tak Pu R.Lalzirliana, sawihona kha han khaikhawm sela, sawifiah ngaite a sawifiah zawh hnuah pass rawn dil nghal tawh mai se, a tha a nge. Tunah i sawm tawh mai ang u.

Pu R. LALZIRLIANA, MINISTER : Pu Speaker, vawiinah ka Demand MLA zahawm tak tak 19 in an sawi a. A tlangpuiin fakna, (fak derna tih chu ka duh lova,) der lovah ka ngai a (SPEAKER: A der chu a tha lo) Fakna awka kan dawng hnem ber a, ka lawm khawp mai. Tin, ka beisei aiin opposition lam an au ring lova, an rawn tih vak ka lo ring deuh a. Amaherawhchu, zaidawh takin tha takin thu an rawn

sawi hlawm a, an chungah ka lawm khawp mai. Hetianga fakna awka a bikin Home Departmen-ah kan han dawng thin te hi keimah nilovin kan chungah roreltu kan Pathian vang leh kan Chief Minister zahawm tak, mi tum ruh, mi huaisen, mi rinawm, remna duh mi, thudik tan tlat kan neih avangin ama kaihza vengin, ama thurawn ang thil kan tih thin avanga hetiang hi lo thleng a ni a. Chuvangin kan lawmna tur tak chu kan Pathian leh kan Chief Minister chungah hian a niin ka hria a, ka lawm khawp mai.

Hei dar 5 a ni tawh a, thiante khan an ti tawi thiam riau mai a, ka ti tawi thiam ve ang em aw tih ka ngaihtuah a. Ka huphurh ang reng a, engpawhnise dawhthei takin kan awm ta sa sa, dawhtheih zel huamin awm ila, kan rei tawh dawn lo bawk a, naktukah a tawpna a ni tawh mai a.

Pu Speaker, sawi zawng zawng khan link road kha kan ngai pawimawh vekin ka hria a. NLUP kan han ti a, huan thlai lo ram, leilet te kan nei nasa a. Chuta tan chuan a pawimawh a ni tih kan sawichhuak vek, hei hian kan NLUP in hna a thawh nasat zia a tilangin ka hria a. Hei hi nasa takin, theihtawp chhuahin keimahni Department chauh pawh nilovin Planning/ Finance atang pawh hian ngaihtuah an tum ber te zing ami niin ka hria a, a lawmawm ka ti a, kan MLA ten in ngaih pawimawh kha sorkar ngaihpawimawh a ni tih ka'n sawi hmasa duh a ni.

Tin, Pu Hmingdailova khan Kawnpui Police Station Fencing tul a tih kha a tul khawp mai a, kawngpui bul a ni a. Amaherawhchu, a sawi laia ka rilrua lo awm chu, amah hi police lal pension, IPS retired a ni a, khu khu National Highway bula awm a ni a, tha tak maiin fencing khu han siam sela, funded by MLA LAD, Hmingdailova Khiangte, IPS retired tih an tar ngei dawn a, tar ngei ngei tur a ni a, a inhmeah zualin ka hria a. Tin, cheng nuai sawm thum mai nilovin, nuai zalai kha kan nei tawh dawn bawk a, kha kha a kutah ka'n dah let hmiah bawk a, a tha hlein ka'n ring a ni. Tin, a sawi tam berin Community Hall kan neih loh kha kan sawi hlawm a. Hei hi a ni khawp mai a. Ka RD-ah hian nuai sawmli emaw lek kha lamah khan token-in

min rawn dah sakin ka hria a. Kha kha engmah a ni lova, Hall pakhat kan zawh loh han zawhna tur pawh kha a ni lova. Tunah hian mahni inmualpho pawh ni ila, Hall kan lo sak laklawh ding theu tho hi a tam khawp mai bial tinah hian a awm vek a ni. Chung zawh theih loh chu sorkar mualphona a ni. Chuvangin, tun term-ah hian zawh tur ni ah ka ngai a. Chuvangin, kan hotute hian min rawn ngaih pawimawh zual sak ang tih ka ring a. MLA ten House zahawm taka kan ngaih pawimawh vek,

Pu R.LALZIRLIANA, MINISTER : pawimawh vek, opposition leh ruling bial lam ni lovin, a chhawrtute kan mipuite an ni tih kha kan ngaihtuahna ah awm sela ka duh a ni.

Tin, MLA zahawm tak Pu Robiaka khan Excise-ah khan work programme-ah engmah a lo lang ve lo a tih kha ka hresual em aw ka hre lo va. Excise kha work programme-a lang ve chi a ni lo va. Chuvangin, works kan nei lo va, khalaiah khan lang tur a awm lo a ni tih kha kan sawi duh a. Chulo chu Kanhmun PS a sawi kha thil dang, midangin kan sawi lohah khan a ngaih pawimawh awm hle in ka hria a. A bial a zau lutuk a, khung khu police lamah chuan in kan ti thei tawng tawng a. Amaherawhchu, sanction post a ngaih ve avangin post create te a ngai a. Khatiang kha kan sorkar hian kan ti thei lo va. Hmun engemaw zat, hmun 4/5 emaw tal te hi chu police station thar kan siam a ngai a. Heng lo te pawh hi khitah Pu Sangkunga bialah Dungleang te a pawimawh em em a. Kan han kal tawh thin a, khilam khi kan hmunpui lam tur a la ni a. Tin, misual, drugs tawlh ru te lo kal tamna a ni a. Chu lo pawh chu hmundang te a la awm a ni.

Pi Lalawmpuii Chawngthu kha a PSO kha silai tha deuh pek ni se a ti a. PSO kha silai tha deuh pek ni se AK te kan pe dawn nge ni a, engtin nge ni, a bula AK han awm run reng mai kha chu a ngaithei lovang tih kha chu ka hlau deuh a. Kan silai tha ber chi hi kan PSO te hi kan pe tawh in ka hria a, pistol kan neih tha ber ber hi. Chutiang chu a nih lai khan a aia tha deuh a duh a, a aia lian deuh a duh chuan la in be nawn leh ila, amah biak hi chu a hrehawm loh a.

Pu Lalthanliana, member zahawm tak kha a awm lo va. “motor lei nan hian nuai 500 lai an dah a, hei motor chu kan lei tam thei dawn khawp mai,’ an ti a. MLA zahawm tak te hi kan a der thiam khawp mai. Motor han tih khan motor leina a ni lo va, POL te, repair na te, engkim mai a khawl enkawl na zawng zawngt a huam a ni. khatiang ho kha kan indaih lohna nasat na ber hi a ni thin nghe nghe a, kan Finance Minister kan tih buaina tak pawh hi a ni thin a ni. Chutiang chuan sanction post awm si, central atangin pawisa lo kal vek si, khawiah nge in hman tak tih tepawh a awm thin. helaiah hian post create sa, sanction post chu kan ngah mai a. Amaherawhchu, khatiang khan kum dangah chuan helaiah keimahni state in budget-ah kan dah thin a. Chu chu a tawp ah kan surrender leh thin a ni. Chumi kan surrender tur chu re-appropriation, re-appropriate kan dil a. Nuai 400/500 min pe leh thin a, kan indaih lohna zualpui indaih deuhhleik theihna tur khan kan han ti a. Chutiang chu tunah chuan kan nei tawh lo va. Planning lam atangin actual in kan post, tuna a nung dam, a la thawk tak tak te against khan sum min pek tawh avangin salary-ah hi chuan surrender tur kan nei ta lo a ni. Kha kha min lo hriatthiampui kan beisei a ni.

Tin, Pu K.Sangthuama, member zahawm tak khan ‘zu man tlawm hi a tha lo a ni. Man to zawk, tha deuh zawk hi lak ni se’, a ti a. A awm khawp mai hetia han ngaihtuah mai hi chuan. Amaherawhchu, zu man tlawm in tawh, lei tawh vel tam tak kan lo awm ve bawh si a. A tha in thei lo hi a tam zawk kan ni bawh si a. Tin, zu man tlawm hi lei lo ila, tuna a zuartu te hian `4000, 5000, 3000, 2000 chin chauh hi zuar ta chauh sela. Bangladesh atangin emaw Myanmar lam atangin emaw zu man tlawm black in a lo kal leh vak ang a. Chu chu kan chhiatpui ang tih a hlauhawm khawp mai.

Pu K.SANGTHUAMA : Pu Speaker, khawngaihni khalai kan sawina ki kha chu, khatia man tam pui pui lam kha ni lovin, a tlawm zual leh lutuk ₹200 hnuai lam ₹170, ₹150 man ho zun rim nam rum rum ang chi, hi kan lei tam ber a ni a. Hemi kan in chuan, a man tlawm kan in tam lutuk chuan kan taksa in a lo ngeih lo va. Chuvangin ₹350, 400 man ang chi pawh hi ka zuk en vek a nia. Hetia han tih hian ₹400 man leh

₹350 man ang chi hi chu a in tlak khawp. Ka in ngai lo naa, a tha leh a chhia chu ka hre ve khawp mai a. Chuvangin, kha kha a nia kan sawi ki zawk. A to pui pui ₹3000,4000 man pawh a awm a. Chung chu milian deuh ho leh sum nei deuh ho in an in tho tho tih kha kan hrilhfhah duh a ni Pu Speaker.)

Pu R.LALZIRLIANA, MINISTER : Pu Speaker, a in ngai lo va, a chhia leh a tha a hria kha ka hrethiam khawp a. A chhan chu keipawh vaihlo hi ka zu ngai lo va. Amaherawhchu, ka nu in a damlai khan vaihlo a duh em avangin kan zinna apiangah hian vaihlo tui ber ber ka zawn sak thin a. Chutiang chuan vaihlo tui hi ka hre em em mai a ni. Chutiang tho chu kan u Sangthuama pawh kha a ni tih kha kan sawi ve leh duh reng reng a. Tin, kan han chhut a, tax te pawh heti zat hi kan collect tawh a. Amaherawhchu, helamah hian sorkar sum hi a liam hnem awm mang e aw tih thenkhat ten an sawi a. Hei hi sorkar sum in kan lei lo va, mimal in sumdawn na atana an tih a ni tih erawh kha chu kan hriat theuh ka ring tho a ni.

Quarter tha lo leh jail fencing tha lo te leh Home Department-a kan police quarter tha lo te hi kan vei khawp a. Keipawh thingtlanga ka zin hian kan quarter leh outpost te hi ka tlawh ngam lo a ni. A hminga Minister ni ve lem si chhe lutuk a an lo awm hi an khawngaih thlak a. Chuvangin ka tlawh tha ngam lo a ni. Heng hi kan hotuten an hria a, tunah pawh khilam hmar lamah chuan nuai 500 zet in tunah hian ka sa tha dawn a ni tih kha ka'n sawi duh a.

Tichuan, Pu Chalrosanga hian Lunglei Police Station hi Lunglei-a sak ngei ni sela a ti a. Hei hi Lunglei tana sanction kan dil a kan hmuh pawh a ni a. Amaherawhchu, kan hmun hi Lunglei-a pawl pakhat 'Chhim bial chhantu' in ti te hian an phal lo tlat mai a. Intihbuai hi hrehawm kan ti khawp mai a. Kan hmun a ni a, min ti buai thei pawh an ni lo va. Amaherawhchu, sak chuan eng eng emaw nawrh na siam tum ang te in an awm niin kan hria a. Chuvangin, Aizawl lamah pawh sak na tur kan ngah mai a. Bawngkawn-ah pawh sawn hmun tha deuh kan nei a. Sawtah sawn tha deuh kan

sa mai ange kan ti a. Chutichungin, hmannia ka va kal leh khan min lo ngen leh a, “Helamah hian rawn sa ngei rawh u”, an ti a. Tunah sawn lungrual tlang tak a kan hmun ngai ngeiah kan sa thei a nih chuan saw lamah sawn kan sa ang a. Chutiang a nih loh a harsatna min siam a, sawlai hmun saw kan hmun ui em em, infiammiten cricket an khelh nan field te police tlang ami, hmun thalai ber, saw mi let thum/ let li vela lian nena kan inthleng a ni a. Chutianga an phallo leh chu a na kan ti ve deuh hlek a, sawn mai kha kan han duh deuh a ni a. Amaherawhchu, MLA zahawm tak ten hetiang a ngenna an rawn siam hian kan mipuite pawh kan control ve turah beisei ta ila a tha awm e.

Pu K. Lalrinthanga hian, “Security i mamawh em? I mamawh chuan motor rawn tum rawh an ti thin”, a ti a. Hei hi a dik a, a chhan chu sum leh pai harsatna avangin MLA 40 zet kan awm a, kan security, pilot-te escort tur kha chuan kan state-in a tih vek sen loh avang leh remna leh muanna kan neih hnu ah chuan chuti taka kan ram hi raltitna hmun a nih tawh loh avangin kan ti thei lova. Amaherawhchu, MLA zahawm tak ten khawimaw laiah harsatna deuh a awm a, him lo ni a an in hriat chuan motor an in tum ang a, a mihring leh silai lam kha chu an duh zat zat kan pe thei a ni tih kha ka’n sawi nawn leh duh a. Tin, Upa a ni baw k a, helaia hna a thawh laia mi 12 lek a ruai a, zu an lo in thin, “ Zu in hi an lo tam awm mang e aw !” a tih kha chu Upa ngaihdan niawm takah khan ka ngai deuh a. Mi 12 tlai tin Assam Rifle-in zu an lo pek thin kha a sawi a, a tha tho ah ngai ta ila.

Tin, ‘rice mill’ a sawi kha a pawimawh khawp mai a. Khung Cachar ramri dep ah te khuan dah ta ila, khawthlang lama buh thar chanve aia tam mah kal thla thin khu hengah hian an her duh mai awm mang e, an tifai duh mai awm mang e tih ngaihtuahna keini pawhin kan lo nei thin a. Hei hi uluk taka ngaihtuah a, a theih chuan tih a tha khawpin ka ring.

Er.Lalrinawma, member zahawm tak khan thu a rawn sawi tha khawpin ka hria a. A ni hi NLUP lamah pawh hian a tui ve ta hle niin ka hria a, NLUP lama pawisa

kan la pek loh te pe thuai tur duhna te a rawn thlen a, a ropui ka ti a, min support tu tha tak niin ka hria. First timer a ni na a constructive criticism hi a thusawi dan, opposition role play dik takin helai hmunah hian thu a rawn sawi thin in ka hria a, a fakawm ka ti. Tunlaiin I League an khel a, a khel tha ber te kha pawisa leh cup-te an lo pe thin a. Khatiang kha Houe-ah hian thlang dawn ta ila chu keichuan ka thlang awm mang e aw ka ti. A chungah hian lawmthu tam tak sawi tur a awm in ka hria a ni.

Pu N.K.Chakma, MLA zahawm tak khan fencing chungchang kha a rawn sawi a, a dik khawp mai a, nakinah ka rawn react ang a. Lunglei bial leh a bial velah sawn vaibelchhe 45 lai tunah hian process mek a awm a, khatiang harsatna sutkianna tur khan tih a ni.

Dr. K.Beichhua, MLA zahawm tak kha, a ni hi chu doctor a ni a, Excise & Narcotics chungchang a rawn sawi atang te pawh kha, thil engkim hi a hrethiamin ka hria a. MLA fel tak, a ni pawh hi tih lehah chuan kan lama tang tura kan lo hual lawk deuh a ni a. Amaherawhchu, chutihlaia ka sawi duh chu, MLPC Act hnuaia zu lak luh avanga thi hi kan tam lutuk lem lo a ni ang tih ka ring a. Tin, MLA zahawm tak Pu. Sangkunga khan, “Hetiang-a in thar thut hi an ni lo ve, in rei tawh an ni e”, a ti a. A chepakaiiah chhui dawn ta ila, (Chemtatrawta thawnthu ang khan sawi ta ila chu) a lak atang khan kan sawi chuan khuahkhirh theih loh, a la tu officer-te pawh lungawi a ram awm lo, khatianga kan khuahkhirh theih loh te, sorkar hmasa lamin an lo lak tawh te kha an ni a, chuvangin addict pawh hi an tam em em a ni. Zu nilova drugs addict pawh hi an tam em em a, thil zahathlak tak a ni. Hemi kaihawih ah hian kan thih rate hi ka'n sawi ve hrim hrim ang a. 2008 -ah hian 68 kan thi a, 2009 -ah 84, 2010- ah 79, 2011-ah 100, 2012-ah 99, 2013-ah 99, 2014-ah 109, 2015-ah 126 kan lo ni ta a ni. Chuvangin, kan in rei chuan kan lo chau telh telh a, thi pawh kan tam telh telh ang a ti, chutiang chu kan awmdan a ni tih kha ka'n sawi a ni.

Tichuan, hmar lamah hel avanga election nei thei lo tih thu kha a rawn sawi a, thudik a ni a. Amaherawhchu, State danga helte an rawn kal a, Election Commision-te leh an state ten Election an neih tir tlat ang hian neih tir duh in ti ve ila chuan mi 4/5 in vote an thlak ringawt pawhin an tling thei a. Hmanah, kan ramah pawh kan hre tawh a, MLA election-ah khan, EVM an vaw chhe vek emaw an tih pawh khan a khawl record tu kha an lo vaw chhe tel si lova. Khalaia mi tlemte, khilam hel area ah bawh an inthlang a, an tlin ang khan ti duh ni ila chuan kan ti ve thei a. Amaherawhchu, tha kan ti lova, kan naute, kan unaute hi nakinah chuan inchhir hun an la nei ang tih kan ring a. Chuvangin, tihian VC -ah hi chuan han awm mai se kan ti chauh zawk a ni tih kha ka'n sawi duh a.

Pu P.C. Zoram Sangliana khan police leh mipui khulaia an inhriatthiam lohna, an inbeih laia police zah zia, police-in hrehawm an tih zia kha a rawn sawi a, a dik in ka ring a. A chhan chu kan police-te hi an vai pawhin singkhat rual chauh an ni a, veng pakhata mihring awm zat pawh an ni lova. Hetianga inbeih ralah hi chuan khawiahmah police hian an hneh thei in ka ring hranpa lo a ni. Chuvangin, helamah hi chuan tumah police hian kan cho lova. Amaherawhchu, state dangte anga ralthuamte han lek a, han kap ve mai duh chu nisela chuan hneh loh tur tumah an awm chuanglo tih erawh chu kan zavaia kan hriat a pawimawh hle in ka hria.

Pu R. LALZIRLIANA, MINISTER : Pu Lalruatkima, MLA zahawmtak khan tax hmuh zatte kha a rawn sawilang a. Tax kan hmuh zat hi, a sawi leh nakina ka rawn sawi leh tur, ka khaikhawmnaa ka sawi leh tur pawh kha a inang chuang lova. Hei hi engatinge a inan loh kan tipalh ang tih ka hlau a. A chhan chu zawhna a lo kal a, kan Deptt.-a thlen khan an rawn chhang a, khami hnu ah khan tax dang a lo lut leh a. Khatiang khan a tawpna kha chu a tam ta viau a, vaibelchhe 40 leh tih mai ni lovin, 50 leh tih lai kha a lo thleng thei ta reng a ni tih ka'n sawi duh a.

Tin, PSU, kan thiat tak ho ZOHANCO leh MAMCO/MIFCO tih vel ten an zawrh dana an hlep leh police hlep kha a inang reng a. Tumahin an chuhpui lova, sorkarin an chuhpui lova, anmahni duha an hman tur a ni a. Midang hian engvanginngan an hman ve ka hre lova. Kan Police Deptt. hi chuan an hmang tha em em a. Sorkar atanga sanction rem ve chiah si lo, inralna te leh eng eng emaw tih nan, an welfare fund atan khan a pawimawh a. Nakinah kan ngah deuh hunah te pheih chuan kan quarter chhe lutuk, in ngaih pawimawhte pawh hi repair nan an la hmang zel dawn a ni tih kha ka'n sawi duh a ni.

Tin, Vairengte-a two wheeler chungchang in rawn sawi, entry tih ve loh kha, ti turin SP in Order a siam nghal ta a ni tih kha ka'n sawi duh a.

Tin, MLA lambunna-a tel, khatianga ti tha te reward pek loh an la awm a nih chuan, enquiry din a nih a enquiry din a pek awm a an ngaih mi tha, khatih laia lo fuih mawlh mawlh tute kha chu reward pek ngei ngei tur an ni ang a, kan pe ang tih ka tiam bawh a. Chuti lova tlanche daih a, an silai ri hre reng a chhan ngam lo, te kha chu kan ban ta hial awm mang e aw ka ti a. Kei chuan khang te kha chu ban awm ka ti ngawih ngawih a, dawihzep lutuk kha chu eng atan mah police-ah hian an tangkai loin ka hria a. An ban loh chuan a ban lo tute hi ka ngei zawk mah mah in ka ring a ni. Chutiang chuan.

Tin, Police officer pensioner orderly la kawh an awm a nih chuan heng hi kan enchhuak ang a, kan laksak nghal ang tih ka tiam in, ka sawi duh bawh a ni, heng hi thil diklo a ni. Kan pension tawh chuan, kum 30-40 dawn lai kan service tawh a, khang kha kan nei thei a. Hetianga pension tawh hnu a la kawh hi, central service-ho hian an ching zual leh nghal a. Ka opposition nih lai pawh khan ka sawi fo tawh a ni. Opposition kan nih laia tha lo kan tih hi, ruling kan nih pawhin a tha lo kha chu a la tha lo reng a ni. Chuvangin, kan laksak nghal ang tih ka sawi duh a ni.

Tichuan, MLA zahawm tak Pu T.T.Zothansanga khan RD sum zatve pawh hi Agriculture hian an nei lo tih thu kha a sawi a, a dik ang a. Kan state atanga keimahnin sum kan pek ve erawh hi chu, Agriculture sum zatve pawh hi RD hian kan nei lo ve bawh maithei a ni tih kha kan hriat atan. RD sum hi Centrally Sponsored Scheme atanga kan sum hmuh deuh vek anih avangin, nichina ka sawi ang khan, helaiah keimahnin kan hall-te kan han tih ve theihna mai tur, social education-ah pawh hian min dah sak ngai tak loh avang hian, hei hi kan rumna chu a ni ve a ni tih kha ka'n sawi duh a.

Tin, police kan lak te kha sawi a ni a. police hi hmanni ah 60 mai kan la lova, 6 ft chin chung lam City Police atan khanin kan han la a. Khalaiia chanchinbu-ah te sawiselna awm lo a rawn sawi kha, keipawhin lawmawm ka ti a. Chumai chu a la ni lova, Excise Deptt.-ah hian hmanni lawkah khan advertisement-te chhuahin, constable mi 25 kan la bawh a. Tin, Delhi Police hi 67, Delhi-a awm tur kan la bawh a. Chung zawng zawngah chuan chanchinbuah leh tumah hian sawiselna an rawn nei lo, ka hnena an thlen mai chu sawi loh, chanchinbuah leh Whatsapp leh hetiang ang velahte sawiselna awm lova kan tilitiak thei hi ka thawhpuite ka chhuang hle a ni, a lawmawm pawh ka ti, Pathian min venpuina niin ka hria a, ka lawm khawp mai.

Tichuan, Pu T.Sangkunga te, Pu RL Pianmawia te leh Pu R. Vanlalvena te, Pu Vanlalzawma te an rawn sawi a, a lawmawm ka ti a. Opposition Group Leader-ina 'BADP semdan hi a dik lo deuhvin ka hria' a tih te leh 'police zu zawrh hi ennawn a tha lawm ni, a dik lo deuhvin ka hria', a tih te. A sawi hmang atang kha chuan, ka ngaihthlak dan chuan, a na khawp mai a. Amaherawhchu, mi hmuh ah chetze mawi amah atang hian a lang Chiang hle in ka hria a, ropui ka ti a. Hmanni ah khan a thusawi lain point of order ka va pe a, a ni chu a thu hmiah mai lehngal a, thenkhatte nen chuan kan inang lo ngawtin ka hria. Chuvangin, a ni hi entawn tlak ka ti bawh a, kan House-ah hian thil tha tak rawn chherchhuaktu tur ni te in ka hria a, a chungah hian lawmthu ka'n sawi bawh a ni.

Tichuan, ka khaikhawmna ah khan, darkar chanve, darkar khat chu kan tih theih mai dawn hi. Khaikhawmna tlem tlem kha han nei ta ila, Pu Speaker. Agriculture hi Directorate pahnih ah kan then a, Research & Extension Deptt. leh Agricultural Crops Husbandry a ni a. Research hi chu kan hria a, research te an nei ang a, eng eng emaw an ti ang a, khatianga ang a an hmuhchhuah kha training-te an ti anga, thil tha kha Agriculture and allied Deptt.- ah an rawn pe chhuak ang a. Chutiang chuan, kan ram hi eng angin nge kan enkawl ang tih min zirtirtu turte an ni tih kan hria a.

Tin, Crops Husbandry hi chu hna chitin reng thawktu an ni mai a. Nichinah kan sawi tawh a, leilet tur hi ram zau tak kan nei a, tunah hian 22% vel emaw chauh hi leilet, buhchin theihna ah kan la siam a ni. Chutah chuan, kan tharchhuahte hi rin aiin a tam tawh a, kumin 2105 khan metric tonne 36,471 kan thar a, tlangramah hian 24,343 a ni. Tlangram leilet hi a zim telh telh a, amaherawhchu, kan research lama thawktute leh mithiam, scientist-te avangin eng eng emaw leitha te nen tangho in, thil dang dang tiin kan ram hi kan vat tlem zawk na a, kan tharchhuah hi a pung zawk tlat mai a. Hei hi kan induh ve na, kan lawmna takte pawh a ni a.

Oil palm chin theihna hi, sawrkar hmasa lam atanga an lo tan kha a ni a. Tichuan, keinin kan chhunzawm chho zel a, hectre nuai 1 chuang Mizoramah hian awmin kan hria a. Chutah chuan, tunah hian hectre 23,358 ah chin a ni a, chungkua 10,843 in he thlai hi an ching tawh a ni. Tunah hian metric tonne 9,215 kan lo thar der tawh mai a lo ni a, ropui hle in kan hria a.

Tin, link road kha chu in sawi a, kan sawrkarin a ngai pawimawh a, tin, RKVY atang hian tun 2015-2016 ah pawh hianin 2015-2016 ah 27 km lai kan lai dawn nghe nghe a ni. Tichuan Oil Palm hi central atang pawhin ching nasa turin min rawn fuih reng a, kumin atan pawh hian cheng 454,80,000 min rawn pe nghe nghe a ni. Hetiang hian sub-mission on agriculture mechanization atang hian kan buh tharte a lo hlawk theihna tur in tractor kan lei a, chung chu a huho a in

siam te, zau khata khatianga intawm tur khan custom hiring centre kan ti a, tunah hian hmun 47 lai ah kan nei tawh a. Kuminah hian 10 pek belh leh kan tum nghe nghe a ni. Chutiang chuan fu her khawl te, buh sengna khawl te, hlo thlawhna khawl te, water pump te, power tiller te leh fu chhuanna ang chi te subsidy-a pek tur ang chi tein tunah hian kan chhonzawm zel dawn a ni, kum lo thar leh tur ah pawh hian. Tichuan, central lam atang bawkin MNF sorkar hmasaa an lo buaipui hrep tawh organic farming tih kha an rawn tharthawh ve leh a. Hei hi keima mimal ngaihtuahna tak ah chuan organic kan tih hian thar tam kan duh si a, kan thar tam thei ang em aw tih, ngaihtuahna min neih tir hle a. Amaherawh chu ram puma ti lovin a area, mix specific area kha kan siam ang a, chung ah chuan kan ti turah kan ngai a.

Kumin atan pawh hian central atangin cheng 165,358,00 lai min pawmpui a, min rawn pe thuai dawn nghe nghe a ni. Chutiang chuan RKVY leh NLUP lam atang hian leilet WRC-I leh II siam belh zel tum a ni a. NLUP third phase leh fourth phase-ah hian mi 5009 tunah hian thlan sa kan neih mek pawh hi kan pe chhonzawm zel dawn a ni. Tin, climate change avang hian hei tun ang hunah te pawh hian ruah a sur ta vak vak mai a, May, June-ah hian khua a thal leh dawn nge ni, hei hi hriat a ni lova. Chumi avang chuan hemi in a nghawng theih tur hi lo thlirlawk in NMSA (National Mission for Sustainable Agriculture) hnuaiah hian, heng laka invenna tur te pawh hi ruahmanna siam mek a ni tih kha Agriculture-ah hian a khaikhawm nan ka'n sawi duh a.

Tin, Pu Speaker, R.D-ah hian ka'n sawi leh ang a, NGNERGA kan tih hi central-ah Congress sorkarin a lo bultum kha a ni a. Tun sorkar, Modi-a sorkar a lo pian hian an han phur lo deuh dawn niin kan hria a, kan lungngai hle a. Keini chang kan lungngai lova, India ram state zawng zawng, India ramah pawh, Mizoram-ah pawh midum te hial, Bihar atang pawh a kan chawkluh theih

mang tawh lohna kha rawn ti tawp dawn niin state Chief Minister zawng zawngin an hria a. Amaherawhchu, central-ah anmahni mi leh sa te leh midang te Chief Minister tangrual ho in an sawi a, chuvang chuan tunah hian ngai kan awl leh ta a.

Kuminah hian ni 35 kan inhlawh tawh a, hmanni lawk ni 21 March khan Rs. 219.545,000 min rawn pe leh a, chumi hnu ah chuan R.D. lama kan hotute'n central an zu dawr leh a, crore 116 min rawn pe leh dawn bawka a. Han en hi chuan kan sawi tawh ang khan ni 72 vel kumin, tunkum ah hi chuan (hei naktuk tuk ah a ral mai dawn a, kan inhlawh hman tawh lovang a,) tunkum pawisa hian ni 72 vel chu kan inhlawh hman dawn ani tih kha helaiah hian kan sawi a ni. Helaia an inhlawhna rate hi tunah chuan mi pakhat in 183 ni khatah an hlawh a, April ni 1 atang hian chuan 188 an hlawh tawh dawn a ni.

Nichinah khan thahnemngai takin awareness hi Centrally Sponsore Scheme atang hian IWMP leh a pialham atang hian inti tawk lo deuh a ni tih kha in rawn sawi a, a lawmawm kan ti khawp mai. Amaherawhchu, vawiiin-ah hian han sawi vak dawn ila, a ninga te chu kan ni leh palh ang tih ka hlau deuh si a, kan sawi tam hman dawn lova. IWMP-ah hian khaw 300 tunah hian kan tuam mek a, chutahchuan Self Help Group hi 1108 lai kan nei tawh a. Tichuan, 2016-2017-ah hian kan budget hi nuai 3835 a ni, kan target a ni. Tichuan IAY, NRMM te DRDS, SIRD, DSLMC & AIC, ARDP, BADP leh CS chi hrang hrang MZSRLM, kan tih te, hei lo te pawh hi RD Department-ah hian Centrally Sponsored Scheme kan nei a. Heng avang hian a nia kan sum leh pai te pawh kha a rawn tam tut tut nachhan kha ni.

Chutiangchuan BADP bik ah hian kumin ah nuai 4031 kan target a ni a, kan budget a ni a. Nichinah khan in a sem dan hi a dik tawk loh deuh a ni an tih kha keini pawh in tender hi ti ila a tha ang a, kan han ti a.

Amaherawhchu, MNF hun tawp dawn ah khan anni pawh in an tender a. Kha thil kha keinin kan han chhawm a, central lam atangin sawiselna nasa tak keimahni zawkin kan tender avang khan an rawn siam a, chuvang chuan kan tender ngam ta lova. tun ang hian kan han sem ta zel a nih ber hi maw.

Rural Housing kan ti a, miretheite in chung tur, kan hotupa in, '1984 vel ah rambuai kan ni a, kan in leh lo te sipaiin min hal chhiat sak nasa lutuk a, rangva in chung nei zo pawh kan awm tawh lova a, kan sorkar chuan Rangva kan sem ang,' a ti a. Chu chu tunah hian kan sorkar hian kan la chhonzawm zel thei ta hi lawmawm kan ti a. 2013-2014 khan nuai 50 te hi min han pe ve a, a hma khan nuai 400 te, 500 te min pe a, khami kum ah khan a tlem ta thut a, chu chuan kan han lei a. Amaherawhchu, mirethei tak tak te kan han pe a, rangva in chung neilo hi an lo tam lutuk ta lo a. Chumi piahlam ah MLA te kutah an dah vek tawh si a. Chuvangin, MLA te tan reserve in ka discretionary ang deuh in kan dah a. In kang te MLA ten an rawn sawi in pek loh kan nei lo a, kan lawm viau a ni.

Kumin ah hian kan Finance Minister leh kan Chief Minister ten miretheite kan VIP te an ni a, tiin tun financial year tawp dawn khan nuai 200 min han pe a, tunah hian miretheite in chung tur rangva lei nan kan hmang a, kan lei leh mek a ni tih ka sawi duh bawk a.

Tin, Self Help Goup, Mizoram State Rural Livelihood Mission an tih hi thil thar, hmanni deuh lawk atanga an tih kha a ni a. Tunah hian Self Help Group hi 735(zasarih sawmthum panga) kan nei tawh a, December khan SARAS fair kan ti a chutah chuan District pariat atangin Self Help Group 120 (za sawmhnih) lai an lo tel a. Helaiiah hian an thawhchhuah ringawt, an rawn hralhna man kha helaia kan han zawh pawh khan ₹ 57,41,828(nuai sawmnga pasarih singli sangkhat zariat sawmhnih pariat) lai karhnih pawh tlingloah khan an rawn

leichhuak thei a ni, kan thawk tha ve viauin kan inhria a. Tin, 2016-2017-ah hian Serchhip leh Kolasib bakah District 4(pali) Champhai, Mamit, Lawngtlai leh Saiha te hi kan cover tawh dawn a, chumi atan chuan cheng nuai 245,397,000 lai kha budget-ah kan dah nghe nghe a, hei hi central-in min pe dawn a ni.

Thil thar keipawhin ka hriat ngai loh Mahila Kisan Shak Shakti Karan Pariyojana (MKSP) hi tan a ni dawn bawk a, cheng nuai 270 (zahnih sawmsarih) R.D. Ministry-in min pe leh dawn a. Tichuan, start-up village entrepreneurship Andeen Dayal Upadhaya Gramin Khaushalya yajona an ti a, tiang hian hming thar hi an rawn ti a, kan hriatthiam ve mang loh hi. Hetiang hnuai hian khua entrepreneur chungkaw 500(zanga) tanpuina kan pe dawn a. Tin, Self Help Group 1188 din a ni ang a, chumi zinga 941 chu an in peipunna tur in revolving fund kan pe ang a. Tichuan, group 1109 hnenah hian community investment fund kan pe dawn bawk a ni. Chutiang chu R.D lam atanga kan tum dan a ni, sawi tur a tam khawp mai a, amaherawhchu, zawhna lamah te leh thildang ah pawh a tul a nih chuan kan la sawi zel ang a.

Excise-ah hian nichina an sawi ang khan department te tak te a ni a, mi 526 chauh, (police-te nena tehkhin pheih chuan batallion zatve chauh an nih chu,) kan awm a, post ruak hi 100 lai kan nei thung a ni. Lawngtlai-ah sawn office kan la nei ve lova, district 7-ah hian Superintendent ten an ho mek a. Nichina kan hotuten an sawi ang khan Aizawl-a kan District Office hi mi in luahin, man to takin, mahse building chhe tak si, tawt tak leh thim takin kan awm a, mi ban tam tak a ni ang lawi bawk si a. ZENICS hote tih tawp a lo nih takah hian an building hi kan Chief Minister zahawm tak hnenah hian kan dil a, anin min lo phalsak a, kan lawm khawp mai a. Hei hi Excise tan Court nen a inhnaih em avangin a rem zual bik a, churang chuan April thla atanga luah theih hi ni se kan duh khawp mai a, sorkar sum save na pawh a nih nghal dawn avangin.

Tin, MLPC Act hnuaiah hian bonded warehouse an tih hi 3 a awm a, retailed wineshop hi 56 a awm tawh a liquor card 66257 a awm tawh a ni. Revenue hi an sawi ang khan 3rd March thleng a ni awm e, ka hrechiang chiah lova, heta revenue kan hmuh hi ₹ 536524499/- (vaibelchhe sawmnga pathum nuai sawmruk panga singhnih sangli zali sawmkua pakua) a ni tawh a ni. Khaw lian deuhah te hian wineshop hawn belh an duh a, hmundangah pawh hian an duh a, amaherawhchu staff kan indaih loh avangin tunah hian wineshop thar kan hawng thei ta lo a ni. A chhan chu kan MLPC Act, zawrh chungah khapna danah hian hmun dangah chuan warehouse atanga an lakchhuah hian Excise-in an vil zui chuang lova, anmahni in an hralh mai a, keini chu kan hawn sak a, kan khar sak leh a, thil dik lovin an ti em tih kha an en ve reng avangin indaih a har a ni.

Excise hian zu chauh hi a ngaihtuah a ni lova, thildang ruih theih thil heroine te, opium te, ganja te, damdawi ruihtheih thil dangte hi a hma vek a. Nasa takin hengah pawh hian tan an la a, NGO te nen an tanrual avang hian man pawh hi an man hnem tawh viau reng a ni. Chuvangin, NGO te a bikin YMA, kan thawhpuite chungah hian kan lawm hle a ni. MLPC Act hman hnu a zu an lakchhuah atanga thi hi tumah an la awm lo a ni tih ka'n sawi duh a. Engkim hi a tawka a awm a, a tawka in loh chuan zu tha eng ang pawh Scot Whisky an tih pawh hi in ta reng ila, chaw-ah ring ta ila thla tam kan daih miah loving. Chaw te pawh hi ei vak vak ila, ei reng mai ila, tui in si lo ila, kan ngeih rei chuang bawkw lovang a. Chuvangin thil in balance tawka hi thiam a ngai a ni, chu chu Mizoten kan zir tur a ni awm mange aw ka ti a.

Zu te kan do va, kan sawi deuh theuh a, a dona lam chu kan sawi na vak lova, hmun tam takah, platform hrang hrangah a dona a nasa viau a, a dik khawp mai. Mahse, ka sawi ve duh chu zunthlum ho hian vawksa an ngeih miahlo mai a, kan kohhran Seventhday Adventist pawhin vawksa chu sa tenawm,

sa tha lovah a ngai a. Amaherawhchu, anni khan an ei duhlo mai a, vawksa zuartute emaw, zunthlum te leh kan kohhran thenkhatte khan vawksa zuartute leh a vulhtute kha an dem vak vak lemlo a ni, mahni in control a ngai a ni. Kan kohhran tan, kan kristian-na atana thalo kan tih chuan, Lal Isua nena kan inkar kha hei hian a chawk danglam thei dawn a ni tih kan hriat chuan, chu chu kan ti lo mai turah ka ngai a.

Chutiang chiah chuan sorkar hmasa lamah te kha chuan chakai farm te kha siam kan tum a, Pu Speaker, i veilamah khan ka thu a, ka phur khawp a ni keipawh dik chiah chuan. Kan Chief Minister kha enge ni ta tih ka va zawt a Vanlaiphai lamah khi chuan pakhat chu an siam dawn ta emaw ni a ti a. Ka lo phur tehlu nen, a bawppui lian te hi han khel ila a tui si a, chakai thau rim te hi chu a tui a nia, ka va ti a.

Pu R. LALZIRLIANA, MINISTER : Ka ti el lova, a tak tak ania tunah tukin ah pawh khan kan hmeh a. A tui kan ti khawp mai a, tui te a pai leh nghal a, khatiang kha ania. Ama'rawhchu, chakai te, kaikuang te hi tui ti em em in an ei chuan an bawl a, an thak a. Aiawtchiah tu te kaikuang man tute kha an va dem vak vak lem lo, anmahniin an ei lo mai a ni. Chutiang chu kan inzir hi a ngai khawp mai. Zu hi a tha lo kan tih chuan in lo mai ila, kan kristian na atan a tha lo kan tih chuan kha kha Pathian chakna ringin do ngam mai ila. Mahni in in lo mai ila, mi chung a thuneih kan tum lutuk hian mi pawh te pawh hi kan sawi thei a ni. Hualngohmun ah zu zawrh na (Hualngohmun lam kha a ni ta in ka hria a,) khawtlang ten an duh lova, khawtlang ten an duh loh kha hria in a zuar ta bik lova, a khar ta hmak a. Ama'rawhchu, a lak sa stock kha ala awm avangin nizan khan hmaituam ten a chowkider kha, a nghaktu kha an kaitho a, an hawntir a. An zu te an tihchhiat sak a, a pawh ka ti khawp mai. Hei hi tute nge hmaituam thin kan tih chuan misual te, mi hma a inlan ngam lo hmai pawh hmuhtir ngam lo misual te an ni. Chuvangin, hemi zu kan duhlohna ah hian hmaituam kher pawh a ngai lo. An duh lohna ah chuan an duh loh zia tha takin an sawi a. An sawina ah chuan pass kan lo pek sa pawh

tumah sorkar chakna in zuar rawh u kan ti a, kan ti lui lo reng reng. Chutiang titu te chu misual an ni, mi dawihzep misual anni tih hi helai House-ah hian kan sawi nawn duh ve hrim hrim a ni. MLPC Act kan tih hnu a krismas leh kumthar hmasa ber kristian te hunpui hmasa ber kan han tawng kha lehlamah chuan a huphurh awm viau a ni, a hminga a changtu lo nih bawk si chuan. Amaherawhchu, kumdang zawng aiin kan sorkar hnathawk te, kan NGO te, Excise te, Police te an tan avangin kumdang zawng aia zurui tam lo leh accident awm lo an ni hrim hrim mai kha a ropui ka ti a. Mizo te hi thuawih thei tak ni in halpuah kan lawm em em a. Amaerawhchu, kristian kan ni a, ‘Lal Isua chawimawi na atan hei hi a dik lo e, I ti lo teh ang u, ar te a pulh phah a, kan hrisel loh phah a’, kan ti a ngenna kan siam a, appeal kan siam a. Mizo mipui ten an awih duak mai a, halpuah a ri ta lo mai a ni. A lawmawm kan ti em em a ni. Damlo tan te leh thil dang tan khan a tha em em a ni. Chuvangin, tun ah pawh hian kan kal zelna tur ah hian Zofa te hi thuawih thei tak kan ni a. Mahni thu a law & order kenkawh tum mai lovin thuneitute kut ah hian innghat ngam ila, thunei tuten theihtawp an chhuah ang tih hi ka ring a. Chuvangin, tunhnu zelah pawh law & order chungchang-ah mipui te, YMA te, NGO te, Zoram mipui zawng zawng te hi tangho ila, Zoram nuam i siam ho ang u, kan ti a ni, excise chu lo tawk leh ta sela.

Home department hi tawi te in han sawi leh ka duh a. Pu Speaker, tunhma kha chuan kan police ten misual an man a, charge-sheet an han siam a, court-ah an han thehlut a, convict hi an awm hlei thei lo a. Kumin chho ah hi chuan 92.9% hi convict charge-sheet kan pek a kan police te’n court-a an han tih hian convict an lo ni ta reng mai te hi kan police hi an thang tha em em a ni. An efficient sawt em em a ni, an inzir nasa a ni, a ngai reng kha an ni si. A enkawl tu azir chu a ni thei viau awm in ka hria keipawhin, a lawmawm ka ti a. Mizoram hi India ram a conviction rate sang ber kan ni nghe nghe a ni. Tichuan, kumin chho ah khan silai 80 kan police ten an man a, a mu 18,138 an man tel bawk a ni. ruihhlo hi ₹ 5,36,35,750/- hu an man a. ND & PS Act case hi tunah hian 47 kan register mek a ni. POCSO (Protection of Children from Sexual Offences Act, 2012)

hnuai ah hian mi 198 thubuai siam sak an ni tawh a. Tun ah hian in mi 4 thiam loh chang an awm tawh a, a dang kha under trail mek an la ni tih ka sawi duh a.

Tin, ILP hi kan sawi thin a, tunah hian sawi a hlawh lo viau mai a, amaerawhchu, ILP ti tu, vai la chhuaktu te hian an haw lehna pawh hi kan ti tha duh lova. Kan in report tir duh lova, kan lakchhuah chuan kan chhawr a, kan chhawr zawh chuan an tei tei in kan tei tir mai a, hei hi tha kan ti lova; chuvangin, ILP la chhuaktu tur te hi dan khirh deuh hlek zawk in call deposit in security deposit ve tawh sela tha kan ti a. ₹1000/- leh ₹2000/- kum2 chi te kha an awm a. Ni 10 lek la chhuak tur pawh khan ₹1000/- a deposit a ngai tawh dawn a ni, chu chu ka'n sawi tel duh bawh a.

Tin, sainik school kha kan vei tlang a, a lawmawm ka ti khawp mai a. Hei hi kan hnam in kan chhawr tur tak zet zet a ni a. Tun ah hian a construction work hi 60% zawh a ni tawh a. 2017-2018 academic session ah hian in pawl 6 tan tum a ni a. Tah chuan mi 60 kan la thei dawn a, mi 40 erawh chu ram leilung fa te tan a ni tih kha kan sawi duh a ni.

Tin, CCTV Aizawl city surveillance project I & II kan zo tawh a, III-na hi tun ah hian kan thawk mek a. Hei hi a tha khawp mai a, zan lam ah chuan thil tha lo tak tak te pawh helai viltu te hian a tam khawp mai an ti a. Engpawhnise, traffic atan te, misual man na atan te, inumna khalai ah khan misual a lo kal e tia inhrilh zung zung nan hian a lo tha em em mai a ni tih hi kan neih hma pawh a miten an sawi thin hi han neih ve phawt loh chuan a hriat hleih theih loh a. Kumin ah ringawt hian kan police 633-in promotion an hmu a ni. An tam bawh a, a lawmawm kan ti khawp mai.

Tin, Forensic Science hi an tangkai khawp mai a, tunah chuan DNA profiling technology te an lo ti ve thei a, kan lo hman theih tawh avangin misual man chhuah nan a tha khawp mai a. Hei hi tumah in a an hnial theih loh khawvel in dik lo thei lova a ngaih, chutiang chu kan ram ah kan officer te ngei in an han ti ve thei ta te pawh

hi kan lawm hle a ni. Tichuan, Mizo thalai kumin chho ah khan mi za army-ah kan tir a, Air Force-ah hian 18 lai kan dah lut bawk a, Navy-ah pahnih lak an ni bawk a. Heng te hi Youth Commission lam kan Chief Minister te vang a ni, kan lawm hle a ni.

Tin, Prison lam hi sawi tur a tam a mahse tlem kan sawi ang a, Jail hi pasarih kan nei meka, he tah hian sang chuang tang mek kan nei a, Mamit leh Serchhip hi hawn theih in engkim kan peih tawh a, kan peih lohna chu security kan la nei thei lova. Sorkar lamin security min pe thei a nih chuan englai pawhin hawn theih tawh a ni tih kha ka sawi duh a ni.

Kan hotuten police ho quarter chhiat an sawi a, a dik a, thahnem min ngaihpuoi avangin a lawmawm a. Chutih lai chuan MPF kan tih kha a tawp ta bawk si a, tunah hian kan state atangin sum min dah sak bawk silova, tih ngaihna kan hre lova. A tul ang zelin kan Chief Minister leh Finance Minister te hian min pe ang tih chu kan ring a, kan thla chu a phang chuang lo a ni. Kan hriat angin police post hi 1960 a ruak a, constable zawng pawh hi 1695 ruak a ni tih kha kan sawi duh a.

A hmawr kan khar hmaa kan sawi leh duh chu, Home Department lam atanga ngaihtuah leh Minister pathum pali lai thu khawm in kan ngaihtuah chu ‘Aizawl khawpui nuam i siam angu,’ tih hi kan sawi duh a. Chanmari leh Kulikawn ringawt pawh hi kal pangngaia kal chuan darkar khat a lo ber ah kal a ngai tawh a, petrol leh diesel te a heh em em a, boruak kan ti bawlhhlawh bawk si a, tihngaihna hre lova ek cheh thut a thut reng chi niin sorkar chuan niin kan hre lo a ni. Keini aia lirthei tam na daih ram dang khawpui tam tak ah an tih theih ang hi engvangin nge kan CM ho hian kan tih theih lovang? kan ti ang kan tih pawh a mi in min rin loh em em lai pawh a kan tih theih lai hian helaiah hian engah nge kan huphurh reng ang tih ngaihtuahna kan nei a.

Chuvangin kum hnih kum thum lek chhungin Aizawl khawpui hi khawpui nuam ah kan siam thei dawn a. Chuta tan chuan Japan te, Korean te, American mi nih pawh a ngai chuang lo reng reng a ni. Keimahni Mizo te hian kan ti thei in kan hria a, nichina ka sawi ang khan thuawi thei tak kan ni. Chuvangin kan sal tanna atang hian kan in chhanchhuah a tul tawh in kan hria a ni. Chuta tan chuan sorkarin vision leh road map, keini in a kan han ngaihtuah a kan lo neih ve chu kum khat aia rei hret emaw kan ti ang a, chutiang ah chuan motor nei zawng zawng ten an inah emaw, an ramah emaw, an thenawm te ramah emaw veng dangah emaw, lirthei dahna siam turin hun pek an ni ang. Hei hi thil tha tak niin a lang a, Zemabawk-ah te leh veng kecil kan tih ah te pawh hian miten garrage an nei ang a, an ram ruak mai mai ah pawh khan mihausa te sum kha an lo tel ve thei dawn bawka ni. Chutiang chuan garage hi neih vek tur tih hi kan ngaihndan a ni a.

Sorkar public transport bus te, taxi te, two wheeler te, Aizawl khawpui hi tih phuisui ani ang a, bus changkang AMC in an tum ang an han tih te kha a hranpa in bus changkang heta tanga Kulikawn atanga Dawrpui va tum mai chi te, a bak ding miah lo khatiang chi te kan ngaihtuah ang a. Tin, zanlai leh vartian pawha hman theih tur inhlawhfak na veng tinah pali emaw pangnga emaw kan dah ang a, chutiang chuan kan transport system kan ti phuisui dawn a ni. Singapore sawi fo hi ngai tawh lovin helai hmun ah hian felfai takin, thianghlim takin kan che thei tawh turah kan ngai a ni. Chutiang tur chuan AMC Transport, Police UD & PA te nen kumin May thla atang hian project hi tan ni ta sela. Kum 2017 Independence Day-ah chuan khawpui thawl tak, traffic jam te ziaawm takin kan kal thei turah kan ngai a ni. Kum 10 hnu ah phei chuan traffic jam awm lohna hmunah kan siam thei dawnin kan hria a ni, chu chu ka'n sawi tel duh zawka ni. Ka Demand

No.7	-	₹ 29,55,48,000
No.16	-	₹ 5,80,44,13,000

No.31 - ₹ 1,13,00,62,000

No. 38 - ₹ 3,58,00,36,000

Total : ₹ 10,81,00,59,000 hi he House zahawm tak hian min pass pui turin ka rawn ngen e.

SPEAKER : Kan Minister zahawm tak chuan a demand No.7,16,31,38 hnuaia Department hrang hrangten 2016-2017 chhunga a vaia belh khawm ₹10,81,00,59,000/- he House pass sak turin a dil a. Pass remti zawngin 'remti' ti rawh u le (Remti). Demand No.7.16.31.38 hnuaia 2016-17 chhunga hman tur a vaia belh khawm ₹10,81,00,59,000/- chu he House hian lungrual takin a passed a ni.

SPEAKER : Kan Official te an awm tha hle mai a, an chungah lawmthu kan sawi a. A tawp min thlenpui ve sela tha kan ti a ni.

Tunah chuan, kan Minister dang pakhat Pu H.Rohluna demand no. 20, 40, 44 na te hi sawihona kha rawn tlip sela, pass rawn dil nghal mai teh se.

Pu H.ROHLUNA, MINISTER : Pu Speaker, ka lawm e. Hun kan hmang rei ta deuh hlek a, hun han lak rei deuh pawh a inthlahrunawm viau dawn in ka hria a, churang chuan hmalakna te leh achievement a detail in kan sawi hman dawn lo tih kha kan sawi hmasa a. Tin, vawiin ah member zahawm tak tak ten ka department enkawlte ngaihthlak hrehawm tur engmah awm lo min han sawi sak te hi an chungah lawmthu ka sawi hmasa a.

Trade & Commerce lam ah hian thuhma nei duah lo in han lut nghal mai ila, Trade & Commerce Department chungchang hi member sawmpakhat (11) in an rawn sawi a, a tlangpui thu in member ten an rawn sawi zawng zawng a mal te te a react lo in a khaikhawm theih deuh mai in ka hria a. Border Trade, Land Custom Station te leh

Integrated Check Post (ICP) Bangladesh nen kan inkar lama tih tum te hi an ngaipawimawh tlang hle in ka hria a.

Kan hriat theuh ang in Zokhawthar chu nikum lamah khan commission tawh a ni a, Zorinpui lamah hian tuna Kaladan Multi modal Transit Project Road hi a tlang a ni tawh a, he lamah hian central sorkar pawh in chak takin Zorinpui-ah hma a rawn la turah kan beisei a. Tin, a hma phei chuan anni lam hi an hmanhmawh a, kan state sorkar hi term hmasa lamah phei chuan min nawr tawh zawk a ni a, mhase, kawng a tlang loh avangin hma an la thei ta lova, tunah hian hma la tha leh turin kan in nawr chho leh mek a ni. Bangladesh border lamah pawh ICP Tlabung, Kawrpuchhuah-ah tih tum a ni a, Union Minister of States for Home Affairs Pu Kiren Rijiju pawh in a hmun ah a rawn tlawh tawh a, Home Ministry leh Foreign Ministry lam te kaltlanga hmalak a ngaih avangin kei nin direct in Bangladesh sorkar nen hma kan la thei lova, a chak thei ang berin hma lak chhoh zel a ni. Hei hi kan Chief Minister zahawm tak pawh in a ngaipawimawh a, theihtawp min chhuahpui a, hma chu kan sawn chho ve bek bek zel a ni tih kha tawite in ka sawi thiam dan ni sela.

Tichuan, border trade pangngai pawh hi a bik takin Myanmar lam nen hian agreement lo neih sa te a awm a, tunhnai lawkah pawh hian India leh Myanmar meeting hian Border Trade, chungchangah meeting an nei dawn a. Hei hi Hnahlan-ah te , Zote-ah te leh Saikhumphai, Vaphai-ah te Pu Zothangliana bial Sangau-ah te tih tum a ni a, concept paper te pawh central-ah theh luh vek tawh a ni.

Tin, New Market hi tha zawka maintain ni se tiin member zahawm tak Pu K.Sangthuama khan a sawi a. Hei hi a dik reng mai a, a theih ang ang hi chuan department in kan enkawl a, tha zawka kalpui pawh kan duh khawp mai a. Tunah hian a buildingte pawh a lo hlui tawh a. Tin, inrem dan mumal tak pawh hi a awm lova, inrem hleihtheih pawh a ni lova, a tawt in kan tawt a ni a. Bazar-a mi veivak tan pawh hian han veivahna tur pawh awm lo khawp in kan thu khat duh a ni a, chutichung chuan nitin hian

seat dilna hi kan la hmu reng bawk a, chutiang chu kan nih avangin a buaithlak khawp mai a. Tin, bawlhhlawh paihna tur kan budget lamah tun kum kal mek ah hian a awm lova, mahse R.E lamah Planning leh Finance in min pe leh ta a, chutiang chuan a theih ang ang in kan enkawl chho a ni. Tunah hian NEC project in sa zawrhna building pawh sak that mek a ni a, hna pawh tan a ni tawh a, chak thei ang bera hmalak tum a ni.

Tichuan, kawng dunga chawhmeh zuar hi member zahawm tak Pu Lalruatkima khan a rawn sawi lang a, a pawimawh khawp mai a. Kawng dunga chawhmeh zawrh hi chu a thianghlim tawk lo, motor leh mihring vei vak tan pawh a tha lo a ni tih chu hriat a ni a, he House-ah pawh vawitam sawi a ni tawh a. Pu Speaker, i vei lama kan thut lai pawh khan kan sawi tawh thin a ni. Mahse, he problem hi solve tak tak a lo har khawp mai a, Thakthing bazar, Mission Veng bazar kawng dung a thu thin te pawh hi engtin emaw sik sawi dan a awm thei ang em tih te ngaihtuah a ni thin a. Mission Veng bazar saw tuna NEC atanga sum kan hmuh in sak mek a ni a, chungte chu kan zawh theih chuan kan suan lut thei turah kan beisei a. Tichuan hmun dang dang ami te pawh a theih ang ang chuan siam that hi kan duh a, mahse tun dinhmunah hi chuan hmun in min la daih rih lo a, a har khawp mai. Tin, a zuartute lah in kawng dung, mi hmuh phaka awlsam tea han thuta han tih mai te pawh hi ngaiyah kan neih deuh ni in a lang a, han in lakkhawm hi rin aiin a har daih mai tih kha ka'n sawi lang duh bawk a. Agriculture Marketing Board hi tunah chuan din turin hma kan la chho mek bawk a ni. Tichuan, a department hi sum dah tam deuh hlek ni se ti te pawh in sawi rik kha a awm a, hei hi chu sum kan mamawh dan a zirin R.E lamah te pawh planning leh finance lam in min la pe zel thei tur ah ngai ila, Department tan a kum kal mek chhunga revenue target hi ₹ 151,70,000 lakh a ni a, kan khum ve hret a, february thla tawp thleng khan ₹ 163,29,157 lakh revenue kan hmu a ni. Tichuan, tunah hian Zoram pumpuiah market 226 kan enkawl a ni. Helaiah hian department te tak te anga lang pawh nimahsela kan hmalakna hi foreign thleng hawlh insumdawntawanna a nih avangin department pawimawh tak a ni tih ka'n sawi duh a.

Tichuan, a tawi zawng hlira kal mai a tha in Pu Speaker, ka hre tawh a. Pu Speaker Industries Department hi lamah hian member zahawm tak tak 10-in an sawi a. Subsidy chungchang Pu V.L.Robiaka'n a rawn sawi hi a pawimawh khawp a. Tunhma atangin heng puanthui khawl te leh mistiri bungrua te subsidise-a pek hi ngaiah kan lo neih thin a. Mahse budget-ah sum kan neih tak loh avangin kan ti thei ta lova. NLUP te nena kal kawp a nih avangin mipui tana tha zawk turah kan ngai tlang niin ka hria a.

Handloom tah tute tan puan banna khawl Lunglei-ah min dah sak se ti a member zahawm tak Pu Chalrosanga sawi kha ZOHANDCO khar a nih dawn khan an khawl neih hi dah pheii mai ni se ti khan kan relin ka hria a, a latest ka hre chiah ta lova, hei hi chu thil har tak turah ka ngai lova.

Tichuan, thil dang hi chu han react tur Pu Speaker, a tam lem lova. Kan tui tlanna zawk nia ka hriat Industries Department hnuai ah chuan Oil leh Gas exploration lam hi kan sawi ri tam zawk mah mah in ka hria a. Gas exploration ah hian Pu Speaker, a theih ang tawka chak hian kan House Leader, kan Chief Minister zahawm tak kaihhraina in hma lak chhoh a, a hma thei ang bera tharchhuah hi kan ram tan a tha a ni tih he kan sorkar hian a hria a. Chuvang chuan theihtawp chhuahin tan kan la a ni. Amaherawhchu, duh angin keimahni duh anga direct-a va khawih a ni lova, company-a thawktute nen in deal chhova hma lak a nih avangin duh anga kal chak a har khawp mai a. Tunah hian kan hriat theuh angin Meidum-ah chuan gas hmuh a ni tawh a, hei hi ONGC block huamchhung ami a ni a, annin Zanlawn-ah nikum khan an verh leh a, Zanlawn bul mai, anni chuan a location hming ah Aizawl AA1 an ti a. Gas hi metre 3500 (km 3 leh a chanve) an verh hnu ah an duhtusam gas an hmu ta lova, a vanduaithlak hle in ka hria. Tunah hian ONGC hian an block huamchhunga additional geo-scientific data input an neih theih nan state of the earth airborne gravity radiometry special survey neih Ministry of Petroleum and Natural Gas ah

an dil leh mek a. Hei hi data mumal zawka an neih theih nan tiin tunah hian hma an la a. Tin, an PEL (licence) hi nikum kumtawp lamah khan a lo expire tawh hrim hrim a, extend a lo ngai a, ONGC lam hi tun dinhmun ah chuan kan beisei angin a kal chak hleithei lo a ni.

Tichuan, Oil India Limited hian Maubuang ah an verh zo tawh. Hei pawh hi kan beisei angin an hlawhtling lo deuh niin a lang a. Tunah hian Keifang ah an verh leh mek a, tukin thleng khan metre 2237 an verh tawh a, metre 3500 verh turah tunah hian 2237 an verh tawh a ni. Helaiyah hi chuan beiseina sang tak an nei a; amaherawhchu, eng ang nge kan dinhmun tur tih erawh hi chu risk ala nih rih mai avangin sawi lawk a har a. Anni hian theihtawp chhuahin hma an la a, a department concern Geology & Mineral Resources Department pawhin theihtawp chhuahin an vil a, thawhhona tha tak nen tunah hian an kal mek a ni.

Tichuan, Geology & Mineral Resources Department hianin tun February thla tawp thleng hianin revenue hi ₹ 4,60,62,3000 Vaibelchhe sawmli paruk nuairuk sunghnih sangthum sorkarah an chhunglut a. Tichuan, Minor Minerals atang hian ₹141,88,933 (vaibelchhe khat leh nuai sawmli pakhat leh sing riat leh sang riat zakua sawmthum pathum) ani a. Tin, PEL fee-ah hian ₹31811190 (vaibelchhe thum nuai sawm pariat leh sing khat sangkhat za sawmkua an hmu ani. Tichuan, kan target pawh 2015-2016 a kan target pawh hi ₹ 860000 (nuai riat leh sing ruk) velin kan khum ani.

Tichuan, Geology & Minerals-ah pawh hian sawi tur chu tam tak a awm. Pu Speaker, hun a rei tawh deuh si a ka inthlahrung deuh a, ka duhtawh leh rih mai ang a, member zahawm tak takte pawhin min hrethiam sela.

Tichuan, School Education lamah hianin kan lut ang a. Pu Speaker, member 18 te'n thahnemngai takin min sawi sak a. Lawmthu sawina tam tak kan

han hria te hi ka lawm em em a. Department ka enkawl pui Parliament Secretary leh kan official te fakna ri te, lawmthu sawina ri kan han hria te kha kan lawm em em a ni.

Tichuan, TATA Trust sawi rik a ni a, TATA Trust nen hian Connected Learning Initiative leh, TATA Trust, NEIDA leh SSA in football academy centre 60-ah hian tun session thar atang hian rei lo te ah din a tum bawk a. TATA Trust te nen hian thawh hona tha tak neiin heng bakte pawh Collected Learning Initiative an launch tuma Mumbai-a Pu Ratan Tata leh kan Parliamentary Secretary te inbiakna te pawh hian result tha tak an rawn neih ka beisei a ni.

Tichuan Aizawl khawpui leh thingtlanga zirtirtu chungchang hi he House-ah pawh hian vawi tam tak sawi rik a ni tawh a. Term hmasa lamte, hun hmasa lam daih tawh atangin sem rual tak tak hi thil har tak a ni tih vawiin hian phat rual a ni lovin ka hria a. A chhan chu khawpui leh thingtlang khairual tak tak hi rin aiin a har a ni. Khawpui chhung ah hian thingtlang lam atangin zirtirtu, a bik takin Primary School lam hi kan sawn lut ta vak lova. Kan hun chhunga sawn luh hi chu loh theih loh, tlemte tak tak a nih ka ring. Aizawl ami te pawh hi senior awm khawm hi an lo ni tawh a, promotion hi an lo hmu ve zel bawk a. Tichuan, superannuation pension hian an chhuak reng bawk a. Khawpui chhung hi tunhma, vantlangin kan ngaih ang ngawt hian zirtirtu hi an tawt lutuk tawh lo a ni. Chu chu kan dinhmun a ni a. Tichuan a theih ang ang in kan lak tharte hi chu zirtirtu indaih loh zualna ah chuan kan post deuh zel a. Chu chu tun dinhmun ah chuan kan semrual theih dan tawk a ni.

Tichuan, Evaluation scheme thar hi wind up na lamah pawh rawn sawi lan ni se tih kha a awm a. Hei hi Pu Speaker, Integrated Evaluation scheme an ti a. Hei hi tun academic session thar atangin Secondary School-ah hman tur a ni a. Chu chu external leh internal marking/evaluation a awm tawh dawn a. HSLC exam-ah entirnan, Board exam hian mark 80 a pu ang a, internal assessment evaluation hian mark 20 a pu

thung ang a. Amarawhchu, Science bikah erawh chuan 70:30 angin kan kal dawn a ni. Chu chu kan kalpui dan tur a ni ang a. Tichuan HSLC selection exam kan neih thin hi tun kum kal mek atang hian tih tawp a ni ta a. Tun hma pawhin hei hi tih tawp duhin order te chhuah thin a ni nain implement tak tak a awm thin lo deuhva. Kuminah erawh hi chuan hei a tak takin an han hmang ta a. Private School atanga sorkar school-ah te HSLC leh HSSLC selection test hi neih a ni tawh lova. Chuvangin private candidate hi nasa takin an tlem ta a ni. Tunhmaa dan lova private candidate tam tak lo awm thin kha tunah chuan an tlem ta hle a. Nikumah chuan private candidate hi HSLC-ah hian 5191 an awm a. Kumin 2016 HSLC Exam-ah chuan 424 an awm a ni, a inthlauhna chu 4767 a ni. Tichuan, HSSLC ah hian private candidate hi nikumah 3150 an awm a, kuminah chuan 513 an awm a, a inthlauhna hi 2137 a ni. Tichuan, selection exam te a lo awm tawh lohah chuan tuna Integrated Evaluation Scheme thar kan han neih hian zirtirtute leh naupangte in zirtirna kawngah te, exam kal pui dan kawngah te nasa takin hei hian hna thawk turin kan beisei a ni.

Tichuan, member zahawm tak Pu Lalthanliana kha a awm ta lova, ani khan wages-ah R.E aiin an dah tam hi engvangnge ni a rawn ti a. Hei hi nikumah kan indaih loh deuh avangin kuminah indaih deuh zawk turin Budget-ah min dah sak mai a ni.

Govt. Primary School-ah hian zirlai an tlahniam zel tih hi, nasa takin a siamthat dan tur pawh ngaihtuah thin a ni a, mahse rin aiin solve tak tak a lo har khawp mai a. Tun session atang hian ECCE, Pre-School te pawh an ti bawk a, Early Childhood Care and Education hi Govt. Primary School 66 ah hian bul tan chhovin chutiang chuan hma lak a ni a. Zirlaite pawh an neih phah chuan kan hria a. R.T.E ang chuan kum 6 atanga school kal tan tur tih kha a ni a. Mahse, Primary School lam hian zirlai hi an tlakchham tak zel si avang hian hemi solve na atan hian Pre School atang hian tan ta ila, nasa takin hei hian zirna leh naupang neih dan kawngah pawh awmzia a nei ang tih ngaihtuahnate neiin tan lak chhoh a ni a. Amarawhchu, a nghawng, a zirchianna tak tak chu kan la nei lo nain hei hian nasa takin a solve chho turah kan beisei a ni a.

High School Science zirtirtu chungchang hi member zahawm tak Pu K. Sangthuama'n a sawi kha, hei pawh hi hmanni ah zawhna leh chhanna ah pawh khan kan sawi tawh a. High School leh Middle School tan hian Science leh Mathematics bik tan RR-ah reservation siam a lo ni ta a. Tichuan Middle School-ah chuan kan hmang tawh a, 33% reservation a ni a. High School bikah chuan 30% hi reservation siam a ni a. Tunah hian concerned department-ah High School bik tan recruitment hi phalna kan dil mek a ni.

Pu H. ROHLUNA, MINISTER : School amalgamation (school suihfin) chungchang hi Pu Speaker, tunah hian nichina an sawi tak ang khan zirlai te an lo tla hniam zel a. Tin, private school te a lo ding chho ve zel a, chuvang chuan a bik takin elementary level-ah hian school hi suihfin ngai (amalgamate) tam tak a lo awm ta a. Chuvang chuan uluk zawkin department lam atang pawhin ngaihtuah a ni a, tunah hian amalgamation norms siam thar a lo ni a. Norms for amalgamation for closure of elementary schools tih hi tunah hian duan fel niin notify a ni a, tunah hian hman chhoh tan mek a ni. Hemi kan hman tak tak hma pawhin school 20 dawn chu school 9-ah tun session kal mek ah hian kan siam leh mek tawh a. Khawzawl-ah pawh tunah hian khawtlang an phur khawp a, primary school school 5 kha school 2-ah kan siam a. Khawtlang hruaitute leh department te tangkawpa Khawzawl khaw hmalak dan hi a entawn tlak hle a ni. hmun dangah pawh zirlai nei tha manglo school in hnai te te a awm, 1 km huam chhung ami te, a bik takin Primary School-ah naupang an neih dan azirin department in hma lak chhoh zel kan tum a ni. Tichuan, zirtirtu Pre-service Training chungchangah hian Pu Speaker, thingtlang lam duhsak theih dan a awm em tih member engemaw zatin an sawi a. Hengte pawh hi a theih dan ang ang chuan en chhoh te pawh a ni ang a. Written examination leh interview te a awm a, an paltlang ve a tula. Tunah pheih chuan Pu Speaker, he House-a ka sawilan duh chu, thil lawmawm tak NCTE in kan DIET paruk Kolasib, Mamit, Champhai, Serchhip, Lawngtlai leh Saiha te hi recognition tun hnai mai khan min pe ta a. Chuvang chuan pre-service training pawh zirlai awmdan azirin kan ti chho thei dawn a. Thil lawmawm tak a ni a, kan ram tan

pawh zirtirtu training na kawnga hma kan lak na ah chhinchiah tlak tak a niin ka hria a. He House-ah hian ka'n sawilang tel a ni. Pre service hi a theih ang angin kal chhoh pui pawh kan tum zel dawn a. Training beisei te pawh hian thahnemngai taka an beih a an tih that ve pawh hi a ngai tel ang tih ka ring a. A chhan chu induhsakna ringawt hian zirna hi kalpui chi a ni tawh lo tih kan hria a. Zirtirtu kan lak reng reng pawh a nghet tur hi chu MPSC in tunah hian an la vek tawh a, department lamin kan khawihlo a ni. Chu chu a nih avangin training turte pawh tlema tan an lak a, an thiam ve hi a ngai. Zirna quality siam tha tur chuan zirtirtu atanga kan tan hi a ngai a ni.

Zirlaibu hlui khawnkhawm tur tih chungchang kha Er. Lalrinawma khan a rawn sawi lang a, elementary ah chuan a thlawna sem a ni a, chu chu tute emaw kum laklawh a lehkhabu naupang lo ti bo palhte leh ti chhia te tan, School library ah te in lama hman mang loh a an dah mai mai ai chuan dah let leh ni se tihna thinlung avanga ngenna mai a ni. Thil dang a ni lo ve tih kha ka'n sawi lang tel a. Zirtirtu aikal lak phalsak mai ni se tih te pawh a awm a. Hei hi Pu Speaker, a har khawp a, term hmasa pawh khan kan House Leader hoin hei hi a problem hi hre chiangin eng tia tih tur nge ni tiin kan ngaihtuah a. Amaherawhchu aikal lak theih dan tur sawi sawi e ti lo chuan ai kal lak phal lohah khan kan chhuah ta a ni. Chu chu kan la hre tlangin ka ring a, chutiang chu a nih avangin sorkar dan angin a lo theih mai lova, tunah hian inservice training hian zirtirtu tam tak SSA hnuai ami te School Education Department hnuai a regular post-a lo awm, la training lo te RMSA hnuai ami te thleng pawhin training institute hrang hrang ah an training a. Sorkar-in an aiawh tur kan laksak mai thei si lova, inhriatthiamna in verbal in he House-ah hi chuan sawi mai ila, a pawh thui lo turah ngai ila, aiawh in chhawr theih chuan training ah in kal thei kan ti a ni. Chutiang chuan a tam zawkin an aiawh tur an la in kan hria a, chu chu zirtirtu mamawhna puhrukna atan an training chung chauh atan a ni.

Pre service training te anga regular class DIET-a kum 2 chhung neih tur a ni hran lova, churang chuanin an school-ah hian session kan han tan leh hi chuan nikum

hmasa lama lut tawhte phe chu an let leh vek tawh ang a, reilote ah midangte pawh an let dawn a ni. Tichuan member zahawm tak Pu Lalruatkima kha a awm tawh lova, ka react tawh lo mai ang e, hun ka hmang rei lutuk dawnin ka hria. Pu Speaker, a dang pawh hi a in ang deuh vek hlawm mai a, Headmaster recruitment rule chungchang hi hmannah pawh kan sawi lang tawh a LDE in 50% lak a, seniority in 50% turin tunah proposal kalpui mek ani. Chu chu School Education Department-ah chuan member zahawm tak ten an sawi a tlangpuia ka react theih ni mai sela.

Tichuan, Pu Speaker, tun session chhung hian, Hostel Rules (Mizoram School Hostel Infrastructure Facilities & General Care of Students Management Rules, 2016) hi buatsaih a ni a, Cabinet pawhin min pawmpui tawh a. Tunah hian Notification chhuah mai tur a ni tawh a, hman theih a peih a ni ti tih tawh a. Reilo te-ah tun session thar atang chuan kan hmang tan thei mai turah kan ngai a. School Hostel te leh mi hrang hrangin school behchhan lova an dinte, naupang zirlaite awmna atana fit tawh lo, tha tawh lo te a tam a. Tin, ei leh in pek that tawh loh te, room pek that tawh loh, standard tawh lo te hi hemi Rule hmang hian endik a, nakinah chuan hma lak chhoh tur a ni ang a. Hostel thar din duhte pawhin thuneitu hnenah phalna lak a tul tawh dawn a ni.

Tichuan, MICE (Mizoram Institute of Comprehensive Education) hi CBSE affiliated Mizoram sorkar chuan kan neih chhun a ni a. Hei hi private building luah hawhin Venghlui-ah hun rei tak an lo kal tawh a. MICE Govt. Roy Memorial High School, (RM High School) leh Tuikual Primary School II, hemi school pathum hi amalgamate a, Tuikual-ah khuan MICE hi suanluh kan tum a. Tunah hian MICE, CBSE affiliation hi a tawp dawn avangin, MICE hmingin a ni phawt ang a. Affiliation a fel chhoh hunah chuan MICE hi RMICE (Roy Memorial Institute of Comprehensive Education) tiin Roy Memorial kha bo lovin, a School ram lo thawhtute leh khawtlang hruaitute nen pawh inbe remin kalpui chhoh a ni dawn a. Session thar ah an sawn vek theih loh ang a. Govt. RM High School a lo kal sa kumin a Cl -IX zirlaite chu Cl-X an zawh te pawh a lo ngai ang a. MICE hmun pangngaih hian pawl 11 leh pawl 12 te chu

tun session thar hi an la kal ang a. Chutiang chuan zawi zawi a siam rem chhoh kan tum a ni.

Tichuan, April ni 5 a academic session tan leh turah Department-in zirtirtute leh Headmaster -te infuih thar lehna, khawtlang hruaitute theuh kaihhruaina in neih thar leh hi kan tum a. School Education Department hian zirna hi tha zawka akalpui theih nan hmun tam takah officer hrang hrangte in detail in, April ni 5-a school session tan thar tur-ah hian hma lak chhoh kan tum a ni.

Pu Speaker, tunah hian Model School hi a thar tur ruahmanna kan nei a. Nichina kan sawi tak Sorkar in zirtirtu tha tak nei si a sorkar school-a zirtu, naupang tlahniam telh telh ta mai te hian ngaihtuahna a tithui lo thei lo a. Chuvang chuan, Model School hi tun session thar atangin school 10 ah District headquarter hrang hrangah din kan tum a. Sum sen belh vak ngai lovin zirtirtu tha, thawksa te hi a tul chuan la khawm in English Medium pangngai takin kalpui ni se tiin ngaihtuahna kan hmang a. A bik takin Primary School ah a ni ang a. Chung Model School thar kan dinna turte chu 1)Govt. Primary School, College Veng, Aizawl, 2) Govt. Primary School, Chanmari, Aizawl, 3) Govt. Boys Primary School, Aizawl, (hei hi Sikulpuikawn ami kha a ni a) 4) Govt. Primary School, Ramhlun North, Aizawl. Lunglei District-ah chuan Govt. Primary School – I , Electric Veng Lunglei; Govt. JNM Middle School, Electric Veng, Lunglei, hei hi Primary School nen comprehensive a kal tur a ni a. Serchhip-ah chuan Govt. Primary School, Serchhip Vengchung a ni ang a. Champhai-ah chuan Govt. Primary School-II Champhai. Tin, Kolasib-ah chuan Govt. Primary School-I Kolasib. Mamit District-ah Govt. Primary School-V Mamit. Private English Medium school-a in nu leh pa ten an fate fee tam tak chawi a, rualawhna avanga tlin leh tlin lova an kal tir thin na phurrit hi sorkar in a chhawk thei ang tih kan beisei a ni. Zirna tha kan beisei ang pawh heng Model School tih thar tur te hian an pe thei ngei ang tih pawh ka beisei a. Chu mi tur chuan Department hian theihtawp chhuahin tan kan la chho zel a ni tih hi he House ah hian ka'n sawilang duh a ni.

Pu Speaker, ka Demand No. 20-na School Education Department ₹ 9,65,58,93,000/-, Demand No. 40-na Industries Department ₹ 62,85,87,000/- Demand No. 44 Trade & Commerce Department ₹ 4,67,37,000/-. Avaia belhkhawm ₹10,33,12,17,000/- chu he House zahawm tak hian min pass pui turin ka'n dil a ni.

SPEAKER : Awle, a inngaitlawm ber pawhin minute 48 a hman a nia, a lawmawm e. Tunah chuan kan Minister zahawm tak Pu H.Rohluna'n a Demand No. 20, 40 na leh 44 na hnuaiia Department hrang hrangina 2016-2017 chhunga pawisa hman tur hi a vaia belhkhawm ₹10,33,12,17,000/- he House pass pui turin a dil a, pass remti zawngin 'remti' ti rawh u le, 'remti lo kan awm em'? awm lo. Tichuan Demand No. 20, 40 leh 44 hnuaiia pawisa hman tur hi a vaia belhkhawm ₹10,33,12,17,000/- chu he House hian lungrual takin a pass ta e.

Pu H. ROHLUNA, MINISTER : Pu Speaker, ka lawm e.

SPEAKER : Awle, hei pakhat ngenna siam ve ka duh a. Mizoram Legislative Assembly Secretariat hian kan tum ber chu he House member te tihlungawi leh in lawm zawng tih hi a ni. Session chhung phei hi chuan dar 10 te zana kan thleng thin, kan thawkrim ve em em a ni. Amaherawhchu, chutichung chuan famkim lohna khawvelah hian thil tihdik vek a lo har a, in proceeding te recording te a chang chuan a lo dik mawh em em a, fel lo te a lo awm thin a, chutiangah chuan member zahawm takte hian Secretariat staff te hi chu min zuah ve hram ula kan duh a, House-ah hian min sawisel tawh lo hram ula. Keinin Department hrang hrangte kan ngaihnhnathiam ang hian, min ngaihnhnathiam ve ula tih ka duh a ni.

Awle, official ho pawh hei a tawp thlengin min thutpui a, kan lawm em em a ni. Inchungah lawmthu kan sawi ni sela. Tichuan, vawiina kan tih tur chu fel tak leh lungrual takin Pathian zarah kan tizo thei leh ta vek a, a lawmawm hle a. Naktuk Nilaini tahrik ni 30 zing dar 10:30 ah kal khawm leh turin kan haw rih dawn a ni.

The sitting is adjourned.